



5137

1

Mag. St. Dr.

P

Pedag.
188.



Wid. pub. ~~Wid. pub.~~

VIII. i. 80

VII.
10

Intrepide quovis Excedi Toti Romae Civis
Videri mihi, et tunc invidia Suetonio
Iocundus. Invenitque penne ostia prosequendo.

(1) Philantia ambrosii mater est, ex qua invidia proder
quam sequitur alium conculcat, ex quoque Conpi:
vno psilopsia in psilopsiam permutatur. quod
nil penitus salutaris sapienter audire posse
exponit

(2) nullius unquam morali quae oratio omni
desideria expleverunt

(3) Plato Perseusam imitatus, nil ex propria senten-
tia se esse in apertum profere affirmavit, quod
tunc ne animi sui meditationes propriis deferre
doveret, explicare desistit, quoniam iudicium esset
sub eorum.

Ex ad Albiem. Epistam non illud tenet. Ne-
que atque, atque et sapienter, non temere credere. Ep-
istam simile dicit. Similis est, et memento
vnum qui sapienter non oportere esse credulum
Commune quoniam minimum horum et salutare ab-
dicit esse demones non facile credere

JOACHIMI PASTORII MED. D.
PALÆSTRA
NOBILIUM
feu
CONSILIUM
De Generosorum Adolescentum
educatione.

*in gratiam quorundam Illustrum & Bibliotheca
Polonorum*

conscripsum.

ELBINGÆ

Sumptibus Autoris

Typis AGHATII CORELLII

ANNO clō lcc LIV.

SUMMO GENERE

ET AD MAXIMA QUÆQUE NATIS
ADOLESCENTIBUS

DNN. DNN.

VLADISLAO	COMIT. à DŌN- HOF, PA- LATINI- DIS PO- MERA- NIÆ.	THEODORO de GORAY GORAIKI, CASTEL- LANIDÆ KIOVIENSI BOGUSLAO de POTOK POTOCKI
IOH. FRIDERICO		
VLADISLAO CASMIRO GULDENSTERNIO. L. B.		CHRISTOPHORO in LA- CHOWCE SIENIVTÆ de LUNDHOLM

Laborem hunc

In gratiam ipsorum susceptum

Studiorum & omnigenæ felicitatis incre-
menta ex animo optans



dicat, consecrat

Joachimus Pastorius, D.

PALÆSTRA NO- BILIUM,

seu

CONSILIUM

De Generosorum Adolescentum
Educatione, in gratiam quorundam
Illustrum Polonorum conscriptum.



Vi de rectè instituen-
dæ Juventutis methodo
vel accuratius cæteris co-
gitant, vel judicant incor-
ruptius, consentiunt in eo,
opinor, omnes, Nobilem,
illustriq; loco natam Ado-
lescentiam non eodem prorsus modo cum re-
liquo Puerorum vulgo erudiendam esse. Cum
enim Generosi illi ad eas stationes & munia
educuntur, ad quæ cæteri adspirare, aut per-
venire certè vix soleant aut possint, danda
quoq; opera est, ut, quod genus vitæ adulti
cum laude tenere debeant, ad id à teneris mox

A 2

ungvi-

ungvicolis præparentur. Ac optandum sanè esset, ita rem scholasticam institui posse, ut separati extarent ludi, in quibus Nobiles illi seorsim in studiis exercerentur conditioni ipsorum respondentibus. Uti equidem magnis quibusdam Principibus curæ fuit, ut in eâ re exemplum præberent, meritò ab aliis omnibus imitandum. Sed paucos usq; videmus, quibus ad similia molimina vel voluntas vel commoditas adsit. Plerumq; enim, qui rem eam cordi habent, per accisas sinisteritate temporum res, aut alia obstacula, destituuntur viribus, & qui contra à viribus non deseruntur, res istiusmodi pensi non habent. Interim, quia distincta ejusmodi Gymnasia vel nulla, vel pauca adhuc habentur, communi in Palæstrâ nobilem Iuventutem cum ceterâ exerceri oportet. Adhibenda tamen cura est, ut & sic ei consulatur, ne propter alios sibi necessaria negligat, discat contra non necessaria. Multæ autem Institutionis puerilis partes ita omnibus omnium generum Adolescentibus communes sunt, ut nihil necesse sit in iis diversos vel Magistros, vel erudiendi modos venari. Adeoq; vulgaria Methodorum descriptarum.

Præce-

Præcepta majorem partem cunctis servire possunt. Undè & mihi de Institutione Nobilium, in primis Polonorum, sensum meum breviter exprimere, uti iis, quibus nihil non debeo, gratificer, cogitanti, non est animus repetere, quæ ab aliis, vel à me ipso, publicâ utilitate ita rejuvenescere nos jubente, de methodo erudiendæ Iuventutis generatim scripta sunt: nisi fortè alicubi res non ferat aliter, quàm ut nonnulla ex ante dictis inspergantur.

Literarum bonarum, & in primis Latinæ CAP. I.
lingvæ studium si usquam terrarum Or- Latina
dini Equestri vel usitatum, vel necessari- lingva u-
um est, est certè in Poloniâ. Causæ ejus rei sus & ne-
variæ sunt. Prima & præcipua opinor est, quod cessitas in
Doctrinâ, & Lingvæ maximè Romanæ quali- Poloniâ.
cunq; peritiâ opus est sacra munia & beneficia
adituris. Quæ cum longè maxima & plurima hoc in regno sint, præcipuaq; eorum Nobilibus potissimum pateant, magnus sanè indè stimulus omnibus additur ad ea comparanda subsidia, sine quibus Antistitia illa haberi, aut certè administrari ritè non possunt. Porro Negotiorum Causarumq; forensium Acta lati-

nis

nis literis scribi solent, ipsæq; leges & sanctiones Regni iisdem expressæ extant. Adde, quod gens Polona exterarum Nationum visendarum studio plerumq; ducitur, & cum cultissimis quibusq; come atq; amicum exercet commercium. Ad id Lingvæ Latinæ organo opus, cum propria ipsorum Lingva non nisi à cognatæ, hoc est, Sarmaticæ originis populis intelligatur. Postremò vix ulla alia gens est, quæ vel maiore gaudeat libertate, vel acrioribus ad eam tuendam animis feratur. Ad id autem opus est Eloquentiâ, nec vulgari tantum istâ, qualis illiteratis etiam non rarò contingit, sed alterâ illâ, quæ à Doctrinæ studiis, & ex bonorum Autorum, præsertim Latinorum tractatione exsurgit. Istis igitur stimulis impulsa eò diligentius in bonarum artium Disciplinas, & sine quâ illæ disci non possunt, Latinam Lingvam incumbere solet aut certe debet Polona Iuventus. Et hætenus equidem, si quæ gens, hæc utiq; viris & Magnatibus doctissimis effloruit. Tulit superior ætas, & fert ista etiamnùm non paucos, qui inter Literatissimos & sapientissimos seculi Viros solidæ Eruditionis famam eximie possunt tueri.

Nec

Nec illa tamen profundior Eruditio quicquam officit illis, quò minus ad vitæ politicæ officia atq; elegantias sint idonei: cum alioquin vulgaris querela sit, obtundi illâ reconditarum Disciplinarum exquisitiore tractatione ingenia, ut ad vitæ cultum, & ad negotia civilia videantur ineptiora. Nec diffiteor ego, magnum hac in re ingeniorum delectum habendum esse. Nam sunt nonnulli animi ita comparati, ut in omne Disciplinarum genus, tam illud nempè, quod contemplandi industriam requirit, quàm alterum, quod in actione consistit, non possint ita diffundi, quò in utroq; excellent, singularemq; aliquam laudem mereantur. Cæterum ut summe gloriosum est, si alterum cum altero conjungi, & quicquid interioris Sapientiæ studia suggerunt, id aptè ad vitæ civilis usum afferri possit, ita si alterutro carendum sit, tolerabilius Theoreticæ Sapientiæ, quàm Prudentiæ Practicæ damnum fuerit Nobili. Quocirca ad hanc in primis cum curâ is ducendus est, simul atq; per ætatem ducti fuerit idoneus. Vitæ ille parandus est, non scholæ; luci publicæ, non umbraticæ solitudini. Neq; turpius sphalma, qui Nobilium regem

regendæ adolescentiæ præsumunt, committere possint, quam si illos scholasticarum disciplinarum ceu Trophonianis quibusdam antris ita detineri atque inhorrescere prorsus sinant, ut inde ad negotia tractanda, & ad vitæ politiem fiant inhabiles. Quid profuerit intra terræ abdita, gravidas pulcherrimo auro glebas effodisse & collegisse, nisi, quod collectum fuerit, efferas, & ad usum denique tuum & aliorum convertas? Quorsum adeo conducet longinqva terrarum pervestigare, si externis Cauponum genis moribusque diversiorum ita insulas, ut parentum, amicorum, patriæ, metæ denique, ad quam directæ sit peregrinatio, penitus obliviscaris? Perinde ergo cogitandum quoque est Nobilibus, scholasticas exercitationes hospitia & diversoria esse, quæ transeunda sunt ad certum scopum tendentibus, non habitanda. *Non huc itur, ait ille, sed hæc.* Eunt verò illi per hæc artium diversoria ad Prudentiæ civilis, & ad vitæ politicæ Orchestram, propriam nempe Nobiliū sedem. Hic Rhodus, hic saltus. Interim certò etiam sibi persvadeant Nobiles, fore se ad vitam illam politicam longè aptiores, & splendidiorè ibi luce fulsuros, si istuc à bonis artibus ritè instructi accesserint. Fore contra, ut, si

ut, si istas non attulerint, malè ferant lucem, publicam, & aut fugere illam debeant, aut inter rerum peritos miserè se subindè prostituerè, aliis certè palmam, etsi forsan fortunā longè inferioribus, dare cogantur. Quare necesse est, ut animum ita prorsus inducant suum, esse omnino sibi studia colenda, & diligenter colenda, non perfunctoriè, non quasi aliud agendo. Altè sibi quisque horum (qui indole non destituitur prorsus) metam figere debet, & ad imitandum proponere animo non istos vulgariter tinctos Quirites, sed illos potius, quos veræ & solidæ Eruditionis Sapientiæque gloriā supra alios aut videt florentes, aut floruisse audit. Si præsertim inter Majores suos habeat tales, ab eorum orbita turpe sibi putet recessisse. Insonet auribus illud:

Te Pater Æneas, & avunculus excitet Hector.

Eriam vetustioris Poëtæ istud subindè animum stimulet:

Ἄνδρ' ἀγίσεσθαι καὶ ὑπέρβουλον ἔμμεναι δέον.

Semper antecellere, & superiorem aliis esse.

CAP. II.

Initium autem faciendum est à Lingvis, & Modi Latinam linguam discendi,
Inprimis Latinā, quia & maximè, quemad-

modum dixi, necessaria est, & difficilius hodie, quam ferè aliæ, discitur. Si Terra aliqua in Europâ esset, quæ eam linguam vernaculam haberet, eò haud dubiè Nobiles plerique, saltem ditiores, mitterent filios suos. Sic enim istic non minore negotio eam linguam addiscerent, quam disci solent aliæ, quarum causâ à focopaternali abstrahi, mittique in extera loca consuevere adolescentes. At nulla hodiè gens est, quæ linguam istam à matre hauriat, Italiâ, & Româ ipsâ etiam, quoad linguam, priscæ illi adeò dissimili, ut Latinum sermonem nemo istic sciat, nisi qui deditâ operâ eam didicerit. Ubiq; igitur labore, & quadam velut insitionis industriâ, linguæ istius comparanda peritia est. Equidem quod de Collegiis, in quibus Domestici omnes non aliâ linguâ, quam Latinâ uterentur, & ego alibi, & alii ante me monuere, id à nemine citius, quam à Nobilibus dari posset effectui: quippe qui facillimè omnium sumtum cum facere ac sustinere queant. Et miror de tali Instituto in locis ad eam rem opportunis non cogitari diligentius, neq; inter tot Viros Magnificos, & ad pia alioquin opera propensos, reperiri aliquos, qui tale velut

lut Latium extra Italiam fundare, si non pro vulgò, saltem pro nobilibus pueris aggrediantur. Dum id non fit, nulla alia ratio superest, quam ut Nobiles etiam atq; Illustres, modis hætenus usitatis, aliquantum tamen ex Consilio ^{Modi vulgati non prorsus abjiciendi, sed corrigendi.} Virorum artem Didacticam curiosius excolendum correctis, ad linguæ Latinæ Sacrum deducantur. Vorandum nempe ipsis quoq; quantumvis tenellis, & laborum fugitantibus, vorandum, inquam, pariter est, quicquid circa linguæ Latinæ salebras occurrit difficultatis & fastidii. Tanti jam Dominatrix ista & Monarchiam, inter rudera etiam Romani Imperii, retinens Lingua est, tanti saltem habetur, ut ob eam acqvirendam ægrè sibi facere nemini grave esse debeat. Et pensabit sanè illa, quod in ipsâ insumtum fuerit laboris, nec magno postea emta ^{Labor adhibendus.} videbitur, cum amplissimos ejus fructus ætas maturior fuerit experta. Sed nec labor quoq; ipse, quem discendæ illi impendere oportet, tam immanis est, ut quæquam debeat terre. Pertulere eas molestias tot Magnifici Viri, & sine querelâ, spe scilicet futuri commodi, pertulere: cum tamen usitata ipsorum temporibus methodus non amœniorem, imò opinor

arumnosiores faceret laborem. Mundantur à sentibus suis magis magisque in dies viæ, quibus ad eam linguam itur, & perpetuo usque desudat in eò nonnullorum industria, ut hoc in studio non omnis quidem laboris (nam id fieri nequit, & si fieret, vilior ipsa lingua foret) gratia fiat Iuventuti, laboris tamen & tedium minus, & præsentior fructus appareat. Sed eâ in re cum, quæ alii & nos ipsi meditati sumus, extent, non ero nunc verbosus. Utinam modo talia, quæ scribuntur curâ & solitudine, eadem à Scholarum Magistris tam privatis quam publicis in effectum deducantur. Utrosque meritò nominare oportuit, quia nisi publicæ Institutioni privata respondeat, parum plerumque efficitur. Et in Nobilium potissimum institutione non minores partes & operæ Magistrorum privatorum sunt, quam publicorum: eò quod publici pluribus, & variæ sortis pueris accommodare operam suam coguntur; privati autem tali varietate minus distracti, uni aut alteri Discipulo magis vacare, & pro ingenio, captu, usu, & necessitate studiis discantis consulere possunt. Quocirca bene faciunt Parentes, cum Filiis suis Educatores

Privato-
rum Præ-
ceptorum
opera ne-
cessaria.

tores quærent, qui & muneris sui difficultatem intelligant, & recte id administrare tam possint, quam velint: quique adeo ipsi in elegantiore literaturâ ad politicam versati sint, & a civilis tamen vitæ, morumque cultu, cuius minime expertes esse oportet, vitia, quæ politicis nonnullis nimisquam usitata sunt, sejungant. Eorum curæ incumbet, veræ Religionis & Pietatis semina animis inserere Nobilium, ad precum officia ipsos assuefacere, ad omnem in habitu, gestibus, moribusque mundiciem, ad reddenda item operarum publicarum pensæ, iisque addenda alia, quæ in publico disci nequeunt, attendere diligenter.

IN primis autem, quod ad linguam Latinam at-
tinet, de quâ jam hic præcipue agimus, tam
publicis, quam privatis Magistris danda est ope-
ra, ut præceptis Latinæ linguæ quàm frequen-
tissimus addatur usus, adeoque nobiles illi La-
tinitatis Alumni cum Magistro privato, publi-
co, & inter se quoque, nec in scholâ tantum, sed
ad mensam, & inter ludendum etiam non
alio sermone quàm Latino loquantur. Neque
vernaculæ inde linguæ ullum damnum est metu-
endum.

CAP. III.
Lingua
latina
usque
quæ
tidianum
in loquen-
do.

Lingua
Vernacula.

endum. Quæ equidem etiam ad elegantiam usq; exercenda Nobili est: cum in publico versanti turpe futurum sit, non comtè loqui eâ lingvâ posse, quæ & materna, & maximi perpetuq; in omni ferè negotiò usûs sit. Sed ejus poliendæ ratio nunquam deerit, cum quotidiana vitæ & consortii necessitudo ad majorem subindè vernaculæ quam Latinæ lingvæ consuetudinem invitet, adigatq;.

Famuli
non sint
à literis
alieni.

Porro hoc quoq; (quanquam cautis Parentibus vel ultrò observari solitum,) haudquam tamen omittere possum, quin moneam: nimirum, cum filiis suis plerumq; famulos soleant adjungere, tales ut adjungere studeant, qui, etsi nobiles, suâ tamen infra genus tenui fortunâ ad struendam sibi per animi Dotes fortunâ incitati, in literis diligentes sint, &, ut eadem cum Herulis studia tractent, paulò majores tamen in iis habeant profectus. Hi enim quia acrius examinari corripiq; possunt, ex alieno exemplo id capient Nobiles commodi, ut acerbiter studiorum minùs sentiant, proficiantq; tamen non minùs. Nam æmulatio ipsa non segnes animis ipsorum generosis admovebit stimulos, cum modico spatio præcurrent

current illi, quos æquare atq; etiam superare eruditione velint, uti genere & fortunâ superant. Hoc quoq; ad excitandos talium animos conducibile erit, ut, ubi aliquantum in lingvâ istâ profecerint, aliquando liber aliquis jucundus & facilis, cujusq; materia aliundè jam quodammodo nota sit, illis legendus suoq; Marte interpretandus detur. Tum enim, ubi vel omnia, vel pleraq; se intelligere videbunt, gaudio ipso ad studium, in quo profectus suos sentient, tantò vehementiùs inflammabuntur.

Spem successus alit, possunt, quia posse videntur.

Cæterum quod omnibus lingvam istam discipientibus, id Nobilibus quoq; necessarium est, ut ubi Grammaticæ rudimentis aliquo modo fuerint imbuti, stylum crebrò vertant. CAP. IV.
Styli Exercitium
crebrum. Ac primum, dum Tyrones sunt, perbrevia iis dentur Exercitia, & sint principio aliquæ ex Cicerone sententiæ, quas vertat Magister quam potest, perspicuitate maximâ, & in Latinum transferri in arenâ a Discipulis jubeat: ubi postea, quæ corrigenda erunt, correxerit, ipsa Ciceronis verba subjiciat, moxq; etiam, quantum infra Autoris illius elegantiam substitue-

rint, demonstret discentibus, phrasēsq; & quæ præcipuè notanda occurrent, subnotari iubeat.

Exerci-
tiorum
Materia
quales esse
debeant.

Ex Cicerone autem eligi debent ea, quæ in omnem vitam possunt utilia esse: quæq; inprimis ad mores formandos pertinent: ut ex Lib. de Nat. Deor. illud. *Quid potest esse tam apertum, tamq; perspicuum, cum Cælum suspeximus. cœlestiaq; contemplati sumus, quam esse aliquod Numen præstantissima mentis, quo hæc regantur. Et de Conscientiâ illud ex Orat. pro Milone. Magna est vis Conscientiæ in utraq; partem, ut neq; timeant, qui nihil commiserunt, & pœnam semper ante oculos versari putent, qui peccaverint. Sic de Prudentiâ ex l. 1. Offic. Ut quisq; maxime perspicit, quid in quâq; re verissimum sit, quiq; acutissime, & celerrimè potest & videre, & explicare rationem, is prudentissimus & sapientissimus ritè haberi solet. De Iustitiâ ex eodem lib. Totius Iustitiæ nulla est capitalior pestis, quam eorum, qui tùm, dum maxime fallunt, id agunt, ut boni Viri videantur. De Patientiâ ex Epistolâ ad famil. Simus eâ mente, quam & veritas, & ratio præscribit, ut nihil in vitâ nobis præstandum præter culpam putemus: eâq; cum careamus, omnia humana pacatè & moderatè feramus.*

Similes materiæ possunt quoq; ex Terentio depromi, eodemq; modo tractari, ut nempe & versæ Magistri operâ, in Latinum deinde trans-

transponantur, & deniq; Compositio cum subnexo Terentii textu conferatur. Pro Exemplo sit illud ex Adelph. Act. III. Scen. 5. *Quam estis maxime potentes, dites, fortunati, nobiles, tam maxime vos æquo animo æqua noscere oportet, si vos vultis perhiberi probos. Namia licentia profectò evadet in aliquod magnum malum. Item illud ex Act. IV. Sc. 3. Omnes, quibus sunt res minus secunda, magis sunt nescio quomodo suspiciosi. Ad Contumeliam omnia accipiunt magis. Propter suam Impotentiam se semper credunt negligi.*

Ad eum modum tradi sententiæ possunt de cunctis Virtutibus, ut de Probitate, Temperantiâ, Sedulitate, Fortitudine, Mansuetudine, Beneficentiâ, Magnificentiâ, Veracitate, Taciturnitate, Comitatus & Civilitate, Virtute Heroicâ, Amicitia, Decorò.

Ubi quotidianis ejusmodi styli Exercitiis Tyrones isti Virtutû campum semel fuerint emensî, remetiantur eundem Exemplis Apophthegmatum de illis ipsis quoq; virtutibus agentium, propositis: ut de Pietate, ad quam Dei cognitio pertinet, illud ex 1. lib. de Nat. Deor. *Cum à Simonide quæsiisset Tyrannus Hiero, quid, aut quale esset Deus, deliberandi sibi unum diem postulavit. Cum idem ex eo postridiè quæreret, biduum petiit. Cum sæpius duplicaret numerum dierum, admiransq; Hiero requireret, cur ita faceret: quia quânto, inquit, diutius considero, tantò mihi res videtur obscurior.*

Apophthe-
gmata de
Virtuti-
bus.

C

Item

Item de Continentiâ illud ex Catone Majore:

Curio ad focum sedenti magnum auri pondus Samnites cum attulissent, repudiati ab eo sunt. Non enim aurum habere præclarum sibi videri dixit; sed iis, qui haberent aurum, imperare.

CAP. V.
Apologi.

Olim fabellæ quoque variorum Autorum, sed ab Æsopô præcipuè nomen adeptæ, ad hanc rem adhiberi solebant. Et habent equidem illæ leporis ac svavitatis, quâ capi mustea hæc ætas amat, non parum, earumque non paucæ pulcherrima simul Prudentiæ tam Politicæ quam Moralis continent Præcepta, vestem porro illis perelegantem tersò stylò suò circumdedit Magnus Vir Camerarius. Postremò illæ alicubi ita editæ sunt, ut Imaginum quoque, quæ additæ habentur, luce trahere possint tenellos Adolescentum animos. Sed eâ in re cum curâ ad inclinationem discendum respiciendum est. Neque enim omnia Ingenia capiuntur fabulis, & verarum historiarum hodiè abundè est, quibus prima Antiquitas destituebatur. Sed si rapi ad eas discen-tem videas, nonnisi lectissimas, & ad rem politicam plurimum facientes proponere oportet, ut ex gr: illam de *Mure Leonem ex cassibus ad-*
morsis

morsis liberante. Ubi etiam mox applicationi maximè insistendum est. quòd nimirum ostendat fabula, magnis sæpè & potentibus viris opem tenuiorum utilem esse posse. Item De *Ranâ & Mure*, dum inter se decertant, Accipitri in prædam cedentibus, quo doceatur, quod alioquin etiâ Politici solite inculcare solent, parvis Urbibus, Rebusp. vel, ut hodiè loquuntur, Statibus cautè agendum, & Concordiæ vinculum cum curâ servandum esse: aliter si fiat, fore, ut tertius potentior ipsorum discordiâ in res suas abutatur, & adversus utrumque valeat. Quod idem alio Apologo de Eqvo, qui cervum in eodem pabulo ferre nequiret, hominem in tergum suum admittente significatur. Quoniam etiam Parœmiæ seu A-

Adagia.

Adagia inter maximas cujusvis sermonis lautitias non immeritò habentur, selecta aliqua, & ad vitam politicam quodammodò accommodata proponi possunt, additò, quâ occasione nata sint, & quis eorum verus sit sensus. Dictetur hæc explicatio Lingvâ vernaculâ, vertant de-
nuò discantes in Latinum. Sic erit materia Compositiunculæ, quâ simul & stylum exer-
cebunt, & Adagium intelligere, ac porro ad
usum transferre discent. Pro Exemplo sint ista:

C 2

Argen-

Argentanginam patitur: quod ex Demosthenis facto
ortum, in eos dici sivevit, qui muneribus se pa-
tiuntur corrumpi. Argenteis hastis pugnare. Aureo
hamo piscari. Aquila muscas non captat. Aurea compedes,
de splendida servitute. Satius est recurrere, quam
malè currere. Romanus sedendo vincit. Efficimus pro opi-
bus nostris mœnia. Virtute Duce, Comite Fortunâ. Benè natis
turpe est malè vivere. Novos parans amicos, ne obliviscere
veterum. Simia in purpurâ. Optimum alienâ insanîâ frui.
In occipitio oculos gerit. Cum vulpe vulpinari. Edilita-
tem gerit sine populi suffragio. Scarabeus aquilam querit.
Sed molunt Deorum mole. Aquila senecta corydi juvenia.
Dives aut iniquus est, aut iniqui heres. Testudo intra te-
gumentum suum tuta est. Mortuo Leoni etiam lepores insul-
tant. Emungens acrius elicit sanguinem. Non semper erit
aestas. Omnis herus servo monosyllabus. Leonina societas. Hic
Rhodus, hic saltus. Annosa vulpes haut capitur laqueo. Io-
vis taxilli semper feliciter cadunt. Habet pilus quoque umbram
suam. Habet & musca splenem. Tentando ad Trojam perve-
nerunt Græci.

Cæterum quæcunq; materiarum istarum
Ethicarum Politicarumvè ad exercendum sty-
lum fuerit proposita, ipsâ hâc opinor Tracta-
tione, aut certè adhibita etiam atq; etiam Ma-
gistri operâ, ita infigetur discenti, ut deindè,
quandocunq; exigere eam commodum videbi-
tur, aut recitare ad verbum, si memoria fuerit
felicior, sin minùs, sensum ejus reddere possit.

Porro

Porro ut assiduè in memoriæ thesaurum ^{Gnomæ}
aliquid recondatur, quod deinceps, quoties ^{seu sententia}
usus erit, depromere nobilis puer, & ad rem
porro præsentem accommodare possit, senten-
tiæ quoq; breviores, & seu prosâ seu ligatâ ora-
tione, tamen acumen aliquod continentes di-
scantibus proponendæ sunt. Ut specimen præ-
beam, aliquas attexam, meò qualicunq; iudiciò
ex variis Autoribus (quorum tamen nomina
alicubi addita, plerubiq; omissa) etiam recentio-
ribus, inter quos Famianus Strada est, selectas,
nec eas tam novitate omnes, quàm utilitate cõ-
mendabiles. Si enim ea duntaxat tradenda es-
sent Adolescentibus, quæ nobis jam viris nova
videantur, quando illi ea discant, quæ nobis jam
trita sunt, sed aliquando pariter nova fuere?

Amicorum neq; nobis, neq; cuiquam satis fuit. Sal-
acrius servitium iterum victis. Adversarum rerum sensus
felicissimo cuiq; acerrimus est. Ser. Autoritas rerum agen-
darum telum. Alium silere quod voles, primus sile. Astra
regunt homines, sed DEUS astra regit. Ad pœnitendum
properat, citò qui iudicat. In aulâ nulla virtus minùs evehi-
tur, quàm quæ timetur. Ser. Audacia vilissimo cuiq; cre-
scit, si timeri se sentiat. Bonis nocet, qui parcit malis. Benè
sperando & malè habendo transit vita mortalium. Bonæ Le-
ges ex malis moribus nascuntur. Beneficium est negare noci-
tura. Benevolentia importuna par odio est. Beneficium acci-
pere,

pere, Libertatem est vendere. Beneficiis aliqui utuntur, ceu floribus, tam diu gratis, quam diu recentibus. Bellicoso Populo quies diuturna nocet. Sal. Belli Dux nihil magis timere debet, quam ne videatur timere. Bonus Vir omnes iudicat esse bonos. Carere debet omni vitiō, qui in alium paratus est dicere. Castus veteres non sunt deplorandi novis lacrymis. Consilia omnia, præcipue bellica, tam diu tuta, quam diu tecta. Strad. Consilia hostium optimè referantur aurea clave. Id. Continuo timere omnem excedit calamitatem. Contemptu glorie contemuntur virtutes. Corpori indulgendum est, non serviendum. Cum celeritate temporis velocitate utendi certandum est. Crudelem Medicum intemperans æger facit. Casus, quem sæpè transit, aliquando invenit. Cunctationi nullus locus est in Consilio, quod non potest laudari, nisi peractum. Tac. Dei Iudicia multa occulta, nulla injusta. Deum colentibus omnia prospera eveniunt, adversa spernentibus. Liv. Diu apparandum est bellum, ut vincas celerius. Dulce & decorum est pro patriâ mori. Dignum laude virum Musa vetat mori. Dei Naturam mirari, non rimari oportet. Ducum peritiâ, & virtute Militum congeminantur exercitus. Str. Eget minus Mortalis, qui minus cupit. Erroris confessio est, mutanda fecisse. Etiam oblivisci quod scis, interdum expedit. Etiam sanatio vulnere cicatrix manet. Eloquentia in homine malò est venenum in poculo aureo. Fidem qui perdit, ultra nihil potest. Fortuna majori sæpè locum fecit Injuria. Festinatio singulorum mora est omnium. Str. Furentem apud Multitudinem parum tuta est Majestas sine viribus. Id. Fraus sibi in parvis fidem præstruit, ut majori emolumento fallat. Liv. Frustra sapit, qui sibi non sapit. Facilius crescit, quam incipit dignitas. Sen. Frustra rogatur, qui misereri

sereri non potest. Fatetur facinus is, qui Iudicium fugit. Gaudium & silentium in eundem hominem vix competunt. Genus facere, quam accipere præclarius est. Gula plures perdit quam gladius. Gratia in commune collata ab omnibus accipitur, redditur à nemine. Str. Graviores sæpè sunt periculis remedia. Gravissimum est Imperium consuetudinis. Gravisimi morsus irritatæ necessitatis. Hominem multa experiri Paupertas jubet. Homini Consilium tum deest, cum multa invenit. Honor uberrimam virtutis alimentum. Historia Lux Veritatis, Magistra Vita est. Homine ingrato nihil terra pejus alit. Humanitate nemo facile peccat. Humanis in rebus secula & Personæ intereunt, causæ & eventus idem recurrunt. Imperator nunquam ita paci credit, ut se bello non præparet. Injuria unius, minæ multorum. Injuriam aliqui putant finem accipiendi. Strad. In magnis & voluisse sat est. Ignoscito sæpè alteri, raro tibi. Imperium magnum habet, sibi qui imperat. Inopiæ desunt pauca, Avaritiæ omnia. Ingenia præclara sæpè in occulto latent. Invidia ad felicitatem unice intenta, ad merita cæcutit. Str. Initia Principatuum novis rebus accommodata. Str. Malus Miles est, qui Imperatorem gemens sequitur. Maxima cuiq; fortune minimè credendum est. (Hannibal ap. Livium.) Literas fovet, qui dignaliteris gerunt. Lingua mente nè sit celerior. Levis est fortuna, cito reposcit quæ dedit. Mala, unde minimè expectantur, erumpunt. Sen. Locum homo, non hominem locus commendat. Marcet sine adversario Virtus. Multis displicet, qui sibi nimium placet. Minorem se fatetur, quis quis timet. Str. Misera est fortuna, quæ inimico caret. Multos timere debet, quem multi timent. Metu anxii omnia in portenta vertuntur. Mendacium plerumq; aliqua portio-
ne

ne veri adpersum est. Str. Miser est Imperator, apud quem vera reticentur. Capitol. Morum similitudo tenacissimum vinculum ad connectendas amicitias. Plin. Ep. Negotia magna magnis egent adiutoribus. Ne feceris, quod factum nolis. Nil turpius, quam vivere incipiens senex. Nec cuilibet credamus, nec nulli. Nihil difficile est persuadere, persuasis mori. Justin. Nullius rei sine socio jucunda est possessio. Nimium altercandò Veritas amittitur. Non citò ruinà perit is, qui rimam timet. Non est cicatrix turpis, quam Virtus peperit. Opes irritamenta malorum. Oderunt, quem metuant. Opinione constant humana. Opportunitas rebus etiam minimis pretium addit. Otium sine literis mors est, & vivi hominis sepultura. Propè ad summum, propè ad exitum. Patrie fumus alienò igne luculentior. Pax servientibus gravior, quam liberis bellum. Peccatum qui excusat, bis peccat. Pecunia, siue desit, siue suppetat, seditiosa res est. Perfidia nullis constringi vinculis potest. Potentia non semper intenditur, cum extenditur. Puras Deus, non plenas adspicit manus. Patientia sapiens lesa fit furor. Quod videri vult, esto. Qui facile credit, facile decipitur. Quod durum pati, meminisse dulce est. Qui pro innocente dicit, satis est eloquens. Qui invitatus servit, fit miser, servit tamen. Rectè faciendo neminem timeas. Regium est audire malè, cum benè feceris. Ruborem amico excutere, amicum est perdere. Religionis quoties mota est anchora, toties fluctuat Reip. Navis. Str. Remedia tardiora sunt, quam mala. Sape & contemptus hostis cruentum certamen dedit. Satiùs recurrere, quam malè currere. Sanitate nil habet vita præstantius. Serum est, in periculis Consilium quærere. Spes inopem, res avaxum, mors miserum levat. Spes est salutis.

ubi

ubi hominem corrigit pudor. Suspiciones interdum nulla satis diluit innocentia. Str. Temeritas, ubi primum impetum effudit, sicut quædam animalia, amissò aculeo torpet. Curt. Temporis solius honesta avaritia est. Terrore malè comparatur veneratio. Str. Taceri quod vis, tace. Turpe est, benè natos malè vivere. Taciturnitas stulto homini pro sapientià est. Victorias ægrius incipias, quam continues. Vive Deo, qui est Autor vitæ tuæ, vive Conscientiæ, quæ est vita vitæ tuæ, vive famæ, quæ est vita post vitam tuam. Victoria naturâ insolens est, & superba. Veritas filia temporis. Velox Consilium sequitur pœnitentia. Verecundia custos Virtutum.

Ubi brevium ejusmodi sententiarum aliquam farraginem animis perceperint discentes, ad paulò majores quoque transitus fieri debet, cujus notæ sunt illæ: *Fides in præsentia eos, quibus resistit, offendit, deinde ab iis ipsis suspicitur laudaturque.* Plin. Ep. Est omnino iniquum, sed usu receptum, quod honesta consilia vel turpia, prout malè aut prosperè cedunt, ita vel probantur, vel reprehenduntur. Id. Beneficia eorumq; leta sunt, dum exsolvi posse videntur, cum multum antevenere, pro gratiâ odium reponitur. Tac. Iniquissima bellorum fors est, prospera omnes sibi vindicant, adversa uni imputantur. Tac. Sapiens tum maxime Paupertatem meditatur, cum in mediis Divitiis consistit. Sen. Etiam excellentibus ingeniis citius defuerit ars, quàm Civem regant, quàm quàm hostem superent. Liv. l. II. c. 43. Inter causas malorum nostrorum est, quod vivimus ad exempla, nec ratione componimur, sed consuetudine abducimur. Sen. Ne-

D

mo sic

mo sic à naturali lege describit, & hominem exuit, ut animi causâ malus sit. Id. Familiare est hominibus omnia sibi ignoscere, nihil aliis remittere, & invidiam rerum non ad causam, sed ad voluntatem, personasq; dirigere. Vell. Patere. Numquam in solidò stetit superba felicitas, & ingentium Imperiorum magna fastigia oblivione fragilitatis humane collapsa sunt. Sen. Pater suas. II. Cuncta Mortalium in incertò, quantoq; plus adeptus sis, tantò te magis in lubricò esse censeas. Tac. Naturâ Infirmittatis humane tardiora sunt remedia, quàm mala, & ut Corpora lentè augescunt, citò exstinguuntur, sic Ingenia studiaq; faciliùs oppresseris, quàm revocareris. Idem.

Sententiâs ejusmodi opus est ut ipse Magister habeat in promptu, & quasi in numerato, quò etiam eas datâ occasione ad mensam vel alibi applicet ad usum. Ità enim crebrò auditas nec obliviscuntur Adolescentes, & exemplò Magistri ipsi quoque ad rem accommodare discent: præsertim cum subindè moniti fuerint, ubi, & quali in re adhiberi illæ debeant.

CAPUT
VII.
Sententiâ
cra.

Quia verò profanorum ferè tantum Auctorum sententiâs hactenùs adduco, nolum cuiquam sacrarum oblitus videri, quin altissimâ voce inclamo omnes nobilium Adolescentum Magistros, ut ex divino & purissimo fonte veræ sapientiæ petiras vitæ Regulas vel maximè

maximè inculcent Discipulis suis. Nam & plus fidei habent, aut certè merentur, quàm profanæ, & aliùs feriunt pectora, quia divinæ sunt, Pietatemq; melius inserunt animis: rem tantò magis urgendâ, tantoq; Nobilibus instillandam religiosius: quò illi postea in altò viventes, & à fortunâ molliter habiti, faciliùs abripiuntur ventis licentiæ, quoq; molestius plerumq; Censores ferre solent. Habeant itaq; ejusmodi intra se quasi Monitores, habeant memoriæ impressos istos Dictorum sacrorum velut aculeos, quibus animus subindè ad pudorem Deiq; reverentiâ stimuletur. De Officiis itaq; hominis erga Deum, Dominorum, erga servos, filiorum erga Parentes præcepta, quæ in sacris occurrunt, item hortationes ad Sapientiâ, Iustitiâ, Temperantiâ &c. diligentissimè illis insinuanda sunt. Ex Proverbiis præcipuè Salomonis & Syracide aliqua depromantur, quippe in quibus plurima morum & Prudentiæ præcepta continentur, omnibus Philosophorum effatis solidiora. Ut illa Salomonis: *Melior est correptio manifesta, quàm amor occultus. Noli esse amicus homini iracundo, nec ambulare cum homine furioso. Vidisti Viram velocem in opere suo, coràm Regibus stabit, nec erit inter ignobiles. Totum spiritum suum profert stultus,*

tus, at sapiens reservat aliquid in posterum. Princeps qui libenter præbet aures verbis mendacii, omnes servos habet improbos. Non decet Principem labium mentiens. Mollis responsio frangit iram. Homines derisores perdunt Civitatem, sapientes verò avertunt calamitatem. Memoria Iusti cum laudibus, at nomen Impiorum putrescet.

CAPUT
VIII.

Materia
exercitio-
rum poli-
tica.

Postquam Generosi Tyrones istis, aliisque in Diatribe explicatiùs propositis Progymnasmatibus ad majora satis præparati videbuntur, proponi illis & Rhetorices Præcepta pleniora, & exercitii causâ graviores materiæ debent, ac tales imprimis, quæ homini politico possint esse conducibiles. Seligenda itaque Problemata politica, & in exercendi styli materiam convertenda sunt. Ut ex. gr. *An otiosi in Rep. ferendi. An factiones & Dissidia inter subditos alenda. An sceptrum dandum sit Peregrino. An Legibus scriptis in Rep. opus sit. An homicidas numeratâ pecuniâ impunes dimittere justum videatur. An externus Miles ad defensionem Patriæ vocandus. &c.* Tales Quæstiones à bono aliquò & Latinitatis non negligente Autore (quales sunt Piccartus, Berneggerus, Freinsheimius, Beclerus, alii) tractatas vertant in vernaculum Discipuli, & postea sepositò Autore reducant in Latinum. Ubi sic alienis lineis insistendo aliquandiu se exercuerint, ipsimet
similium

similium Quæstionum Politicarum Decisiones, conquiritis ex Autoribus in utramque partem argumentis, faciant, politioreque Latini sermonis quasi veste induant, ac denique publicè recitent. Sic enim & diligentius sollicitiusque elaborabunt, quæ plurium auribus judiciisque submittenda esse scient, & paulatim coram majore hominum Coronâ animis imperterritis verba facere discent. Quæ res Nobilibus præcipue magnopere necessaria est. Quos haud ornat equeidem ferocia, etsi ea multis specie animositatis imponat, sed nihil magis quoque eosdem dedecet, quam Timiditas, ut contra nihil magis commendat, quam animi præsentia, nullaque in re honestâ nimis erubescens aut trepidans Generositas, seu, ut Tacitus vocat, ingenita Nobilitas. Cæterum hanc, de quâ agimus, fiduciam nulli tantam in sevit Natura, quin Exercitatione, etiam scholasticâ, augeri possit. Et eò fine in benè institutis Gymnasiis Declamationes ejusmodi & subinde quidam Actus publici, petitis ex Historiâ Materiis, distributisque velut ad Drama quoddam, in singulas Personas pensis, haberi consuevere. Possunt verò etiam in Eloquentiæ exercendæ

Animi
præsentia.

Actus pu-
blici.

exercendæ materiam antiqua, atq; etiam ficta exempla sumi. Sic Pater Horatii Romani introduci potest, miseriam suam querens, quod & filiam amiserit, & filium tam egregie de Patriâ meritum amissurus sit. Item Populi Romani Horatium à supplicio liberantis sermo representari queat. Item Oratio Matris Veturie, filium Coriolanum ab oppugnatione Patriæ dehortantis. Sed imprimis ex Polonâ Historiâ segetem declamationum peti suadeam. Ex. gr. Representetur populi Poloni Oratio Lechum II. regno exuentis, quia fratrem suum occidisset. Producat in Theatrum facinus Popieli Patruos suos nefandò facinore interimentis, sed simul quoq; poenæ illi divinitus illatæ atrocitas depingatur. Exaggeretur facinus Boleslai Audacis, qui innocentissimū Antistitē occidere sustinuerit. Parentetur Vladislao Jagellonidæ, qui malè suscepti belli culpam sanguine suo ad Varnam luit. Ex quâ Historiâ facile etiam integrum Drama confici poterit, si aliqui Consiliariorum Regis dissuadere bellum in Amurathem, alii svadere fingantur, atq; inter hos præcipuè Julianus Pontificis Legatus: si & Amurathis Oratio perfidiam Christiana-

Christianam detestantis; si deniq; nuncius omnem infelicis prælii actum & exitum referens introducatur.

Sed ista, quæ jam præscribo, non ante ^{CAP. IX.} feliciter procedere possunt, quàm in ^{Autorum} Auto- ^{legendo-} rum, è quibus Latinitas haurienda est, lectio- ^{rum scri-} ne utenq; versati fuerint discentes. Quare ^{es.} huc tempestivè illi ducendi sunt. Autores legendos, & ordinem, quò legendi sint, alibi pro viribus monstrasse mihi videor. Attamen, quia non omnium Autorum lectio, ab illis alioquin exigi solita, qui ex Eruditione vitæ præsidia quarunt, à Nobilibus postulari potest, vel debet, qui præter ceteros his commendandi sint, breviter indicabo. Ac primum Ciceronis Epistolas, sed selectas, proponi iis velim: in quibus & ipsis, quia à viro Consulari, & in magno Romani Imperii climacterico scriptæ sunt, cum multa Politico utilia occurrant, non ea tralatitiò segniq; oculò transmittenda sunt, sed quantum captus & ætas fert, expendenda, atq; in futurum post usum seponenda. Inde ad Officia ejusdem Tullii, post ad orationes pro Lege Maniliâ, pro Marcello, pro Archiâ, pro Milone, in Catilinam, & id genus

Livius
præcipue
commen-
datur.

genus alias transeundum est. Simul mox ad Cornelium Nepotem, & Cæsaris Commentarios ducendus est Tyro nobilis. Hos ubi percurrerit (neq; enim diu morantur, quia faciles sunt, & meræ quodammodo narrationes, nullis fermè sententiis Lectorem sistentibus distinctæ) ad Curtium, Justinum, Sallustium, Livium deniq; ipsum admittatur. Hic enim, etsi cæteri omnes suis dotibus suspiciendi sunt, plus cæteris animum discantis tum verborum, tum rerum exemplorumq; copiâ ditare potest: quia universam rem Romanam & varias Dominatoris illius populi vices, ancipites Senatûs deliberationes, tum acerrimas cum plebe & Tribunis concertationes aliaq; ejusmodi pari Ingeniô, judiciô & facundiâ complexus est, cum reliqui paucorum annorum particulas aut majorum duntaxat operum compendia dederint. Non est etiam silentiô transeundus Svetonius, mores aliquot Imperatorum ingenuô stylô, & eadem libertate prosecutus, quâ illi vixerunt. Atq; indè porrò cæterorum quoq; Imperatorum vitas, etsi impare seqviorum seculorum facundiâ descriptas percurrere utile erit. Neq; enim ullâ re ad vitam prudenter probeq;

probeq; instituendam animus potentiùs moveatur, quàm vitæ alienæ contemplatione. Atq; inprimis magnorum natalium homines, si æquè mentis quàm gentis generosæ sint, ad subductiorem curatioremq; vitæ rationem stimulum indè capiunt, cum nullas Principum virorum actiones ita delitescere potuisse vident, quoniam ope literarum in apicum productæ, atq; ad perpetuam illorum vel laudem vel ignominiam in magnô orbis theatrô hodieq; spectentur, leganturq;. Majore elegantia quàm veri curâ Imperatorum res gestas laudesq; descripsere Panegyristæ: adeoq; ob ipsa inprimis magnifica verborum lumina, & acutissimas sententias legi debent. Præcipue Plinius, qui omnium maximè, eximiâ quâdam ingenii & artis conspiratione id affecutus videtur, ut mirificè ubiq;, & sine damnô tamen perspicuitatis, sit argutus. Minimè autem tacitè prætereundus nobis est Seneca & Tacitus, Autores sanè magnificis ingeniis dignissimi. Nam ut ille altissimos, & quemadmodum virtutem, sic summam plerumq; libertatem spirantes sensûs pari verborum sublimitate & efficaciâ eloquitur: ita hic arcanissima hominum in-

Vitas legere per-
utile.

Panegy-
ristæ.

Seneca
&
Tacitus.

altò agentium Consilia & penè cogitata summo acumine & penetrat & effatur. Sed de his aliisq; pluribus Autoribus alibi egi accuratius.

Injurius essem in Poësin, rem divinam, si eam à studiò Nobilium prorsus exclusam vellem. Constat nobis, quanti ab omnibus olim habitus fuerit Homerus, quanti ab Alexandrò ipso, Magnò illò orbis Domitore, æstimatus. Iam Virgilii carmina in deliciis fuisse Augusto, uti & Horatii, latet profectò neminem. Et certè si non alios, hos saltèm duos à nobilibus evolvi, curæq; haberi velim. Sed inprimis Virgilii Æneida: idq; tum propter verborum lumina & Orationes passim insertas elegantissimas, tum præcipuè propter res ipsas ad Politicam plurimùm facientes. Nam in Æneâ nihil aliud nobis Poëta divinus quàm characterem pii & sapientis, sed multis periculis jactati Principis dedit: uti J. Casar Scaliger in doctissimò librò de Poëtica prolixè ostendit. Porro illa virtutum casuumq; exempla, quia numeris ligata sunt, eò facilius hærent memoriæ, adeoq; si diligenter lecta fuerint, eò proclivius, ubi opus erit, stylo & sermoni sese ingerent.

In

IN tantò verò Autorum numero, cum fieri ^{Certis Au-} vix soleat, ut omnes pari diligentia à nobi-^{toribus} libus evolvantur: eorum nonnullos utcuq; ^{præcipuè} percurri sufficit. Interim seligantur aliqui, ^{immoran-} quos assiduâ iteratâq; adeò lectione planè suos facere nobiles illi conentur: ita ut ex iis præcipua quæquè in promptu, & ferè memoriæ infixæ habeant: saltem reperire quidlibet possint, cum usus postulaverit. In delectu ipsa animorum inclinatio quodammodò seqvenda est. Alius enim hoc, alius alio Autore magis delectatur. Interim optem, ut propensio illa in Livium potissimùm, postea in Tacitum incidat. Hos si Autores, (quibus Senecam obmorum præcepta addi velim) pernoverint penitiùs, habebit semper mens, undè bonos conceptus, habebit & lingua, undè penetrantia & efficacia Orationis lumina fulminaq; haurire possit.

GRæcorum quoq; Historicorum aliqua ^{De Gra-} facienda esset mentio, quia multa habent ^{cis Auto-} egregia, inprimis Xenophon, Thucydides & Polybius. At vix audeo illos commendare Nobilibus. Non, quod non mereantur legi,

aut

aut ab aliquibus magnæ stirpis & conditionis Viris non cum fructu lectos sciam, verum ideo, quod Nobiles plerumque vix latinis Autoribus legendis debitam patientiam commodant, nonnunquam etiam ad vitam vel aulicam vel militarem ita properant, ut non nisi selectiores, neque illos totos, sed vix particulas, & sæpe nimis festinante oculo percurrant. Quod cum ita sit, satius est, in Latinis præcipue ut occupentur Autoribus: sic enim præter rerum scientiam lingvæ quoque latinæ fructum metere possunt: cum græcam rari discere soleant, imò altò plerumque supercilio, ut non necessariam, despiciant: ignari scilicet aut minus pensi habentes, sine illâ ne latinam quidem solidè disci, imò nec legitimè scribi pronunciarivè posse. Quà de re alibi monui. Si tamen Græcorum aliquem legere vel animus vel otium svadet, Plutarchi vitas imprimis commendavero, librum multifariæ frugis, & Nobilibus perquam utilem, quia magnorum virorum mores & gesta, factâ inter Romanos & Græcos contentione pulcherrimâ, cordatissimè exequitur. Vir haudquaquam umbraticus, sed magnis dignitatibus functus, & ut quidam existimant, Trajano

Plutarchi
vita.

jano quondam à studiis, jure quoque apud Agellium doctissimus atque prudentissimus dictus. De eò denique non immeritò Theodorus Gaza, cum rogaretur, si necesse esset libros omnes in mare præcipites dare, quem postremò projecturus esset, respondit: Plutarchum. Quocirca, si etiam græcum cui non libeat legere, latinum tamen (cum sat benè à Xilandro versus extet) legendum censeo.

Nominavi non paucos Autores, quorum lectionem frugiferam fore Nobilibus certus sum: & restant tamen alii, quos haudquaquam puto negligendos, præcipue ex recentioribus. Ac primum ut totius historiæ quoddam Compendium, & velut Enchiridion, quod ubique secum ferre possint, habeant, præter Tursellinum mirè tersum, sed perbreve, Cluveri Epitomen, ut sibi familiarem reddant svadeo. Quia illa omnem ferè meliorem antiquioris historiæ succum exhaustit, adeoque ea, quæ sparsim in Historicis lecta fuerint, in memoriam revocare potest: plerumque etiam verba bonorum Autorum retinet, ut stylo quoque lectio libri illius non poenitendum afferre adjuvamentum possit. Cum tempus esse privatus studio-

CAPUT
XII.

De Auto-
ribus re-
centiori-
bus.

studiorum Director judicabit, ad alios quoque recentioris ævi Autores ducet generosos discipulos suos. Sed primum eos seliget quorum dictio puræ latinitatis sit, adeoque eloquentiæ studio provehendo utilis esse possit: quorum non paucos anni superiores & tempora nostra effudere. Nominare eos hic nihil attinet, cum alibi in *Epistolâ de eloquentiæ studiô* id operose fecerim. Hoc tantum monere hæc occasione velim, malè sibi studiis suis illos consulere, qui intra veterum unicè Historiarum lectionem consistunt, recentiorum & domesticarum rerum incuriosi. Undè fit, ut tales plerumque in antiquis & longè remotis oculati, in suis cæci, vereque adeò peregrè domestici, domi peregrini sint. Cum cuique patriæ suæ & seculi sui res scire maximè necessarium sit, & antiquos non aliò fine legere oporteat, quàm ut, quæ olim gesta sunt, ad præsentia accommodemus. Porro non principum familiarum vincula, nec Regnorum Provinciarumque inter se necessitudines, vel controversitas, bellorumque adeò iura scire quisquam (cum tamen vir nobilis & politicus ista ignorare non debeat) possit sine diligente recentiorum Autorum lectione. Undè

Utile est
legere
propiora
seculo no-
stro.

Undè viros illos, qui in Rep. plurimum possunt, non minùs in Comineò, Paulò Æmiliò, Bonfiniò, Cromerò, Gvicciardinò, Thuanò, Stradâ, Gramondo, Maroceno qui Venetam historiam, Bentivolio qui Belgicam, Amirato, qui Florentinam, Malavoltâ qui Senensem, Emmio, Vinsemio, qui Frisiam scripsere, & ejusmodi aliis versatos scio, quàm in Curtiò, Vellejò & aliis ejusmodi antiquæ monetæ Autoribus. Multi inter alias summas utilitates, hanc quoque ex peregrinatione hauriunt, quod dum peregrè in gentium externarum lingvis se exercere cupiunt, libros earum vernaculos atque inprimis historias evolvunt, magnò sanè in omnem vitam emolumentò. Hinc fit, ut qui industrii sunt & rerum suarum satagunt, Italorum, Gallorum, Hispanorum, Anglorum, Belgarum, Autoribus lectis non lingvas tantum istarum gentium addiscant, sed rerum etiam apud illas gestarum non poenitendam secum domum peritiam referant.

CÆterum ut Medico vel Seplasiario latissimos & salutarium herbarum fertilissimos campos hortosque perlustrare nulli rei fuerit, nisi eas plantas, quas usui medico idoneas putet,

CAPUT
XIII.

Excerp-
pendi In-
dustria
commen-
datur.

putet, decerpat, colligatq;: ita lectio plurimorum Autorum nihil profuerit, nisi exerpenti diligentia accedat. Solet nonnullis Labor iste fastidio atq; odio penè esse, quidam & memoriae fidunt, & prout id, quod legunt, dum à lectione recentes sunt, meminisse se vident, ita perpetuò id animo hæsurum credunt. Sed plerosq; fallit opinio, & rerum aliarum subinde imaginibus oblati oblitterantur priores: rapitq; oblivio identidem optima quæq; & memoriâ dignissima. Omnino igitur Plinium imitari oportet, quem Plinius Junior nihil legisse testatur, quod non exciperet.

CAPUT
XIV.

Excer-
pendi mo-
dus osten-
ditur.

EXcerpenda autem tum verba & phrasæ sunt, tum res. De verbis, quomodo, & quæ excerpenda digerendaq; sint, alibi monui. Circa res paulò major difficultas est. Ego primum ordine omnia memorabilia, sive sententia sit eximia, sive iudicium de re aut personâ, sive exemplum virtutis vel vitii, sive omen, sive monstrum, sive casus, sive stratagemâ, sive institutum gentis singulare, sive calamitas publica, sive ritus, sive structura aliqua, singularis & alia ejusmodi ordine, prout quidq;

quidq; occurrit, in libro ad id comparato connotari, & in margine Titulum addi sive Tituli. Interim alius Liber concinnetur, cui (donec aliundè quid accuratius suggeratur) Tituli ex Kerkermannianis, qui nimium multi & operosi esse videntur, selecti contractiq; inscribantur, & sub his ea, quæ ante raptim & sine ordine discens congefferat, adhibita accuratiore diribitione collocentur.

Quibusdam Cl. Viri Berneggeri consilium & exemplum placet. Qui vir Politicæ Lipsii, quam familiarissimam sibi reddiderat, adeò ut nihil in eâ ipsum lateret, chartam mundam inseruerat, ibiq; annotabat, quicquid in Autoribus ad textum Lipsii faciens reperiret. Sed tum tamen in fine Libri locus relinqvendus erit multis rebus, quibus intra Librum annotandis ex Lipsiano textu nulla erit occasio: Cum Lipsius Principem formet, & quid in Monarchico statu fieri soleat debeatq;, doceat potissimum: casuum, structurarum, calamitatum publicarum, plurimarumq; similium rerum istic non fiat adeò mentio neq; fieri potuerit.

CAPUT
XV.

EGo præterea nobilem, cui, si aptus sit, frequentem subinde in publico dicendi campum

F

In Lectio-
ne de pra-
xi & usu
mox cogi-
tandum.

campum mos patrius suppeditat, optimè sibi consulere autumo, si quoties aliquid egregium in Autore legit, illicò cogitet, ubi id sibi olim in luce publicà ad Orationem decorandam utile esse possit. Ut rem istam tantò vel commendatiorem, vel perspicuam magis reddam, lubet præire, & lineas aliquas pingere, quas æmulari deindè Juventus poterit. Si ex. gr. in Senecà leget sententiam: *Omnis dies, omnis hora, quàm nihil simus, ostendit, & aliquò argumentò recenti admonet fragilitatis oblitus; cogitabit illicò, fore ei aliquando locum in Oratione funebri.* Cùm apud eundem illud occurrit: *Eripit se, aufertq; ex oculis perfecta virtus, nec ultimum tempus expectant quæ in primò maturuerunt,* veniet mox in mentem id usurpari posse, si de magnò aliquò sed præmaturè mortuo Juvene loquendum sit. Cùm apud eundem Senecam illud incidet: *Idem huic Urbis dominandi finis erit, qui parendi fuerit, id locum habiturum reputabit, si quando ordines ad obsequium legum hortari voluerit.* In Interregno si de Electione festinandà loquendum sit, illud Taciti non incommodè usurpari posse reputabit: *Hoc Imperii corpus stare ac librari sine Rectore non potest.* Si svadendum vel excusandum bellum, non importunè se aliquandò illud Livianum obtulerit:

Iustum

Iustum est bellum, quibus necessarium est, & pia arma, quibus nulla nisi in armis spes relinquitur. Si calamitoso Reip. tempore Civibus svadendum sit, ut Conditiones aliquas iniquiores accipiant, non ineptum fuerit illud Alconis apud Livium usurpare: *Hæc, quanquàm gravia atq; acerba, Fortuna nostra nobis svadet.* Si Clementia Principi svadenda, gratiam quandoq; inveniet Senecæ illud: *Maxima Regi gloria est, si vim suam continet, si multos alienæ iræ eripuit, neminem suæ impendit.* Item Tiberii prudentissimavox apud Tacitum: *Omittere potius prævalida & adulta vitia, quàm illud assequi, ut palam fiat, quibus flagitiis impares simus.* Huc etiam aliqua conducent ex Oratione Roderici Gomeſii, quæ est ap. Strad. Dec. l. VI. Si de Principis assiduitate, & laborib⁹ indelassatà diligentiâ verba facere res ferat, haud indecens erit illud ex Panegyrico ad Theodosiū: *Gaudet divina perpetuò motu, & jugi agitatione se vegetat aternitas, & quicquid homines vocamus laborem, vestra natura est. Ut indefessa vertigo cælum rotat, & maria æstibus inquieta sunt, & stare sol nescit: Ità tu, Imperator, continuatis negotiis in se quòdam orbe redeuntibus semper exercitus es.*

Tales geminulæ cùm in Autoribus occurrunt, adeò non oscitanter transeundæ sunt, ut illicò, quemadmodum paulò ante monui, de earum tempestivò usu meditandum, & quò

suo tempore facilius ad nutum sint, suis locis singulæ reponendæ sint. Quò fine svadeo, ut tituli materiarum in publicò crebrius obvenientium habeantur, sub quos lumina ejusmodi referri possint. Occasiones autem & argumenta Orationum usitatiora ferè hæc sunt. Pri-

Nuptiales materia. mò circa Sponsaliorum & Nuptiarum solennia: ubi de laude conjugii, de dotibus Sponsi Sponsæq; dici aliquid, postremò deniq; pro fausto successu Nuptiarum votum addi solet. Possunt hic locum reperire sententiæ nonnullæ de Amicitia: ut ex. gr. *Qui Amicum invenit, thesaurum invenit. Nulla est Amicò pulchrior possessio. Solem è mundo tollere videntur, qui amicitiam de vitâ humanâ.* Item de laudibus bonarum conjugum, qualis illa sacra est. *Vxor bona est columna aurea super bases argenteas. Mulier bona Corona est Viro suo. Eccles. 5. Gratia super gratiam mulier sancta & pudica. Eccles. 16.* Item Horatianum illud:

Felices ter & amplius!

Quos irrupta tenet Copula, nec malis

Divulsos qverimoniis

Supremâ citius solvit amor die.

Si quis uberem materiarum ad Nuptias pertinentium farraginem qværit, consulat *Oratorem Extemporaneum* nuper editum, à pag. 189. usq; ad

ad pag. 268. Si de Principis alicujus nuptiis agatur, requirendi ejusmodi actus sunt in Historiis. Vide inter alia deliberationes & apparatus circa Conjugium Alexandri Farnesii ap. Strad. l. IV. mihi p. 211. edit. minutæ anni 1636. Vide item Legationes de Matrimoniis inter Principem Andinum & Elisabetham Reginam, apud Cambdenum in historiâ Elizab. sub anno 1581. Alterum genus est Funebrium, in quibus plerumq; aliquid de conditione humanâ præmittitur, postea genus & virtutes Defuncti enarrantur. Ad utrumq; hoc plurima observare annotareq; poterunt, qui istuc, dum Auctores legunt, volent advertere animum: & aliqua paulò ante in specimen attuli. Labet tamen pauca adhuc addere. *Quomodo fabula, sic vita, non quàm diu, sed quàm benè acta sit, refert. Sen.*

Ut tibi mors felix contingat, vivere disce;

Ut felix possis vivere, disce mori.

Non est mala mors putanda, quam bona vita præcessit.

Mors vitam intermittit, non eripit. Senec.

Nullum est majus solatium mortalis, quàm ipsa mortalitas.

Et: Ingens mortalis solatium est, terram quandoq; videre mortalem. Vide multa ejus notæ in *Orat. extemporaneo* p. 308.

Vide etiam Vossii *Rhetoricam* maj. l. III. p. 412. Et *Palatium Eloquent.*

PP. Mo-

Concilia-
torie.

P. P. Mogunt. p. 739. seqq. Postea sequuntur Conciliationes vicinorum, vel magnorum in Republ. Civium: quam ad rem, uti multa opportuna Autorum lectio suppeditabit, ita illud Metelli apud Livium servire poterit: *Non possumus non vereri, ne tantum Reip. profit, quod omnibus bonis egregie placetis, quam, quod alter alteri displicetis, noceat.* Item Taciti illud: *Fas est privata odia publicis utilitatibus remittere.* Nonnunquam tempora ferunt, ut milites tumultuantes, & vim Patriæ inferre molientes oratione demulcere necesse sit: tum haud pauca utilia suggeret Oratio Germanici ap. Tac. Annal. l. I. c. 42. Othonis apud eund. Tac. l. Histor. Vide etiam Orationem Escovedi ad Hispanos seditionem in Belgio molientes ap. Stradam l. IX. edit. minut. pag. 593. Si Poëtas quoque adire lubet, vide Julii Cæsaris Orationem ap. Lucan. l. V. in qua Cæsar præfractius agens cum milite ferociente, permittit ei ut abeat, si ita lubeat, se nolle talibus debere fortunam suam. Milites verò ad prælium animandi plurima tam in antiquis, quam recentibus Historicis exempla extant. Vide Scipionis & Annibalis Orationes in Liv. l. XXI. c. 40. 41. item Valerii Corvini lib. VII.

Militem
animandi

lib. VII. hoc initio: *Facta mea, non dicta vos milites sequi volo, &c.* Ap. Tacitum in Vitâ Agr. extant duæ insignes, una Galgaci, altera ipsius Agricolaë. Consule etiam Ivas. II. Senecæ Patris, vide & ap. Stradam Osorii Ulloæ lib. VIII. mihi pag. 546. hoc initio: *Ecquid videtis, Commilitones.* Vide denique ap. Lucanum l. II. Orationem Pompeji militem suum adversus Cæsarem animantis.

In Comitibus quæ occurrunt Materiæ, vix numero comprehendi possunt. Usitatiores tamen hæ sunt: Salutari primò omnium Princeps solet nomine Nobilitatis, & si negotia publica non infeliciter cesserint, pro curâ & amore in Rempubl., pro re benè & fideliter gestâ sollemniter & magnifico verborum apparatu gratiæ agi consuevere. Quam ad rem non sterilis colorum feges suppetet illi, qui in lectione Autorum, præsertim Panegyricorum, aliqua subindè selecta sibi reposuerit.

Solent quoque tum Duces militares, si quid in bello benè gestum est publicè enarrare, simulque milites, qui virtutis specimina dederint, commendare, quod & apud Romanos usitatum fuisse, cum aliunde, tum ex oratione L. Æmilii patet, quæ extat apud Livium l. XLV. So-

Comitia-
les mate-
ria.

Solet item beneficiorum, seu vacantium Reip. dignitatum honorumq; erogatio postulari, ubi de præmiis de Rep. benè meritorum agi solet. Hic istarum sententiarum usus esse potest: Eò impenditur Labor ac periculum, unde honor atq; alimentum speratur. Liv. Virtutis uberrimum alimentum honor est. Val. Max. Conferet quoq; ad eam rem aliquid Oratio Eumenis in Senatu habita, quæ ext. in Liv. l. XXXVII. Potest & illud locū hic invenire: Pessimè agitur cum Rep. ubi honores alii merentur, alii habent. Item illud Taciti XI. Annal. Apud Majores virtutis erant præmium Magistratûs, cunctisq; Civium, si bonis artibus fiderent, licitum eos petere. Utilia quoq; in rem istam monita habet illustris SAVEDRA sub Symb. 58.

Plurimus quoq; de Libertate in Comitibus sermo esse solet: Quæ inter præcipua humani animi bona, ut Galba apud Tacit. l. I. Hist. Modestè tamen semper habenda, quia plerumq; homines nec totam servitutem pati possunt, nec totam libertatem. Huc pertinet admonitio Jannini Regis Galliarum Legati, quam Ordinibus Belgicis dat ap. Baudium l. XI. de Induciis Belgicis: Moderatè utamini ingente munere ac dono libertatis: Periculosum est depositum, & velut ferrum in manu furiosi, si quis non habeat artem eam regendi, &c. Adhortatio verò ad asserendam liberta-

bertatem populi extat apud Sallustium in fragm. Hist. l. III. quam habuit Marcus Tribunus plebis: in quâ inter alia vis tribunitia telum à majoribus libertati paratum vocatur. Quemadmodum & Scyllius ap. Livium Tribunitium auxilium & provocacionem duas arces tuendæ libertatis appellat.

Plerumq; etiam Contributiones svadendæ vel dissvadendæ. Ubi svadendum Tributum est, conducet illa sententia Cerialis ap. Tac. l. IV. Hist. Neq; quies gentium sine armis, neq; arma sine stipendiis, neq; stipendia sine Tributis haberi queunt. Si de æqualitate Tributorum sermo esse debeat, consuli potest Quæstio 194. Cl. Berneggeri in Agr. Tac. Si dissvadenda Tributi exactio, vide ap. Strad. l. VII. p. 487. initium ita habet: Falli rationes Albani, qui sibi persvadeat &c. Vide & quæ habet vir Clariss. Forstnerus ad Taciti illa (lib. IV. Annal.) verba: Pacem exuere, nostrâ magis avaritiâ, quàm obsequii impatientes. Nonnunquam & bellum svadendum, quò pertinent Orationes Actii Tullii in Liv. l. III. Item Capitolini ad Pop. Rom. l. III & Camilli Exulis ad Ardeates. l. V. &c. & Attilii Reguli ad bellum cum Pœnis continuandū hortantis, in Cl. Freinsheimii Suppl. Livian. lib. VIII p. 363. Et Appii Claudii ap. eund. l. III, p. 108. Ratio-

nes pacem Belgis svadentium dissvadentiumq;
vide ap. Reidan l. VI. p. 132. & seqq. Apud eund.
extat Legatorum Belgicorum Oratio, quâ Re-
ginæ Anglorum Pacem cum Hispano dissva-
dent l. XV. p. 402. & seqq. Ejusdem argu-
menti, sed prolixior est Oratio Baudii ad Jaco-
bum Britannia Regem, quæ inter orationes
Baudianas sexta est. Si & Poëtas consulere non
grave est, videri potest in Virgilio Oratio Ale-
ctûs Furia Turnum hortantis ad bellum, *Ænei-*
dos VII. item Iridos, libro IX. Turni item,
seipsum & Socios ad bellum hortantis l. eod IX.
Apud Lucanum quoq; legi meretur Oratio
Curionis Cæsarem ad apertum bellum hortantis.

Ad dissvadendum bellum conferre potest
Oratio Nabarzanis ad Darium ap. Curtium l. V.
Metii Suffetii apud Livium, & apud eundem
Hannonis ad Senatum Carthaginensem lib.
XXIII. c. 12. & Scytharum ad Alexandrum
apud Curtium l. VI. & Parmenionis ap. eund.
l. IV. Apud Virgil. à bellò dehortatur Drances
Æneidos l. XI. & Venulus verbis Diomedis l.
eod. & Latinus Rex l. XI. & XII. Vide etiam
in Stradâ l. VI. Orationem Ferie Ducis Regi
Hispano bellum dissvadentis, item Roderici
Gomesii

Gomesii ap. eund. l. VI. pag 383. & apud Gra-
mondum lib XVIII. Orationem eorum, qui
Ludovico XIII. Galliarum Regi expeditionem
Mantuanam dissvadebant. Aliquando etiam.
Ordines Regni ad Concordiam hortandi sunt,
quò conducent illa in Livio l. III. *Discordia Ordi-*
num venenum est hujus Urbis (Reipubl.) it: Lati hostes dum
Discordis attrinimur. Tac. *Externis Victoriis aliena, civi-*
libus nostra consumere didicimus. Idem. *Quoties concor-*
des agunt, spernitur hostis ubi dissensere, dum sibi quisq;
contra emulos subsidium vocat, accitus in partem, adversum
omnes valet. Idem. Consuli præterea in hac ma-
teriâ potest Oratio Micipsæ Regis in Sallustii
Jugurthâ: item Seniorum Romanorum, tum
& Legatorum ad Plebem in causâ Decemvira-
tûs ap. Liv. lib. III.

Consultationes quoq; de belli gerendi rationi-
bus haberi consuevere. Ad quas accessuro non
obfuerit legisse ac meminisse, quæ L. Æmilius
Paulus apud Liv. lib. XLIV. ad milites pero-
rat. Item T. Quintius lib. XXXIV. & Ap-
pius Claudius lib. V. *Si unquam dubitatum est Quirites.*
Aliquando de Conscientiarum libertate ma-
teries incidit, ad quam nihil melius adferri
potest, quam illud Stephani Regis tritum qui-
dem, sed dignum, quod nulla unquam oblivio

ex animis hominum deleat: Deum tria sibi reservasse: Scire futura, ex nihilo aliquid facere, & conscientis imperare. Huc quadrat quoque illud ex Lactantio: Quis imponat mihi necessitatem vel credendi quod nolim, vel quod velim, non credendi? Et ejusdem alterum istud: Nihil tam voluntarium quam Religio, in qua si animus aversus est, jam sublata, jam nulla est. De eadem Conscientiarum Libertate multa eximie differit Vir Romano-Catholicus Petrus Matthæus in Henrici IV. Historiâ septennali l. II. mihi p. 203. editionis minoris. Plurima quoque ad id argumentum utilia habet Magnus Thuanus in præfatione operis sui historici. Sed Matthæi dissertatio digna mihi videtur, quam & ex gallico vertam, & quantumvis fustorem, huc appo-

nam. Ità verò ille: Optandum equidem esset non nisi unum Religionis exercitium inter mortales haberi. Nam in Unitate Veritas est, quæ ipsa una, sicut & Deus unus est, & summè unus. Et hæc unitas, ut Trismegistus ait, est radix & principium rerum omnium. Sed nempe torrens (dissidiorum) iste non potest sisti, & schisma hoc jam vigorem suum & robur assumpsit, quia malum inveteratum est. Deinde Deo competit Ecclesiam repurgare vel restaurare, non minus quam eandem condere. Oportet igitur, ut intra metas humane potestatis stemus homines, & triumphum victoriæque animarum sapientiæ relinquamus æternæ, quæ sola potest reformare & recoquere corda ad placitum suum, quæque tot animis devotis ac palantibus signum tollit in viam salutis redeundi. Ca-

di. Ceterum humana potestatis non est imponere necessitatis legem iis rebus, quas Deus sui juris esse voluit, ut sunt Conscientiæ: quæ adeo perinde ut cogitationes, in Politia libera esse debent. Ecclesia hæreses semper detestata est, sed Iudiciorum rigorem nunquam nisi in Hæresiarchas exercuit, idque etiam tum tantum, cum eorum in errore patuit pertinacia. Ità ut illa rationibus invicta suæ esset opinionis mancipium. Et pænæ quibus Ecclesia usa est, magis ignominiosa, quam crudeles, magis salubres, quam mortiferae fuerunt. Ac nempe eos pudore potius, quam sanguine fusò rubere maluit. Theodosius Imperator graves constituit pænas, sed eas nunquam exercuit. Maluit subditos suos ad concordiam Religionis & rerum divinarum, per æquitatem, quam per vim; metu & amore potius, quam suppliciis & immanitate attrahere. Etiam quatuor Concilia non aliis eos armis oppugnavit, quam quæ ex verbò divinò petita essent. Nec enim Nicææ trecentorum Episcoporum Conventus aliter cum Ario; nec centum & quinquaginta Patres Constantinopoli cum Macedonio, nec ducenti Ephesi cum Nestorio, nec sexcenti triginta Chalcedone cum Eutychæ egerunt. Nempe senserunt illi Hæresin esse obstinationem animæ, quæ non est subiecta tormentis corporis jugulantibus, quod supplicia magis aperiant sectas, quam suffocent, quodque mortis pænâ Hæreticis inflicta in id, nè sectatores invenirent, incidit sæpe in animos tam immobiles & moriparatos, ut morte suâ plures sibi affeclas unâ horâ reddant, quam viventes vix fecissent decennio. Constantia illorum, qui Constantiensis Concilii decreto ignis supplicium subierunt, & novissima eorum verba admirationem adstantibus movere, & hodiè usque illa asservantur recolunturque, non secus atque aliqua Sibyllæ folia. Christiani ipsi primis nascentis Ecclesiæ sculis

culis quantis execrationibus, quantis afflictionibus fuerunt obnoxii? Nonne Impostorum infamabantur titulis? nonne aëris injuriæ, sterilitates annorum, eluviones fluminum, & terræ motus ipsis imputabantur? Adrianus postea Religionis causâ congiri eos noluit. Antoninus Successor ejus vivicomburiō ple-
Et jussit eorum Accusatores. Postquàm Diocletiani & Maxi-
mini persecutiones irritæ & sine fructu esse, atq; ex cineri-
bus unius cremati hominis centum alii resurgere totò Imperiò
animadversi sunt, Successores istorum Caesarum verum esse
agnoscere, Reges non ut corporibus sic animis imperare, & fi-
dem non posse imparari: neq; convenire veritati um coactione,
neq; iustitiæ cum Crudelitate, & nihil esse tam voluntarium
quàm Religionem. Pagani Principes tolerarunt Christianos.
Decius armorum & Legum gloriâ inter magnos Principes nu-
merari meruisset, si in Christianos fuisset moderatior. Chri-
stiani Principes pariter tolerarunt Paganos, neq; videmus Pa-
ganismum ab illis usquàm punitum fuisse. Honorius & Theo-
dosius, etsi promovendæ suæ Religionis zelò arderent, tamen
Paganos per vim ad Christianam fidem converti noluerunt, quin
imò Iudicibus & Præfectis Provinciarum interdixere, nè tur-
barent illos, dum quieti, & in obsequiò legum viverent. Ju-
dei etsi irreconciliabiles inimici Ethnicorum, & Deorum, quos
Ethnici colerent, multitudinis, magnâ tamen securitate inter
Græcos, Parthos, Medos, Elamitas, Mesopotamios habitarunt.
Neq; Romanò Imperiò ejecti sunt, quin imò semper Synagogas
istic suas habuere, præcipuè sub Nervâ & Antoninò Impera-
toribus. In Galliâ quoq; tranquille vivere, & postea inde non
propter Religionem, sed propter usuras & immania facinora
ejecti sunt. Certum est itaq; Principes prudentes nunquàm
morti adjudicasse subditos, ut fidei ipsos adungerent, nunquàm
bello

bello destruxisse Provincias, quò Conscientias gladio instruerent.
Agnoscere potius Religionem esse unionis & Concordiæ opus,
bellum verò non constare nisi seditionibus & everisionibus Re-
gnorum. Undè adeò illi etiam, qui nostrò seculò Cælum terræ
miscuerunt, ut subditos suos sub ejusdem Religionis obsequium
redigerent, destitère tandem ab inceptò, repudiaruntq; Con-
siliū illorum Medicorum, qui in quolibet morbo curando
antimonium adhibendum, & venas secandas putaverunt.
Hactenus P. Matthæus.

Quod si contingat aliquando capite suò
Remp. privari, tum verò ut conventus pluri-
mi, ita varia in publicò differendi frequentior
campus est. Tali enim tempore fieri sæpè so-
let, quod Augustò deficiente Romæ: Ade-
rat, inquit Tacitus, finis, & spes novæ; pauci Bona
libertatis in cassum differere, plures bellum pavescere, alii
cupere, pars multò maxima imminentes Dominos variis rumo-
ribus differebant. Tum de securitate publicâ ser-
mo haberi solet, nè rerum transitus novis hostium
conatibus fiant opportuni. Solet quoq; agi de Legum
veterum correctione, stabilitione, vel, si quæ
violatæ sint, restitutione in integrum. Quâ
occasione multæ liberiores censuræ nonnun-
quam audiuntur. Hoc esse tempus, quo Aquilæ Sar-
maticæ senectus, redditâ quasi juventute, revivescere possit.
In manu jam civium positum, agrum Reip. corpus à vitiosâ
humorum liberare saburrâ, & vulneribus, si quæ illata sint,
medicinam

medicinam afferre. Legum optimas, & præcipua libertatis jura inter regnorum partum esse, & similia. Servire huc quoque; queat quod Galba apud Tacitum I. histor. ait: *Utilissimus ac brevissimus bonarum malarum rerum delectus est, cogitare quid aut nolueris sub alio Principe, aut volueris.* Tac. I. Hist.

De Legibus non mutandis Vid. Sædram in symb. XXI. mihi pag. 163. & Stradam I. V. mihi p. 243. Sed ibidem alia quoque; Oratio mox additur de iisdem Legibus ad præsentium temporum usum flectendis. Quod pertinent illa ex Tacito: *Non omnia apud priores meliora. Et: quod hodie exemplis tuemur, inter exempla erit.*

De Electione novi Capitis cum fiunt verba, plerumque; ostendi solet, quam felix sit Resp. quæ non unius familiæ hereditas sit, ut Galba ap. Tacitum de Romanâ loquitur. *Optimam esse publicæ rei consulendi rationem, si imperaturus omnibus eligatur ex omnibus.* Plin. in Paneg. Si ex defuncti Principis stirpe eligendus quis videatur, servient illa: *Minori discrimine sumi Principem, quam quæri.* Non abluunt verò ab hoc argumentò, quæ apud Curtium lib. X. Perdiccas, & post eum alii, mortuò Alexandrò, super constituendò Successore, quæ item Clodius Albinus ap. Iulium Capitolinum disserunt, tum & quæ Barclajus in.

in Argenidos lib. I. sub nominibus Anaximandri, Lycogenis, Dunalbii, Nicopompi in utraq; partem disputat. Postquam suffragia in unum quempiam Regni Candidatū consensere, tum destinantur aliqui, qui nomine Nobilitatis deferant Imperium Candidato. Huc aliquo modo quadrare videtur Oratio Leonini, nomine Belgarum, Regi Galliæ Provinciarum fœderatarum Imperium deferentis; sed sunt in eâ quædam nimis submissa & abjecta, nec nisi summè periclitanti Reip. conveniunt. Oratio autem illa extat in Reidano I. IV. p. 64. Exstat item ap. Stradam. dec. II. lib. 5. Solent deinde, Candidati quoque; nomine, pro Electione gratiæ agi Ordinibus Reip. Id quod in novissimâ Regis Casimiri electione splendidissimò sermone fecit Illustriss. Comes Boguslaus Lescinius Regni nunc Ærariò Præfectus. Huc quoque; quoad anten^o pertinet Alenzonii Principis Galli Oratio, quam Antverpiæ habuit, cum Ordinibus fœderatis pro commissâ sibi rerum summâ gratias ageret. Extat verò illa apud Reidanum de rebus Belgicis sub initium lib. III.

Postea in Coronatione, magnificâ plerumque; Oratione Princeps à Nobilitate excipi solet. Ubi

explicari consuevit, quantus electo Regi à Deo contigerit honos, sed quantum simul etiam onus. Huc facere possunt illa ex Seneca: *Omnium somnos Regis vigilantia defendit; Omnium otium illius labor. Omnium delicias ejus industria. omnium vacationem illius occupatio.* Sed simul quoque Fiducia exponitur: quam habeant cives de Principe: Fore nempe illum patriæ in subditos affectu, uti ipsum non tam supra se, quam pro se esse sentiant. Ita ad illum, tanquam ad clarum & beneficium sidus certatim advolaturos (cives,) obicere se pro illò mucronibus insidiantium paratissimos &c. Quæ verba ex Senecæ libro de Clem. deprompta olim J. Lipsius explicanda sibi sumpsit, cum illum Albertus & Isabella Austriaci in magnò Procerum conventu audire publicè voluere. Denique vota adduntur, & perpetuæ prosperitatis comprecationes. Quam ad rem servire possunt illa ex Plinii Paneg. *Te, ô summum Numen, precor, ut beneficiis tuis faveas, tantisque addas muneribus perpetuitatem.* Item ex Sen. ad Polybium ista, sed cum judicio correctâ, atque ad rem accommodata: *Dii illum. Deaque omnes terris diu commodent, &c. Abstine ab hoc manus tuas fortuna, nec in isto potentiam tuam nisi eâ parte quâ prodes, ostende.* Item antiquum Votum: *Augusto felicior, melior Trajanò.*

Porrò ad Legationes quoque identidem nobiliora.

biliora ingenia adhiberi solent. Quibus ad tam ^{Materia} arduum munus ritè suo tempore preparâdis ex- ^{Legationum.} pediet legisse brevem dissertatiunculâ Barclaji, quæ extat lib. V. Argen: hoc initio: *Nullam suorum negotiorum partem cautiùs exigebat Meleander, quam deletum eorum, quibus ad externos Reges aut populos legationem concrederet, reputans illos venarum instar esse, quæ pro suo habitu occultam salutis aut morbi vim ex diverso tractu terrarum inspirarent in patriam, &c.* Sed cum extent de Legatorum officio libri singulari curâ à Chokiero & Marselario scripti, ii præcipue cum curâ, ubi res requireret, evolvendi erunt,

Materiæ verò Legationum variæ sunt. Illis quippe contestationes Benevolentiae aliis Principibus deferri moris est, tum & de fœdere novo ineundo, vel veteri confirmandò, auxiliò vel poscendò vel ferendò, de Matrimonio, Pace tractandâ, aliquando verò de Injuriis expostulandis, rebusque repetendis, aliisque id genus agi solet. Ad quæ omnia ex historiis multa utilia maturè seponi possunt. Auxilium petunt Campani a Senatu Rom. ap. Livium l. VIII. item Samnites ab Hannibale adversus Romanos lib. XXII. Petitio Pacis extat apud eundem Livium lib. XXX. ubi Annibal Scipionem ad pacem invitat, & apud Curt. l. IV.

ubi Darii Legati cum Alex. M. de pace tractant. Tractationem Pacis si quis disertè lateq; descriptam legere velit, legat Baudii librum de Induciis belli Belgici, ubi multa pro Pace & contra Pacem ineundam afferuntur. Vide potissimum pag 62. lib. prim; edit. anni 1629., ubi contra pacem differitur. Pro pace, verò pag. 70. & seqq. Svasio foederis ineundi extat ap. Livium l. XLI., ubi Xenarchus societatem cum Perseò Rege ineundā esse diserit. De foedere violatò expostulat cum Feciale Romanorum Cl. Pontius Samnis ap. Liv. lib. IX. Item Q. Martius cum Perseò Rege lib. LXII. Et Hiero Rex Syracusanus in suppl. Livianis. Cl. Freinshemii l. VII. mihi p. 237. Expostulatorias Legationes Reginae Angliæ ad Ordines Belgii foederatos, & vicissim, vide in Reidano l. VI. & l. VII.

Sæpè etiam Legati in id mittuntur, ut inter Principes vel Statûs dissidentes gratia & amicitia stabiliatur. Sic Stephanus Rex Poloniae olim Christoph. Closkovium ad Ordines Belgicos, illos cum Rege suò reconciliandi causâ allegavit. Quâ de re vide Stradam l. VIII. mihi p. 457. Sigismundus quoq; III. ad eosdem misit.

Sed

Sed eam Legationem ut ingratam tum Ordinibus acerbioris stylo persequitur Reidanus l. XIV. mihi p. 372. & seqq.

Verum quis omnes in publicò dicendi materias exhauriat? cùm rerum vices & negotiorum publicorum varietates propè infinitæ sint, & de singulis ferè loquendi potestatem, occasionem, imò & necessitatem sæpè faciat nobili viro ratio Reip., in quâ ordo Equestris ad maximas & intimas consultationes, deq; publicis rebus disceptationes admittitur vocaturq;.

IN his autem, quæ attulimus, sunt quædam, ^{CAPUT XVII.} quæ verbis iisdem vernaculæ Orationi, si ^{Cautio-} emphatica & acuta sunt, inseri possunt, alia ^{nes in al-} si inseri vel non possunt, vel non merentur, ^{legando.} occasionem tamen campumq; dabunt ad meditandum ea, quæ ad rem præsentem accommodata videantur. Illud porrò non necesse esse puto monere, quod quemq; iudicium & experientia suò tempore satis docebit, sententiarum, quæ in Autoribus placent, non omnia verba, uti in Autore habentur, religiosè servanda, inq; publicum afferenda omnia esse. Demi enim atq; etiam mutari aliquid potest, prout res nata postulaverit. Nonnunquam magis

Autores
publicè
non alle-
gandi.

Oratio-
nes & E-
pistolæ
magnæ
in
Rep. Ci-
vium dili-
genter le-
gendæ.

magis alludere ad istiusmodi dicta Autorum, quàm allegare ea convenit. Autores quoque ipsi non sunt facilè nominandi publicè, quia ea res scholam nimium sapere, atque apud nonnullos cavillum incurrere solet. Sed, ut dixi, arena ipsa optima hinc cuique dicendi Magistra erit, & antequàm in eam ipse descendat, audire alios in publicà Regni palæstrâ probatos, legere etiam Virorum in Rep. clarorum epistolas & sermones, (qui magnâ curiositate in Polonia à diligentibus conquiri colligique solent,) expendere eosdem cum curâ, atque ad eorum se exemplar decorâ æmulatione componere, si rectè sibi consulere volet, debet.

CAPUT XVIII.

Varia ra-
tiones a-
euendi
iudicii,
& condi-
endi ser-
monis.

Non autem ad Orationes tantum in publicò habendas accingere se Nobilem oportet. Ea quoque subsidia maturè sibi comparare debet, quæ in quovis congressu, inque omni civili cum aliis & negotiò & consuetudine gratiam existimationemque ipsi conciliare possunt. Quam ad rem non Prudentiâ tantum & Iudicii sagacitate, neque Comitatus modò, quâdamque suavitate morum opus est, sed requiritur simul, ut sermones suos aptis condimentis cuiusvis meliori palato attemperare discat futurus Politicus.

Politicus. Iudicii autem limandi occasiones, tum & orationis condimentorum segetem ipse quidem usus benè natis Ingeniis suppeditat, & ex convictu frequentiorique cum viris dignitate & doctrinâ insignibus consuetudine, multa utilia & rara hauriri possunt. Et ista cum a talibus capiuntur, fortius plerumque penetrant, penitusque insident animis capacibus. Cum ea porro in congressu aliquò in usum adducuntur, longè magis aures ac corda audientium arrigunt, quàm quæ ex libro qualicunque deprompta afferuntur. Memini sanè ipse, me præsentè, attentissimè, nec sine singulari animorum motu auditos esse viros generosos, cum Radzivilliorum, Zbarasciorum, Zamościorum, Lesciniorum, Coniecpolsciorum, similiumque in Rep. celebrium Heroum dicta & Iudicia privatim aliquando à se audita, concinnè & tempestivè allegarent. Eò major felicitas judicanda est eorum, quibus in ejusmodi, sapientiâ, experienciâ, honoribusque eminentium Virorum interiorem necessitudinem datur pertingere: ubi scilicet & iudicium & sermones & actiones suas formare discant. Eò etiâ sollicitius nobilium Adolescentum Parentibus atque

Edu-

Conver-
satio & u-
sus ipse
optimus
Magister.

Educatorib⁹ huc enitendū est, ut quę publice lucis capacia esse senserint ingenia, iis illustris ejusmodi & sapientis contubernii ac consuetudinis celebrioris copiam atq; usum concilient. Considerari hanc in rem meretur prudentissimi Historici Philippi Cominei judicium, qui Ludovico XI. Galliar. Regi plurimum profuisse ait, quod deserto Patre, apud Philippum Burgundiæ Ducem sex annis vixisset: neq; illum ex tot difficultatibus emersum fuisse existimat, si in Galliâ, more solito, fuisset educatus. Huc quoq; spectat Virgilius, cum Pallanta ab Evandro Patre ita Æneæ commendatum refert:

— — Sub te tolerare magistro

Militiam, & grave Martis opus; tua cernere facta

Advescat, primis & Te miretur ab annis.

CAPUT
XIX.

Sed si quis de vitæ politicæ ornamentis tempestivè cogitare incipiat, potest lectio quoq; bonorū Autorum multa ad eam rem pertinentia suggerere. Huc autem quadrant præcipuè, quæ brevia sunt, & simul acuta, nervosa, atq; insigni aliquâ elegantia conspicua. Brevia, ut memoriâ comprehendi, & ubi occasio est, sine labore atq; hæsitacione reddi possint. Acuta atq; insigniter pulchra esse oportet, quò & judicium legentis acuant, & animos afficiant

cient audientium. Quod efficere vulgaria & trita nequeunt. Præcipuè autem huc præter sententias nervosas, de quibus antè satis dictum, conducunt *Adagia*, non vernacula tantum, quæ ^{Adagia.} in Lingvâ Polonicâ utili labore collegit explicuitq; Cnapius; sed & gentium aliarum, quæ in singulis ferè lingvis exstant. Utinam aliquis præcipua & selectissima quæq; ex omnibus aut certè præcipuis lingvis, ac potissimum ea, quæ pluribus nationibus communia sunt, in unum Volumen colligeret! Conducunt quoq; huc *Apophtegmata* ex iis, quæ Erasmus ^{Apo-} & post eum Lycosthenes, Beyerlingius aliiq; ^{phibegmata.} collegere, selecta. Et utilem eâ in re operam navavit Gerardus Tuningius, qui præstantioribus Græcis Latinisq; Italica, Gallica, Hispanica addidit: multa egregia istic complexus, multa etiam utilia iis, qui Lingvarum illarum peritiâ tantum valent, ut intelligere ea, tantum & judiciò, ut aptè applicare, & scenæ accommodare possint. Addere his expediet Æliani historiam variam, Attica Bellaria Pontani, & Epidorpidas Casp. Ens. Plurimum porrò ad rem, quam nunc agimus, conferunt *Similitudines*, quales multas ex Cicerone, Plu- ^{similia.} tarchò,

tarchò, Senecà, Pliniò, aliisq; Autoribus colligere boni Autores, imprimis autem Erasmus & Lycosthenes. Nos quoq; hos secuti, similia non pauca, aut talium saltem materiam infra in Politicâ naturali, etsi obiter, & aliud quasi agentes, dabimus. Sed nonnunquam, integras similitudines adducere tædiosum aut ineptum, commodè verò atq; eleganter ad eas alluisse perdecorum fuerit. Ut, si de aliquò Generoso Juvene dicere velis, eum non refugere aspectum hominum & lucem publicam, possis simili hoc exprimere. Sicut Aquilæ genuina proles solem inconnivis oculis intueri potest: sic iste nullam celebritatis lucem reformidat. Sed per *Allusionem* brevius hoc expediveris, ita scilicet: Nullum publici solis fulgorem reformidat generosus iste aquilæ pullus. Ejusmodi allusiones ad Mythologiam etiam aliquam veterem, vel Ritum, vel Historiam, cum fiunt aptè, multum cuilibet sermoni gratiæ & Veneris addunt. Ut, si seditionem perdomitam dicere volens dicas: Cessit tandem Hydra ista Jovi nostro: Item, si de belli alicujus periculosi initiis loquens nobilis dicat: *Transimus Rubiconem.*

Com-

Commendant etiam sermonem scriptio-
nemq; *Paronomasiae* elegantes & appositæ; ut, si cum Alphonso dicas: *Fœnus est funus animæ.* Et cum Lipsiò: *Quò magis lata, eò magis lata erit epistola.* Item: *Tu vide, ride, & Satyram pro nostrâ Satyrâ contra saturos istos scribe.* Item: *Laudet potius, quam ledat.* Item: *Sine crimine discrimen.* Item: *Patior, ut petiar.* Minimum decet libere, cui nimium licet. Ego rumorem parvi facio, dum sit, rumen quò impleam. Sub luce lues: quod à stellione ad adulatorem transfert magnus Sædra symbolo 48. Ornant quoq; *Oxymora*, ut in illo.

Nescire velle, quæ Magister optimus

Nescire nos vult, erudita inscitia est. Et in isto:

Gratia, quæ tarda est, ingrata est.

Cum quò convenit illud Augustini. *Deus melius scitur nesciendò.*

INter alias verò poliendi judicii quasi limas, *Sermonumq; civilium elegantias* non minus locum invenient *Elogia*, seu breviter & acuta judicia de viris, qui seu togâ, seu sagò id affecti sunt, ut crebra de iis mentio in colloquiis confessibusq; fiat. Nam ob id ipsum quòd frequenter in ore esse solent, tantò crebrior occasio offertur proferendi id, quod de quòq; singulare sciveris. De Catone Majore Livii hoc judicium est: *In hoc virò tanta vis animi & inge-*

Oxymora.

CAPUT
XX.
Elogia.C
Catons
vult

(2)
Catonis
altrius

Savantius
Thimianus
Chypharus
eloquentis hunc
Cato Perius
omnium bonar
artium magis
a Plinio appel
latus

nii inerat, ut quocumq; loco natus esset, sibi ipse fortunam fa-
cturus videretur. De altero Catone ita Sallustius:
Esse, quàm videri bonus malebat: ita quò minus gloriam
petebat, eò magis assequebatur. Hujus Catonis mores
prolixius paulò sed eleganter describit Lucanus:

— Hi mores, hæc tunc immota Catonis:

Seçta fuit, servare modum, finemq; tenere,

Naturamq; sequi, Patriæq; impendere vitam,

Nec sibi, sed toti genitum se credere mundo. &c.

Paulò post:

Iustitiæ cultor, rigidi servator honesti.

(3)
Pompeii

De Pompejò Magno Sallustius: Oris probi, animò
inverecundus. Quod de ore probo ait, quò rectius
intelligi possit, addere lubet illud Senecæ Ep. II.
Nihil, inquit, mollius erat ore Pompeji: alterum de ani-
mo inverecundo illustrius fit testimoniò Ta-
citi, qui de illò ait: Occultior Pompejus, non melior.
De eòdem memorabile est, quod Seneca l. V.
de Beneficiis habet: Pompejus, inquit, Populum Ro-
manum eò redegit, ut salvus esse non posset, nisi beneficio servi-
tutis. De Syllâ idem Seneca: Patriam durioribus re-
mediis, quàm pericula erant, sanavit. De Mariò Pater-
culus: Vir quantum optimus bellò, tantum pace pessimus.

Potissimùm verò de præcipuis Imperatori-
bus notanda sunt, quæ apud Autores occur-
runt, judicia, ut, quod de Juliò Cæsare Livius
dixit,

dixit, allegante Sen. Nat. Quæst. l. V. In incer-
to est, utrum cum magis nasci Reip. profuerit, an non nasci,
& quod de eodem Gyraldus: Unus mihi ceteros
& pugnando & scribendo vicisse videtur Cæsar. De Au-
gusto vulgatum illud est: Aut nunquàm debuit na-
sci, aut nunquàm mori. De ejusdem Clementiâ
eleganter Seneca: Dare illum pœnas apparebat, cum
exigeret. De Tiberiò tritum est illud, ex nomi-
ne leviter immutato: Biberius Caldius Mero. Et quod
recentiorum quispiam: Nunquàm magis hostis, quàm
cum blandus: De eodem antiquus aliquis apud
Sveton:

Aurea mutâsti Saturni secula, Cæsar,

Incolumi nam Te ferrea semper erunt.

De Cajo Cæsare Svetonius acutè judicat,
nec servum meliorem ullum, nec deteriozem Dominum fuisse.
De eòdem Sen. Consol. ad Helviam: Hunc mihi
videtur rerum natura edidisse, ut ostenderet, quid summa
vitia in summâ fortunâ possent: Et idem alibi: Sub Cajo
in eum statum res decidere, ut inter misericordiæ opera habe-
retur occidi. De Claudio mater Antonia judi-
care solebat: Non absolutum à Naturâ, sed tantum inchoa-
tum esse. De eodem recens Autor: Omnia in im-
periò habuit, præter Imperium. Seneca in Apocolo-
cynthosi: Annos LXIV. cum animâ luctatus est. De eò-
dem Aufonius: Non faciendo nocens, sed patiando fuit.
De

(5)
Julii Cæs.

(6)
Augusti Cæs.

(7)
Tiberii

(8)
Caj Cæsar

(9)
Claudii

Sydus.
(10)
Nemus

De Nerone Præceptor Chæremon dicere solitus est: *Lutum illud sanguine maceratum.* De eodem Poëta Gallus:

*Te celebrare potest, ô Cæsaris ultima proles,
& scelus & vitium qui celebrare potest.*

Et recentior quidam de eodem: *Matri occisæ Romanam fecit rogam.*

(11)
S a lla

De Galbâ Tacitus: *Alienô Imperiô felicior, quàm sub. Et: Medium ei ingenium, & magis extra vitia, quàm cum virtutibus. Et: Pecuniæ alienæ non appetens, suæ parcus, publicæ avarus.*

(12)
O f. Sonis

De Othone Aufonius:

— *Qui morte decorâ*

Hoc solum fecit nobile quod perit.

(13)
Velli

De Vitellio Tacitus: *Ventre & gulâ sibi ipsi hostis. Idem. Amicitias dum magnitudine munerum, non constantia morum retinere vult, meruit magis, quàm habuit.*

(14)
Vespasian

De Vespasiano Tacitus: *Solus Principum in melius mutatus. Idem: Prorsus si avaritia abesset, antiquis Ducibus par. Eutropius de eodem: Nullius cede unquam latetis justus etiam supplicis ingemuit.*

(15)
Titi

De Tito tritum est, quod *Deliciæ generis humani sit appellatus. Tito, ait Tacitus, Ingenium, quantacumq; fortune capax, decor oris cum quâdam Majestate.*

(16)
Domitian

De Domitiano Iuvene Tacitus: *quod stupris & adulteriis filium Principis egerit. Et: infestus virtutibus Princeps. Et idem alibi: quod ex paternâ fortunâ licenti-*

am tan-

am tantam usurpaverit. De eodem Plinius in Paneg: Nunquam ex solitudine suâ prodibat, nisi ut solitudinē faceret.

(17)
Nervo

De Nervâ Plinius in Paneg: *Ruebat Imperium super Imperatorem. De eodem recentior aliquis: Enervis Nerva. De eodem Tacitus: Nerva Cæsar res olim dissociabiles miscuit, Principatum & Libertatem.*

(18)
Trajan

De Trajano verus acclamatio est pro elogiô, quod & ante allegavimus: *Felicio Augusto, melior Trajano. De eodem Florus: Sub Trajano Principe movet lacertos Resp., & præter spem omnium senectus Imperii, quasi redditâ Iuventute, revirescit. Eundem Constantinus M. Parietariam dicere solebat quod ubiq; nomē ipsi° publicis operib° inscriptum cerneretur.*

Ad hoc exemplar de reliquis quoq; Principibus annotari debent, si quæ in lectione Auctorum occurrunt, iudicia brevia & acuta. Neq; intra antiquorum Elogia standum est, sed de posterioribus quoq; similia colligere expedit: ut, quod Orho I. Imperator *Amor mundi, Tertius, Miraculum mundi dictus.*

(19)
O f. Sonis

De Carolo V. Imp. nota Thuani testimonium: *In eô, inquit, Principe cum Virtute certavit fortuna, ut meritis illius supremum felicitatis fastigium imponeret. Idem: Nullum perfecti magis & ad omnem virtutem expressi Principis exemplar nostrâ & retrò seculorum memoria reperiri posse arbitror.*

Herod

Elogia
Principum
recentiorum.
Caroli V.

(21)

Henrici al.

Heros incomparabilis & priscis Imperatoribus laudatissimis adnumerandus. Ita colligenda similiter Elogia & Iudicia sunt de aliis Regibus, Principibus & Magnatibus celebrioribus. Ut, de Henrico IV. Galliarum Rege Parisiis in Palatio Richeliano extat tale Elogium: Galliam ab Hispanis & perduellibus usurpatam Gallie sibiq; dextrâ & ferrô restituit. Phœnix exquisitus, ingentium virtutum odoribus immortalis, & è cineribus datô successore redi-vivus, unus omnium admiranda inchoare potuit, unum, qui consummavit, reliquit.

(22)

Lud.

is

De Ludovico XIII. Filio Henrici ibidem:

Iustus, pius, felix, terrâ mariq; victor, Europæ arbiter, consumptâ scētarum rebellium excetrâ, domitis perduellibus, amplificato Imperiô, summotis ultrâ Rhenum & Padum Franciæ hostibus, defensis sociis, retextâ aulicarum factionum, quæ turbas in Regno ciebant, telâ, duo ad cumulum gloriæ, in cogitatione prima, in opere ultima, Christiani orbis Pacem, & populorum levamentum, quæ speramus, respirat.

De ipso Cardinale Richelio ibidem:

Tot exantlatis, quos universus orbis audit, laboribus, hoc unum præstitisse sibi visus est, quod summâ rerum à Domino suo sibi concreditâ, tanti Regis mentem ingenio affecutus, secundante cœlo, forti animo feliciter executus est. De eodem Cardinale habentur alia quoq; tam vivo, quàm mortuo, & tam ad laudem illi, quàm probrum ejus scripta, omnia tamen acuta. Sed nè longior sim, hic inserere ea nolo.

Elegans

Elegans Gvilielmi Principis Orangii Elogium per comparisonem cum Duce Egmontiô extat in Famianô Strada, quod etsi paulò prolixius, inseram tamen ideò ut ad similia in Autoribus observanda excitem Juventutem: Erat Egmontius ingenio hilari, explicato, sibiq; presidente, tristi Orangius, inobservabili, vitabundo. In hoc solertiam ubiq; laudares: fidem in illô sæpius reperires. Dux belli melior, quàm Senator; Ajax ille: hic Vlysses domi pugnacior consilio, quàm foris manu. Provisor alter anxius, inq; futura semper animo præcurrens, eôq; adversus repentina nunquam improtectus: alter plerumq; curis vacuus, nisi instantibus; ad subita tamen magis imparatus, quàm aut impromptus, aut impar. Plus ab altero sperares, ab altero plus timeres. amicumq; tibi Egmontium malles: Orangium magis inimicum nolles. Et ne quâ in re convenirent, vultu erat Egmontius perquam pulchrô, validis membris, aspectu pleno dignitatis: alter ore gracili, colore fuscô, capite recalvô. Summus tamen uterq; Populo habebatur: sed illum homines amabant, hunc colebant.

Similis, nec acumine inferior comparatio inter duos celebres belli per Poloniam Duces, Hotkevicius & Zolkievium, extat in Historiâ Johannis Innocentii Petricii, Viri sanè eximii, & majorem verè laudem, quàm habet, merentis. His, inquit, Genus, ætas, opes, propè equalia fuere: magnitudo factorum par; ambo bellis Moschoviticis; Hotkevicius plus Livonicis Svecicisq; florere. Indè Militia utriq; magna scientia, sed usus alii alius. Hotkevicius su-

K

Dec. I. l. 3.

Gvilielmi
Per Compari-
sonem.

(25)

Hotkevicius
et Zolkievium

torum lectio suppeditabit. Ex. gr. in Heinſii Orationibus occurrit Elogium Plutarchi, quem ille alicubi ita laudat: *Qui, inquit, compendium eruditionis, Prudentiæ theſaurus, Antiquitatum utriusq; gentis quidam Delius Apollo videtur.* Galenum idem appellat *Mare eruditionis, Oceanum disciplinarum, omnium ingeniarum artium promumcondum, & quafi Bibliothecam quendam.* Hieronymus (ne Eccleſiæ etiam fidera prorsus omittamus) ab eodem Heinſio vocatur *magnum ac incomparabile columen Eccleſiæ, ac decus.* Chryſoſtomus, *Suada ac medulla ſacræ Eloquæ, qui, ut amnis quidam ſummò è monte provolutus, ore immenſo decurrit.* Quia verò facilius memoriæ inhaerent, quæ numeris ligata ſunt, utile erit brevia Epigrammata de viris iſtis eruditis in promptu habere, ſive ea ſepulchris, ſive Iconibus inſcripta, ſive aliò modò laudi eorum dicata ſint, ut Ex. gr. illud

De Laurentiò Vallâ.

*Juppiter hunc cœli dignatus honore fuiſſet,
Cenforem lingvæ ſed timet ille ſuæ.*

De Erasmo Roterodamo:

*Ingens ingentem quem perſonat orbis Erasmus,
Hæc tibi dimidium parva tabella refert.
At cur non totum, mirari deſine, Lector,
Integra nam totum terra nec ipſa capit.*

De

De eodem alibi hoc ſcriptum memini:

*Fatalis ſeries nobis invidit Erasmum,
At Deſiderium tollere non potuit.*

De Gvilielmò Budæo, qui eximium de Aſſe librum edidit:

*Quod ſibi vix multò multi peperere labore,
Uno Budæus comparat Aſſe ſibi.*

Cui affine eſt, quod nos aliquando in Cl. Salmaſii librum de Uſuris ſcripſimus, quod pace invidiæ adſicere licebit,

*Grandior à Phæbò ſors, quàm tibi, credita nulli eſt:
Majorem Uſuram te quoq; nemo dedit.*

De eodẽ porrò Budæo olim aliquis ita breviter:

*Gallia quod græca eſt, quod Græcia barbara non eſt,
Utraq; Budæo debet utrumq; ſuo.*

In Elogiis dùm verſamur, non praterenda quoq; nobis putamus illa, quæ de Urbibus celebrioribus extant, ut ex. gr. quod de Urbe Venetâ olim Sannazarius ſcripſit, ut elegantia ſuâ, ita præmiò luculento nobilitatum Epigramma (ſexcentis enim aureis penſatum eſt à Senatu Veneto.) Labet id autem ſubſicere, quia Juvenibus, quibus iſta ſcribimus, nondum forſan lectum eſt, viris alioquin notiſſimum:

Viderat

Venetia

Viderat Adriacis Venetam Neptunus in undis

Stare urbem, & totò ponere jura mari:

Nunc mihi Tarpejas quantumvis, Juppiter, arces

Objice, & illa tui mœnia Martis, ait.

Si pelago Tybrim præfers, urbem adspice utramq;

Illam homines dices, hanc posuisse Deos.

Talia autem urbium Elogia à Ful. Scalig. aliisq; composita Libri Itinerarii, & melius ipsa deniq; itinera seu peregrinationes ad loca externa susceptæ nobili Iuveni suppeditabunt.

Epigrammatum, quæ datâ Occasione jam adduximus, svavitas alliciet opinor Elegantiarum studiosum, ut alia quoq; , etsi nullum in iis Elogium contineatur, judicii acuendi, animiq; tam sui, quàm alieni delectandi causâ, legere, ac si brevia atq; elegantia sunt, memoriæ quoq; , si ea felicior adest, mandare non dedignetur. Qualia nonnulla ex Martiali, plura ex Oveno, graviora ex Bauhusio, Sarbieviò, Bidermanno aliisq; ejusmodi peti possunt. Ut ex Martiali de Fannio illud:

Hostem cum fugeret, se Fannius ipse peremit:

Hic, rogo, non furor est, ne moriari, mori?

De Piscibus sculptis:

Artis Phidiacæ toreuma clarum

Pisces adspicis, adde aquam, natabunt.

Item

Item ad Priscum:

Vxorem quare locupletem ducere nolim

Queritis? Uxori nubere nolo mea.

Inferior matrona suo sit, Prisce, marito,

Non aliter sunt fœmina virq; pares.

Ex Oveno sint pro Exemplo illa:

Scaliger annosi correxit secula mundi:

O quis qui mores corrigat, alter erit?

Ad Germanicum:

Mitto tibi Carmen, Germanice, muneris instar:

Mitte mihi munus, Carminis instar erit.

Venit mihi jam in mentem alia literata elegantia, quæ tamen forsân aliquibus primâ fronte nimis scholastica, minusq; adeò Illustribus ingeniis digna credetur. Mihi verò non prorsus videtur spernenda. Lulus est, sed ingeniosus, & qui gratiam invenire solet, si ex venâ non infelice provenerit. Loquor autem de *Anagrammatum lusu*. His eqvidem efficiendis nolim ego nobilia se dare ingenia, sed elegantiora aliqua ab aliis inventa meminisse nihil profectò cuiquam obfuerit, imò hinc quoq; svave familiarium sermonum condimentum peti potest. Sunt autem quædam ex prænomine, aut etiam cognomine solò petita:

ut:

Obiter
aliquid de
Anagram-
matibus.

Anagram-
mata

Vannium
vana

Ut: *Emmanuel* Levamen. *Sigismundus*, Dignus Musis, *Mauritius* Mars vivit, *Cicero* Cor cie, *Ferdinandus* Dura findens. *Ladislaus* Das villas, *Casimirus* Mars civis, *Senatus* tu sanes.

Alia ex utroq; nomine, quæ eò præstantiora, quò magis ad personam, cui scribuntur, quadrant, ut: *Carolus Magnus*: cumulus agros, *Boleslaus Crivoustus*: O ut bello acris visus! *Joannes Casimirus*: O sine armis vincas! *Stanislaus Coniecpolius*: Is cinctus Poloniae salus. *Stanislaus Lybomierscius*, is notus ausis Mars bellicus. *Samuel Lescinius* Celsis lumen Avis. *Thomas Samoscus*, Musas hastis como, & hastas Musis como; quod à plurimum Reverendo & tam literis quàm dignitate illustri Viro *Gregorio Boras* compositum tantò elegantius est, quòd ad stemma Illustrium Samosciorum, eorundemq; in literas favorem apprimè quadrat.

CAPUT
XXII.
Symbola.

REstant duo ad acuendum ingenium, & ad elegantiorē doctrinam per quā utilia minimeq; adeò nobis prætereunda, Symbola & Emblemata. Nunc enim ista distinguo, etsi non ignarus sum, facile ex Symbolo fieri Emblemata, cum dicto alicui brevi & acuto imago additur: pariter etiam ex Emblemate Symbo-

Symbolum, si quis picturam unā cum epigraphæ seu Lemmate suò ad exprimendum aliquem sensum, consilium vel factum, seu suum, seu alterius adhibeat. Illustribus autem juvenibus venanda notandaq; sunt illa maximè Symbola, quæ à summis Viris profecta noverrunt. Tantò enim plus & ipsorum animos afficient, & aliorum pariter, apud quos mentionem eorum fecerint. Edidit autem jam pridem *Nicolaus Reusnerus* vir Clarissimus Symbola Imperatorum Romanorum omnium, eademq; luculentissimo commentariò illustravit: Sic ut liber is Ethices, ferè & Politices illustre quoddam Compendium sit, nobiliq; adeò juventuti meritò commendatus esse debeat. Circa Symbola quoq; laudabilem atq; utilem operam navavit *Petra-sancta*. Olim in Gallia in Historicum Charronium incidi, qui Regum Gallicorū Symbola Historiæ suæ operi intexuit: quorum aliqua satis concinna sunt, ut *Clodovei*: Incendo quod adoravi, adoro quod incendi. *Clotarii II*: Mens immota manet. Cui Lemmati alius posterior autor Emblemata additurus, molendini rotam addit, aquis versam, axe rotæ immotâ manente, *Clotarii III*: Regis otium servi negotium. *Dagoberti*

*Antea
Emblemata*

berti: *Quies iniquies.* Pipini Brevis: *Deus se tibi, tu te Deo.* Caroli Magni: *Gratia Dei id sum, quod sum.* Notabile quoque Symbolum est, quod Rex, primum Scotiæ, at postea totius Magnæ Britanniæ, Jacobus VI. Uraniburgi Anno 1590. reliquit manu sua:

— *Est nobilis ira Leonis*

Parcere subiectis, & debellare superbos.

Item illud Henrici VIII. Angliæ Regis: *Cui adhaereo, præst:* alludens scilicet ad illud, quod jam dudum Politici observârunt, Galliam & Hispaniam esse quasi lances in Europâ, Angliam verò lingulam seu libripendem; ut annotat Cambdenus sub anno 1577. mihi p. 285.

CAPUT
XXIII.
Emble-
mata.

Emblemata autem tantò magis afficere, & demulcere nobilia ingenia solent, quòd non animo tantum suavem meditandi curam, sed & oculis lustrandi voluptatem obiciunt. In iis verò effingendis, si quæ unquam, nostra profectò ætas plurimum desudavit: & ut multis in rebus aliis apicem, ita in hac quoque videtur attigisse. Habentur Emblemata Alciati, Paradini, Sambuci, Adriani Iunii, Camerarii, Schönhovii, Boxtorfii, Hessii aliorumque, quos enumerare non attinet. Pulchra quoque sunt quæ

quæ ex porticu regiâ Parisiensi collegit Ioannes Gvissius, edita superioribus annis Luteitiæ. Sed omnium gloriam hoc in genere superavit ac propè extinxit illustris Savedræ labor, qui centum Emblematis, additisque insuper commentariis totam ferè disciplinam Politicam complexus est. Ità jam hoc inprimis curæ nobilis adolescentis relictum videtur, uti illa à tam diversis ingeniis edita Emblemata in ordinem aliquem, & sub certa quasi signa locorum communium redigat. Et nisi alii commodiores tituli adsunt, suppleat interim locum Politica Lipsii, quam ubi familiarem discenti nobili Magister fecerit, Emblemata illa variorum Autorum percurrat, & quæ melioris notæ fuerint, in chartâ singulis paginis interfertâ adjiciat.

Possem plura de ejusmodi elegantiss & quasi lautitiis literariis huc accumulare, sed nimium jam vereor, nè eorum, qui ista legunt, convitium, saltem tacitum, ideò dudum incurrerim, quod circa flosculos eruditionis ita operosus sim, solidæ autem sapientiæ frugem negligam, aut nimis differam proponere. Ego verò deliciarum seu condimentorum istorum *αρωματισ* semel ingressus, abire inde non ante volui, quam

*Savedra
nobilis Em-
blematis*

*Cum Lipsii
Politica
quid præstet
de juveni?*

*(1) Flosculi
qui
miser
(2) Flosculi
seu solida*

singulas quasi capsulas seu *ληκύθους* excussissem. Specimina quoque singulis istis, quasi gustus capiendi causâ, adjeci: quò nimirum facilius percipiatur quid velim, & levior labor sit sequendi atque imitandi præeuntem. Ordinem in istis non tam nostra præcepta, quam suum cuique; docenti iudicium monstrabit: cuius prudentiæ incumbet, omnia ista ætati & captui suorum discipulorum attemperare. Nos sanè ea hic tradidimus, quorum usus non adolescentibus tantum, sed adultioris quoque ætatis juvenibus, atque etiam peregrinantibus convenit.

CAPUT
XXIV.

*Solidioris
sapientiæ
præcepta.*

CÆterum prorsus fateor & constanter assero, dum condimenta ejusmodi ventur sectaturque juvenus nobilis, non esse ei negligendum solidæ sapientiæ cibum. Quid enim aromata profint, nisi sit, quod illa condiant? Quorsum phaleræ, tapetes, nisi habeas cui insterni queant? Solidæ autem sapientiæ fundamenta haud sanè alibi quaerenda sunt, quam in Philosophiæ officinâ. Quæ cum partim in disciplinis contemplativis, partim in practicis consistat, has equidem posteriores nobili juventuti præ alteris illis convenire, & nos antè diximus, & apud omnes in.

inconfesso est. Sed nec illæ facile ulli, cui ingenium natura, opes & commoditatem fortuna dederit, negligendæ sunt. Aliquæ tamen, ut, quod res est, fateamur, spinosiores sunt, quam ut magnoperè coli debeant ab iis, quibus in conficiendo studiorum curriculum festinandum est. Qualis præcipuè est *Metaphysica disciplina*, circa summa rerum generalis *Metaphysica an utilis Nobilibus.* versans, atque ita, quantum abstractionum subtilitate in altum evolans, tantum animum humanum ab operationibus vitæ utilioribus avocans, adeoque otio literario se deditâ operâ addicentibus, quam functiones civiles administraturis aptior. Ex Metaphysicis quorundam Magistrorum culpâ in *Logicam* quoque non parum defluxit obscuritatis. Undè adeò lento, prolixo & morosò quodam præceptorum tractu ea ars in scholis haut paucis docetur, utilissima alioquin & planè necessaria cuilibet sapientiæ alumno. Ab eâ enim Inventionis artificium, ab eâ ratiocinandi dexteritas, ab eâ vera probandi, falsa refellendi, item ordinandi suas cogitationes, alienas resolvendi methodus dependet. Quibus rebus, in benè natis ingenii multum equidem subindè naturalis solertia suomet.

suomet Marte potest, sic ut quidam viri logicorum præceptorum ignari insitò lumine suò exercitatissimis identidem satisfacere cum admiratione omnium possint. Sed & istis, quantumvis naturâ acutis, multum astruxisset disciplina: & qui Logicam artificialem naturali addidit, potest illis alteris terminorum artis, ceu Gorgonei capitis objectu sæpè os occludere aut pudorem excutere. Quare omninò compendium aliquod Logicum ediscendum etiam Nobili est, nè, si quando cum eruditis eruditè loqui aut differere res postulet, terminis artis, veluti novis quibusdam monstris perterreatur, sed potissimum etiam ideò, ut ipse modum habeat, fila & stamina inventionum, quibus ad texendum qualemcunq; discursum opus est, ex se educendi, atq; ordine concinnò proferendi: tum quoq; ut de aliis, docere vel dicere aggredientibus, tantò aptius judicare possit. Compendium verò tale vel ipse Magister dictabit, vel (id quod malim) ex impressis aliquod eliget; ut ex. gr. Scharffii, Bartholini, Molinei, Keckermanni. Præcipuè autem regulæ & formæ syllogisticæ inculcentur diligenter, sed non minus Topica quoq; præcepta, ipsissimum scilicet invenien-

Utilitas
Logica

ut quæ
in Logica
potissimum

veniendorum argumentorum in quavis rezophylacium. Dare porro Magister operam debet, ut quàm maximè perspicua discendi præcepta reddat, ad naturale potissimum rationis lumen omnia exponendò, tum etiam exemplis quàm familiarissimis terminos illos artis, ipsâ plerumq; re, quàm notant, obscuriores, illustrandò.

Post Logicam accedatur ad scientiam rerum naturalium: studium non minùs utile quàm jucundum: si præsertim scitè tractetur. Svavitatem certè summam habet per hoc universum circumferre oculos, lustrare rerum ortus & causas, & naturæ animadvertere sympathias atq; antipathias. Neq; verò curiosis tantum & speculationi vacantibus ingeniis talia accommodata esse credendum est. Sunt quippe in Physicorum scriptis problemata & quæstiones tam amœnæ & svaves, ut quemq; etiam nobilissimum trahere ac tenere genium possint. Magistris tantum incumbet ex Aristotelis problematibus à Septalio explicatis, ex theatro Naturæ Bodini, aliorumq; ejusmodi libris insigniorum facilioremq; problematum facere delectum. Sed porro ex universâ Physices

CAPUT
XXV.
Naturalium rerum
scientia.

fices tractatione ad civile quoque; studium luculentissimum manare fructus potest. Quis nescit Macrocosmo seu naturæ rerum universæ, Microcosmum, hoc est, hominem mirificè respondere: adeoque quæ in illò cernuntur, observanturque; pulcherrimâ applicatione ad vitam & mores humanos traduci posse? Ex homine sanè ipso ejusque; structurâ non contemnenda Prudentiæ Politicæ præcepta elicuere Autores nonnulli, & præ aliis Cl. Casp. Dornavius: quancquam ab hoc quoque; aliquid adhuc industriæ aliorum relictum esse, si otium suppeteret, non esset difficile ostendere. Sed quod in corpore humano tentatum dixi, idem in cæterò Naturæ universæ systemate, coelò, stellis, meteoris, plantis, animalibus, fieri posse nemo non videt. Et passim etiam ab istis singulis rebus sumtæ similitudines in Autoribus optimis, sed sparsim, & vagarum instar stellarum insertæ occurrunt. Qui autem per singula rerum genera filò quodam continuò operam eam deduxerit, neminem hactenus vidi. Et opinor tamen hujusmodi laborem omnibus, ac præcipuè nobilibus, summè & utilem & gratum fore. Quò autem, quid velim, intelligatur rectius, dabo

dabo *περί γενεαί* locò pauca, quæ de facili se ingerent, (neque enim rara tantum hinc sectari res poscit, aut negotia mea nunc patiuntur) exempla, ex quibus tamen haut difficulter cognoscetur, quomodo eadem cura ultra hominis naturam extendi, atque ad alia rerum naturalium genera applicari queat.

CAPUT
XXVI.

IN *Physicis* agi solet de Naturâ Mundi: & nempe antequam in partes ejus omnes curiositas scientiæ sese diffundat, quid generatim de hac coeli terræque; fabrica cognoscendum sit, explicari. Hic inter alia docetur, Mundum ex contrariis consistere, & ut Sen. *Quæst. Nat. l. VII.* ait: totam hujus Mundi concordiam ex discordibus constare: Applica hoc ad Imperium seu Remp. Et id sanè ex Magistratu & subditis, Dominis & servis, rebus disparibus & quodammodo contrariis consistit: sed ita, ut res istæ, quæ contrariæ videntur, & sunt, vel sponte, vel vi coactæ in unam societatis compagem coalescant. Deinde eadem illa ex rebus discordibus concordia elucet cum quoque; cum diversarum Nationum, Lingvarum, sensuum, artium, studiorum homines intra unius civitatis moenia, intra ejusdem Imperii fines, sub eodem

Rerū naturalium
ad Politicā
accommodatio
speciminis
ergò tentatur.
De Mundo in genere.

unum?
Esequus com.
per se non.
Ita Regibus.

Vid. Sa-
vedram
in Symb.
XXX. sub
finem & in
Symb. 61.

dem moderamine, sub iisdem legibus vivunt. Facit hūc, quod apud Politicos legi: utile esse in eādem Republ. non per omnia ingenio & oratione similes, sed faciles & graves, comes & tristes, severos & lenes, Appios & Publicolas, Catones & Cæsares existere. Ut enim infidibus si nervi omnes similem sonum ediderint, harmonia nulla, sed ex dissimillarum vocum moderatione concentus congruens & concors efficitur: ita si ii, qui ad consilia publica adhibentur, etsi cætera dispares, in rebus deliberandis tamen ita comparati sint, ut in eundem omnes scopum, publicum videlicet bonum colliment, longè certior clariorq; in rebus & consiliis veritas ex illā dissimilitudine sententiarum, & velut concorde discordiā emergit, quā si absq; ullā varietate omnes idem sentiant. In Politici Florentini *Disputationibus de Rep.* totum caput quartum libri primi occupatur in hoc solō demonstrandō: *Discordias, quæ inter plebem & Senatum Romæ fuerunt, in causā fuisse, ut ea Resp. libera simul & potens efficeretur.* Facit deniq; huc sententia Senecæ Ep. 95. *Societas nostra lapidum fornicationi simillima est, quæ casura, nisi invicem obstarent, hōc ipso sustinetur.* Prætereā ubi Physicus de

de mundo agit, docere solet, primam mundi ex nihilo productam materiam confulum quoddam chaos, & rudem atq; indigestam fuisse molem. Ex talibus quoq; principiis existere solent Respublicæ. Ex prædonibus, & agrestem feritatem spirantibus hominibus prima urbis Romanæ concrevere rudimenta. Venetias profugi homines condiderunt, Barbarorum incursionem, præsertim Attilæ, fugientes. Talia non pauca in doctrinā Physicorum de Mundo generatim considerato inveneris, Reip. & Imperiorum institutis apprimè quadrantia: sed ista pro exemplo adduxisse sufficiat.

Quandò Cæli Naturam exponunt Physici, docēt inter alia cœlum & sidera agere in res inferiores, & isti defludio magnos prorsus effectus tribuunt. Non minor Aulæ & Principum in subditorum tum mores & fortunas efficacia est. De moribus notum illud: *Quales in Republ. Principes sunt, tales reliqui esse solent cives.* Cicero l. 1. Ep. 9. & quod Vellejus habet: *Rectè facere suos Princeps faciendō docet.*

De Cælo
& sideri-
bus.

selv' edv
aguntur
apud in sub.
ditos

— Procerum motus hæc cuncta sequuntur,
Humanum paucis vivit genus. —
Quod ad fortunas attinet, eæ à Cœlo aulicō,
M 2 ut

ut sic dicam, & Principis plerumq; voluntate dependent. Nero ap. Sen. lib. de Clement. non malè: *Qualem quisq; sortem statumq; habeat, in manu meâ positum est. Quid cuiq; mortalium fortuna datum velit, meo ore pronunciat. Ex nostrò responsò latitiæ causas populi urbesq; concipiunt. Cœlum Aristoteles ab intelligentiis moveri statuit. Utinam ira Aulæ! Rectius sanè res in iis se haberent, prudentiorq; earum motus, ac forma esset constantior.*

Cum de Sole agunt naturalis scientiæ Auctores, tradunt inter cætera, quò altior is sit, eò illum minores umbras jacere; Sic Imperia, dum intra prima incrementa luctantur, multæ vicinorum invidiæ subjacent; cum ad fastigium emerferunt, supra invidiam sunt. Sol medio inter Planetas loco situs est, & ab eclypticâ nunquàm deflectit;

— Medium non deserit unquam

Cœli Phœbus iter, radiis tamen omnia lustrat. Claud: Sic Princeps, in medio etiam ditionum suarum degens, longè remota gubernat ac moderatur. Ad lucis Solaris reflexionem si quæ objecta intueatur oculus, (verba sunt Sædæ,) jam probè & distinctè videt, qualia ea sint: at si in radios ipsos solares directè velit intendere, nimia luce sic perstringitur, ut colores rerum & figuras haud quaquam possit discernere: ita prorsus inge-

niis accidit, quæ sapientiæ & doctrinæ studiis impensius quàm par est, sese dedunt, ad negotia publica minus sunt idonea. Sole terris lucescente stellæ non videntur: Sic Procerum autoritas præsentia Regis præumbratur offuscaturq;. Sol æstate cum urit maximè, tùm solent sequi tempestates: sic cum in subditos crudelitas aut injustitia Principum sævit, tùm turbæ, seditiones, mutationes oriri consuevere. Solis defectus magnas plerumq; calamitates mortalibus afferre solet: sic Principum errores. Soles cum plures apparent, prodigiosum, & calamitarum imminentium præsagium est: ita cum plura in imperio capita. Solis beneficia quotidiana imò perpetua, non solent ita observari, atq; eclipses ejusdem: ita in errores principum magis oculi omnium advertuntur, quàm in virtutes, & rectè facta. Solis radii si in speculum curvum seu concavum, atq; in primis chalybeum incidant, fiunt ignei & urunt obvia: ita si Principes ingeniis pravis, immoderatis, Martiis, se dedant nimium, consilia ignea, tumultus, bella sequuntur. Vid. Sæd. symb. 76. Sol idem est pauperi & diviti, nobili & obscuro: ita Princeps benefacere & justitiam administrare debet tam

imis,

Pro sol al:
tior es um:
bra minor:
Sic Imperium
ad fasti-
gium em-
erferunt
Cœli sup
mundum
sunt

nl

imis, quam summis. Rex, inquit Aristoteles lib. V. polit. c. 10. custos esse debet, ut nec opulenti injustum aliquid patiantur, nec plebs contumeliam accipiat. Sol sua habet solstitia & æquinoctia, sic Imperia suas periodos, suas crescendi & decrescendi vices.

Cometarum quoque doctrina multas dabit occasiones ad egregia monita, ut v. gr. Cometæ stellæ magis videntur, quam sunt, aut si sunt (id enim jam video à nonnullis statui) minores tamen sunt aliis stellis, præsertim Planetis, etsi majores videntur: & qualescunque sint, semper Imperiis aliquid sinistri minantur: Ità plerumque homines, qui ex humili loco subito in altum eVecti, fortunâ suâ corrumpuntur & insolescunt, aliisque vetustò splendore claris se præferunt. In tales Sejanos vel (si ex recentiore Historiâ nomen mavis) Volsceos lusit quidam aliquandò tali Epigrammate:

Antiquâ de stirpe viris te, Pontice, præfers,
Cum sis ipse novæ conditionis homo:
Servorumque gravem longò trahis ordine caudam,
Mente tumens, habitu splendidus, ore minax.
Sic noviter natò dirus rubet igne Cometes
Sanguineâ longum lampade sçirma trahens.

Phosphorus

Phosphorus at contra, vetus ille anteaambulò Solis,
Haud grandi nitidam jactitat igne facem.

Lumen at inducit Phœbeum Phosphorus orbi,
Tu Regnis tenebras, dire Cometa, paris.

Si de Fulgure agat Physices Magister, multa eximia prudentiæ scita animis Nobilium subiacere poterit, ut ex gr. Fulmina, mollibus illæsis res durissimas comminuunt: ita Principes cedentibus parant, superbos ac resistentes frangere ac pessundare solent. Fulmina montes & res excelsas petunt: ita Principum ira & suspicio Viros eminentes. Unde Tacitus: Ex mediocritate fortuna pauciora pericula sunt. Contra autem, Sinistra erga eminentes interpretatio, nec minus periculum ex magnâ famâ, quam ex malâ. Ità alibi idem dicit: Magnitudo famæ exitio erat. Ità Calpurnius Piso periit, nihil ausus, inquit Historicus, sed nomen insigne, & decorâ ipsi iuventutis rumore vulgi celebrabantur. Idem Auctor Annal. XVI. C. Cassium & Silanum à Nerone subversos, nullo crimine, nisi quod Cassius opibus vestitis, & gravitate morum, Silanus claritudine generis & modesta iuventute, præcellebant. Fulgur plerumque prius emicat, quam comes ejus sonus audiatur: sic principes sæpè famam suâ anteeunt, & ferunt priusquam parare ictum audiantur, prius damnant, quam faciant reos.

Neque

Imperia Re.
videt suas
saber ut Sol
sua solstitia
et æquinoctia

Humilis lo.
is nati in al.
tum eVecti
sues similes
Cometes

Principes
ut fulmina

Fulgur
est Princeps.

De Ele-
mentis.Mala quædam
ut ignis.

Neq; minus ex Elementorum etiam Doctrinâ elici possunt bona ad vitam documenta. Sunt Ignēs, qvī aqvis accenduntur, ut apud Plinium videre est lib. 2. cap. 106: ita quædam mala si extinguere coneris, exasperantur. Sic sub Vi- telliō ap. Tacitum cūm vagarentur per urbem milites, qvī sermones populi coërcerent, id præcipuum, inquit Tacitus, alimentum famæ erat. Et alibi: malè coërcitam famam supprimentes augebant. Ità & Blæsus, cūm quosdam militum tumultuantium, terrendis ceteris, affici flagris, claudi carceribus jussisset, flagrantiorē inde vim fecit, & plures seditioni Duces dedit, ut est ap. Tacitum Annal. I.

Curando fieri quædam pejora videmus

Vulnera, quæ melius non tetigisse fuit. Ovid.

Ingenia illa
quia ut ignis

Ignis quod clarior fulsit, citius extinguitur: sic ingenia, quod illustriora, eò breviora: sic & in Aulis sæpè, quod quis altius attollitur, eò paulò post lapsu graviore ruit. Ignēs in- terris absconditi nonnunquam saluberrimas corporibus humanis aqvas effundunt: sic inge- nia obscura & latentia optimos sæpè doctrinarū fontes. Vide infra sub Violâ. Ex scintillâ par- vâ sæpè maximus ignis: sic ex tenuissimō prin- cipiō maximi nonnunquam motus. Hūc per- tinet illud ex Panegyrico Pacati: O quam parvis

veniunt

veniunt sæpè mala principis: sic in ultimum propè Italici ge- neris excidium, effractō C. Lentuli ludo, myrmillonum agmen emicuit. Sic bella Consulibus ancipiti Marte pugnata Cilix Pirata conflagavit: sic, tenentibus arma fugitivis, Romana diū pila cessere ferro ergastulorum.

Aëri spiritualem doctrinam, fidem, & reli- gionem non malè contuleris. Sine aëre vita con- stare non potest, quæ ex respiratione præcipuè dependet: sic nec sine religione ulla Resp. Aër refrigerat, reficitq; spiritum hominis alioquin torpidum futurum: sic religio hominem veris & perennibus solatiis erigit. Ut aërem quisq; sanitatis amans purum quærit: ita religionem puram, quisquis salutis animæ studet. Ut aër infectus citò corpora: sic hæresis animas inte- rimit. Aërem terreæ evaporationes & fuligi- nes impurum reddunt: sic religionem curæ corporeæ, & voluptatum sagina. Aër corrum- pitur, nisi ventis perfletur: sic religio, nisi ve- hementior & gravior aliqua calamitatū procel- la eam ventilet exerceatq;. Venti nascuntur impetu, quem postea remittunt: sic sæpè in- negotiis initia aëria sunt, incuriosus finis.

Aquæ valles & loca humilia præcipuè rigant ita beneficia Principum modestis potissimum, & supercilium minimè contra superiorem po- testatem.

N

testatem.

Doctrina et
fides ut
aer

1

2

3

4

5

6

Beneficia
Principum
ut aqua

2 testatem attollentibus contingunt. Aquæ nisi
 pronò in inferiora delapsu propagentur, inuti-
 les redduntur, & corrumpuntur: sic nisi ii, qui
 beneficia Principum hauriunt, eadem ad alios
 inferiores porrò derivent, habentem corrup-
 punt, & ipsa verum suum usum amittunt. Quà
 3 de re vide Sædram symbolo 40. Fluvii quò
 profundiores, eò minore strepitu feruntur: ità
 Ingenia quò eruditiora, hoc modestiora. Flu-
 4 vii, qui jacentes in fundo lapides & sabulum
 ostendunt, nemini facile sunt periculosi aut for-
 midabiles: ita & Imperia, quorum intima con-
 filia patent. Aqua fluviorum ab exiguo ple-
 rumquè fonte initium ducit: ita Respublæ. ab exi-
 libus primordiis. Huc pertinet illud Senecæ
 l. III. de benef. c. 29. *Principia sua semper sequens ma-
 gnitudo obruit, & quod Ovidius canit:*

Nascitur exiguus, sed opes acquirit eundò,

Quaq̃ venit, multas accipit amnis aquas.

Quem taurum metuis, vitulum mulcere solebas,

Sub quâ nunc recubas arbore, virga fuit.

6 Sunt quædam aquæ in quibus nihil innatat,
 omnia merguntur, ut de Side stagnò Indorum
 Plin. l. 31. C. 2. memorat: Ità quidam homines
 arcana intimè recondere ac tegere norunt.
 Sunt

Sunt verò etiam Aquæ quædam, in quibus ni-
 hil animam habens mergitur, ut Asphaltites la-
 cus Judææ: sic sunt Aulæ, in quibus, modò
 prudentia adsit, tutò & benè vivi potest.

Oceano quoquè Aulam non immeritò com-
 paraveris. Plurima, imò immensa vis aquarum
 in Oceano, sed ex falsæ: ita in Aulâ beneficio-
 rum atquè opum conquirendarum modi plurimi,
 sed multum plerumquè habent Invidiæ, multum
 adversitatis. In Oceanò magnæ sæpè tempe-
 states & magnæ vices: ac sæpè eòdem mari
 quò luserunt navigia, merguntur: sic in Aula
 magnæ vicissitudines.

Fluxus & refluxus Oceani eodem referri po-
 test: item quod Plinius Iunior epistolâ ultima
 lib. IV. narrat de Agro Comensi. *ubi fons est statis
 auctioribus, diminutionibusq̃ crescens & decrescens: in
 quò sicco si annulum ponas, alluitur sensim, ac novissimè ope-
 ritur, detegiturq̃, rursus, paulatimq̃, deseritur.* Talis fons
 est gratia Principum, quæ modò attollit, modò
 deserit clientes suos: adeoquè potentiam istorum, ut
 non suâ vi nixam, valdè instabilè reddit. In summis
 Rhætorum alpibus lacus est, in quem si lapidè inji-
 cias, statim nebula exoritur, & indè grando, nar-
 rante Cecilio Frey in Admirandis Galliæ. Lacum
 ejusmodi

*Aula ut Ocea-
 nus. mus.*

zeli

stiv

*Gratia Prin-
 cipum ut
 fons qui
 dam.*

*Quina m-
 penna ut
 quidam lacus*

ejusmodi referunt divina mysteria, in quæ si ingenium humanum (verè ad talia lapis, nisi singulariter illustretur) se immergat, solent multæ litium, nonnunquàm & bellorum tempestates oriri.

Ad Terram cum accedet Physices Magister hanc quoq; in expromendis Vitæ præceptis, non sterilem reperiet. Terra comparata cum cæterâ universâ machinâ puncti instar est. Cur ergò de illâ adeò contendunt mortales, majorum ac meliorum incuriosi & quasi obliti? Rectè Seneca de Terrâ. *Hoc est illud punctum, quod inter tot gentes ferrò & igni dividitur. & postea: Punctum est istud, in quo navigatis, in quo bellatis, in quo Regna disponitis, Mortales.* Terra in mediò universi consistit, seu potius pender, verum scilicet Mundi centrum. Pender autem nullò nixa fulcrò, sed suò se pondere librat, partibus nempe ejus omnibus ad medium undiq; tendentibus, hincq; adeò mirâ quâdam *ισορροπία* seu æquilibrîo sustinentibus totum. Refert hæc in parte terra liberam Remp., quæ à nullò merè dependet, nisi à communi quâdam civium omnium in medium, hoc est, publicum bonum, propensione, mutuòq; omnium, etfi

*Terra nullò
nixa fulcrò
refert Remp.
liberam*

etfi ex diversis partibus, ad idem centrum raptu impulsuq;. Talem renisum, sed ad conservationem tamen Totius utilem, imò necessarium etiam, in Polonâ Republ. sentiunt illi, qui, quomodo in mixtò istò ex tribus Imperii formis ac generibus statu sese illa conservet, animum advertunt. Terra emissis è sinu suo vaporibus, nimborum ac tempestatum sibi procreatrix est: sic subditi sæpè ingeniis contumacibus, verbis factisq; insolentibus iras superiorum ac multa deniq; mala sibi accersunt. Terræ vapores tam tenues subtilesq; sunt, ut in oculos non ante incurrant, quàm ubi in nubes condensati sunt, & in imbres procellas grandines abeunt: ita pravorum consiliorum malorumq; publicorum causæ atq; initia vix conspicua sunt, sed tempore sensim aucta, magno tandem cum motu sæpè & periculo publicæ rei erumpunt. Montes terræ quidam quasi vertices sunt, sed ex iis nobilissimi fluvii nascuntur, qui reliquas terras irrigant: ita Principes summi sunt mortalium, & ab illorum benignitate fontes & rivi manant, quibus subditæ gentes recreantur & efflorescunt.

Jam Terræmotum si consideres, is potissimum

*Subditi
mala ex illis
p. ut multa
accersunt*

*Causa pravorum
consiliorum &
malorum qd
terra vapores*

*Principes summi
sunt mortalium
ut dicitur
montes*

simum à conclusis sub terrâ atq; exitum non
invenientibus ventis oritur: pariter Regnorum
concussiones perturbationesq; fiunt, si externa
aliqua nec imbellis multitudo in viscera Regni
aut Reip. admissa arctè nimis stricteq; habea-
tur. Si enim illa vires suas circumspicere cœ-
perit, aut etiam nimia servitute ad desperatio-
nem adigatur, dare turbas solet, & mutatio-
nes ingentes afferre Publico. Id quod vel ex
Populi Israëliti in Ægypto duram servitutem
servientis historiâ satis liqvidò apparet. Possis
quoq; hæc, quæ de terræmotu, eumq; causantib⁹
ventis dixi, ad homines turbulentos referre,
qui ad arcana Consiliorum admissi, si fortè ali-
cubi suo arbitrio agere prohibeantur, vim non
rarò cient, & totius Reipubl. aut Regni cardines,
si potentes sint, convellunt.

Cum sub terrâ ire placet Physico, istinc quoq;
utilia vitæ monita hauriet. Aurum non minuitur
igne, sed fit purius & splendidius: sic virtus per
calamitates enitescit. Seneca: Calamitas virtutis
ocasio est. Illos meritò dixeris miseros esse, qui nimia felicitate
torpescunt, quos velut in mari lentò iners tranquillitas deti-
net. Sic Florus, Romanæ, inquit, virtutis magnitudo
calamitatibus approbatur. Aurum inter metalla mi-
nimè

Regnum cum
diffines vel
terra motus

Possit Seneca
ad hunc
turbulentos re-
ferre

Virtus et
aurum

nimè omnium riger: sic animi Principum ge-
nerosorum ad Clementiam facilius aliis permo-
veri solent. Magni animi proprium est, ait Seneca,
placidum esse tranquillumq;, & injurias atq; offensiones superne
despicere. Muliebres est furere in irâ: ferarum verò, nec
generosarum quidem, præmordere & urgere projectos.

Adamas (ut ad gemmas veniamus) si frangi
contingat, quod haut facile fieri potest, in mi-
nutissimas partes diffilit, ita ut istæ oculis cer-
ni vix queant. Ita arctissima necessitudo, si
diffiliat, in gravissimas inimicitias degenerat.
Huc pertinet illud ex Tac. i. Ann. Gener in vi-
sus, inimici soceri, quæq; apud concordēs vincula charitatis
incitamenta irarum apud insensos erant. Et l. IV. Hist:
Iulius Briganticus sorore Civilis genitus, ut ferè acerrima
proximorum odia sunt, invisus avunculo insensusq;.

Chrysoprasium gemmam lux celat, prodit
obscuritas: ita multos egregios viros felicitatis
serenum occulit, rerum adversarum oborta
caligo in lucem producit, & illustres reddit.

Hæc tora quis nosset, si felix Troja fuisset?

Publica virtutis per mala facta via est. Ovid.

Hyacinthus cœlū sequitur, sentit auras, ac cum
cœlo facit mutationes, ut ait Solinus: sic à
fortuna Principum subditorum gaudium & mor-
ror, salus & perniciēs dependet.

Succinum

Animi Principum
generosorum
nec ferarum
nec animi

Necessitudo ar-
ctissima ut Adamas

multa animi egre-
gii per obs-
curitatem

Fortuna Principum
gaudium & mor-
ror, salus & perniciēs
dependet

Succinum (nam & hoc quidam inter fossilia referunt) pulchrè nitens, sed fragilis res est; vim trahendi habens; attamen non nisi paleas trahit: ita Aulæ, ita & omnes ferè res mundanæ splendorem suum habent, trahuntq; corda mortalium; sed in primis vana leviaq;.

Sed datis jam aliquot ex fossilium Promtuariorum speciminibus, ad Plantas quoq; accedamus. Nam & hæ, si rectè adhibeantur multa non corpori tantum, sed & animo salubria & civili vitæ utilia suppeditant. Primò quidem, si universè genus arborum consideres, ac aliquid inde ad rem politicam conducibile haurire velis, inter alia vel illud occurret: quod, quemadmodum duæ arbores cum nimium sibi vicinæ sunt, altera alteri officit, succumq; alimentarium intercipit: sic Imperia vicina pleraq; inter se æmula sunt, & sibi mutuò molestæ, donec alterum eorum prævalet, alterum submittat fasces. Ad omne quoq; genus Arborum proceriorum densiorumq; referri potest, quod Themistocles ad unum genus referebat, cum se *Quercui* comparabat, cujus tegumen aut umbram appetere homines, si cælum nimbosum, vel fervidum sit: cum eandem

deindè

deindè, ubi suffugio ejusmodi opus non est, securibus inpetere soleant. Ita nempe viri Magni in pretio sunt, dum sunt necessarii, non item, ubi operâ eorum minus seu privatim seu publicè indigemus. Arbores, quæ ad primum veris teporem flores emittunt, facile eundem amittunt, ubi asperior aura illum afflaverit: ita consilia festinata & præcalida rarò bonum habent exitum.

Ficus nunquam floret, nec arbores alias speciosâ foliorum luxurie æquat, sed fructus tamen suavissimos profert: sic ingenia quædam plus in recessu habent, quam primâ fronte promittunt. Id quod Erasmus ex occasione Adagii: *Silennus Alcibiadis*, plurimis exemplis demonstrat.

Moly herbam adversum fraudes & illecebras Circes Ulyssî à Mercurio datam Homerus ait: ita adversus Aulæ illecebras versutiasq; munire se debent qui eò destinantur.

Coralium marinus frutex, dum in aquâ manet, mollis est, ubi emerfit, indurescit. De quò Ovid: Sic est Coralium, quò primum contigit auras
Tempore, durescit, mollis fuit herba sub undis.

Sic ingenia etiam optima in blandò matrum

O

sinu

palestra fmm.
titudine

Optima fest.
ma nuptiis
arborum primum
vere erant

Ingenia quædam
dam ut sunt

Ingenia optima
in bland.
de matrum
sinu. ut ex
voluntate in
aquâ

Aula et res
mundanæ
ut succinum

Imperia vicina
ut duæ arbores
quæ una alteri
officiunt

Themistocles se
quercui comparabat

finu langvent, indè abstracta, & sub alium solem delata solidius robur acquirunt. Quà de re facundè & eleganter differit Savedra in symbolo III. & in symb. 66.

Oliva polit.
cur ut am.
lis est

Arundo ventorum violentiæ non resistit, sed inflectendo se obsequitur, hocq; modo illæsa atq; integra manet: ita homo politicus, ut se conseruet, tempori & fortunæ cedit.

Barylia

Fructus
subditum
ut ocym.

Ocymum si molliter attrectes, suavissimi est odoris, si vehementius teratur, ingratum spirat: sic è subditis, si moderatè tractentur, plurimum emolumenti elicere Principes possunt, si nimis tributis atterantur, solent turbas dare. Pulchra est historia, quam tali de re ex Justinianò Genuensi historicò refert Camerarius in Emblem. 83. & ex hoc Caussin. Franciscus Marcio, inquit, jurisconsultus egregius, missus à Republicà Genuensi Orator ad Ducem Mediolanensem, cum is eum nollet dimittere, nec pactis conventis Genuensibus stare, captatà occasione obtulit eidem Duci manipulum herbæ ocymi. Qui admirabundus, quid sibi hoc donum vellet, quæsit, quid rei esset. Cui ille respondit, ejusmodi proprietatem huic plantæ inesse, ut leviter & suaviter contrectata præberet.

præberet gratum odorem, nimis autem duriter compressa & attrita non solum omnem suavitatem perderet, sed etiam tandem Scorpions produceret. Habere se autem ingenia Genuensium eodem planè modò. Dux hòc ingeniosò admodum responso plurimum delectatus, & sententiam priorem mutavit, & Legatum honorificè dimisit. Huc pertinet illud Salomonis: qui nimis emungit, elicit sanguinem. Item alterum Tiberii: Boni Pastoris est tendere pecus, non deglubere.

Cupressus funesta, ac pompis mortalibus destinata arbor, blattas & tineas non fert, sed necat potius: sic invidiam mors extingvit, & ut Poëta ait,

— — *Livor post fata quiescit.*

Vivos interdum fortuna, sæpè invidia fatigat, ubi anima natura cessit demptis obtreçtatoribus ipsa se magis magisq; extollit. Sallust.

Tulipa florum omnium pulcherrimus, uti & *Lotus* & *Heliotropia* quædà ad radios solares sese expandunt, iis seu nocte seu tempestate ingruente subductis, claudunt comam: sic Regna, prout Dei favor vel adest, vel deficit, ita vigent langventq;.

Viola humi repit, fragrantissimum tamen

simul & saluberrimum florem gignit: sic modestissima quæquæ ingenia utilissima. Sic & quæ latent, præstantiora sæpè sunt aliis in ore famæ aut in luce honorum versantibus. Benè Plinius Iunior l. 7. Ep. 25: *O quantum eruditorum aut modestia ipsorum, aut quies operit & subtrahit famæ! Quid in Aulâ & Republ. quoquæ sæpè fieri, inter alios queritur Savedra sub symb. 58. mihi p. 486.*

Rosarum suavi odore scarabæi & cantharides offenduntur ac pereunt, uti & sues Amaraco: sic virtutē improbi ferre non possunt. Quadrathuc sententia Sulpitii Severi: *vitia virtutibus semper inimica fuerunt, & optimi quoque ab improbis, tanquam exprobrantes adspiciuntur.*

Vrtica molliter tacta urit, non item fortiter apprehensa: sic mali quidam fortioribus remediis opus habent, lenibus insolescunt magis.

Aconita hieme florent, sic in bello & turbatis rebus mali homines plerumquæ vigescunt. De talibus Tacitus: *privatim degeneres, in publicum exitiosi, nihil spei nisi per discordias habent. Et alibi: Othoni compositis rebus nulla spes, omne in turbido consilium.*

Lolium tum demumprehendit segetem, cum hæc jam altior est: sic nonnisi eminentem virtutem aut fortunam insectatur Invidia.

Talia multa colligere poterit Physices Magister

gister, qui libros de herbis speciatim scriptos volet inspicere. Ubi equidem minimè contentus esse debet præcepta generalia dedisse discipulis. Nam per ipsas istas singularum, aut certè præcipuarum herbarum proprietates insigniores deducere mentes curiosas plus utilitatis & jucunditatis habet.

Iam varia *Animantium* genera quantam quoquæ pulcherrimorum monitorum farraginem supeditare possunt? Copia ipsa me inopem hic fecerit, si velim hunc campum ingredi; sed aliqua pariter delibasse sufficiet. Nam ad finem properare & descriptionis destinata, & temporis jam malignius suppetentis modò postulat.

Leo apertis oculis nascitur, & quia parum dormit, tanquàm vigilantia symbolum domuum valvis affigi solet: sic Principes vigiles esse debent, & oculos in bonum publicum perspicaces gerere: *Omniū domos illius vigilantia defendit, omniū otium illius labor, omniū delicias illius industria, omniū vacationes illius occupatio,* ait Seneca ad Polybium. *Leo* saginam fugit, & si modum in vorando excesserit, vel insertis in guttur ungvibus ingesta retrahit, vel tantò diutius postea abstinet, ut tradit de eò Aristoteles & ex eò Ioustonus in admiran-

admirandis: sic Principem nihil magis decet Temperantiâ. Leones & Elephantes transeunt quæ impulerunt; de quò Statius:

*Ut Leo Masfyli cum lux stetit obvia ferri,
Tunc iras tunc arma citat, si decadat hostis
Ire super satis est, vitamq; relinquere victo.*

Sic Principes non insultant crudeliter, sed ignoscunt victis & supplicibus.

— Ignoscere pulchrum

Iam misero, poenâq; genus vidisse jacentem. Claud. Leones & Elephantes rarius tardiusq; nascuntur aliis animantibus: sic Viri & Principes magni. *Ex intervallo, inquit Seneca, magna generantur. Mediocria & in turbam nascentia sæpè fortuna producit: eximia vero ipsâ raritate commendat.* Epist. 42. Leones feræ terribiles & magni animi, circumagentes se rotarum orbis metuunt; sic Principes meritò rotam fortunæ pertimescunt. *Cuncta mortalium incerta, & quò plus adeptus sis, tantò magis in lubrico te esse censeas.* Tacitus. *Nihil tam firmum est, cui periculum non sit ab invalido.* Et Leo ipse aliquando minimarum avium pabulum fit, & ferrum rubigo consumit. Curt. Elephantus ferarum omnium maxima, & prudentiâ ad hominem proximè accedens linguam habet perexilem, ut testatur Aristoteles,

les, & ex eò Caussin in Historiâ parabili: sic quò fortior quisq; eò minùs verbosus. Contra ignavissimus quisq;, & in periculo non ausurus; nimii Verbis, lingvæ feroces. Tacitus 1. Hist. Elephantes omnibus impensè delectantur, haud temerè tamen eos ingrediuntur, cum inscii sint. Lips. natandi: idem, in rebus divinis faciunt prudentes. Tingunt earum salubribus aquis animum, non mergunt. Elephantes nunquam humi decumbunt, quia propter magnitudinem corporis agrè se erigerent: sic Principes fastigio suo affixi sunt, nec tutum est illis descendere. Benè Seneca 1. de Clem. *Summa hæc magnitudinis servitus est, non posse fieri minorem.*

Quædam animalia, ut Elephantes & Cameli, quidam etiam Equi non bibunt nisi turbidam aquam: sic nonnullis hominibus maxima ex rixis turbisq; delectatio est. De quibus paulò ante ex occasione Aconitorum aliquid dictum.

Ursi à venatore infestati vel læsi adeò efferrantur, ut quasi furibundi in arbores incurrant, sicq; se ipsos interimant: sic ira nonnunquam & vindictæ cupiditas in exitium homines præcipitat. *Ira, inquit Seneca, ut aliquando perculit stravitq; obvia, ita sapius sibi exitio est.* Id quoq;

quoq; ibid. lib. 1. de Irâ exemplo Cimbrorum, Germanorum demonstratur.

Equus quò acrior, eò altius in bibendo nares mergit Plin. l. VIII. c. 49. sic ingenia quo meliora, eò minus superficiariâ doctrinâ solent esse contenta, sed in profunda sapientiæ altius se immittunt.

Boves instante lupo coeunt, capita & cornua jungunt; illo abeunte quisq; sibi pascit *Lips*: ita periculū Reipubl. ab externo hoste vincit ligatq; civiū alias in diversa euntium animos & consilia.

Lynci, quamvis in fame mandenti, si resperit, oblivionem cibi obrepere, idem Plinius affirmat, digressamq; quærere alium: ita homines quidam præsensibus non contenti alia & incerta captant. *Cupiditati nihil satis est. Avaro tam deest quod habet, quam quod non habet.*

Panthera suavitate odoris alia animalia allicit, undè & caput, quò alioquin terrentur, occultare solet: ita vitium inescat homines, turpitudine ejus sub initium non apparente; sed postea tantò terribior ejus facies occurat animis malè consciis. Sic de matris interfectore Nerone Tacitus Ann. XIV. *A Cesare perfectò demùm scelere magnitudo ejus intellecta est.* Similiter.

ter etiam sagax Principum, aliorumq; Politicorum calliditas alios speciosis prætextibus in casses suos pellicere solet, *capite* consiliorum, seu ipsâ interiore intentione graphicè occultatâ. Hæc enim si in aperto esset, in irritum irent omnes artium dolosarum & consiliorum fabricæ.

Utilia præcepta etiam *Avium* natura suggeret.

Cygnos canere non liquido prorsus Autorum consensu certum est. Qui affirmant, Zephyris spirantibus eos testantur canere. Cygni erudita repræsentant ingenia, quæ facunda & fecunda facit favor Mæcenatum. Pulcherrima hæc de re Politiani epistola extat, quam, quia paucorū verborum est, lubet hic subicere: *Cygro Poëta similis; uterq; candidus, uterq; canorus, uterq; fluvios amans, uterq; Phæbo gratus. Sed negatur canere Cygnus, nisi cum Zephyrus spirat. Quid igitur mirum si tam diu taceo tuus Poëta, cum tu tam diu non spires meus Zephyrus? Vale.*

Aquila pullos suos ad solis ignem explorat: quem qui inconnivis oculis aspicere possunt, pro genuinis agnoscuntur. Sic indolem filiorum Principes explorent, antequam magnis rebus adhibeant. De Aquilâ lumen solare perferente elegantes sunt apud Caussinum in hist. parab. versus:

P

Exploratores

Exploratores oculis qui pertulit ignes,
Sustinuitq; acie nobiliore diem;
Nutritur volucrumq; potens & fulminis hæres,
Gesturus summo tela trifulca Jovi.

Aquila cornicum infestantium strepitum contemnit: sic vir magnanimus obrectatorum aut adversariorum imbellium vocolas ac conatus. Pulchrè in hanc rem Lipsius in Ep. XVI. Cent. II. ad Belgas: *Aranearum tela sunt omnes isti calumniarum contextus, minuta animalia inhærent, fortiora spernunt, & perrumpunt.* Et Clariss. Heinsius in præfat. ad Silium: *Herculem placidè dormientem à Pygmæis circumventum ferunt, rursusq; somnò excussum nullâ cum doloris significatione secum tulisse omnes, & pro pulice habuisse. Idem nobis accidit. Larvæ umbratiles sumus, Scaligeros, Turnebos stringimus: vident illi, & ut strepitum hunc & tinnitum ulsciscantur, tacent.*

Struthio-Cameli ferrum deglutire & concoquere possunt: tales *Struthio-Camelos* sæpè *Aulicos* & omnes eos, qui sub iniquis Dominatoribus sunt, esse necesse est. Multa quippe illis durissima devoranda sunt.

Grues cautissimæ volucres sunt, nunquam dormiunt, quin excubet una: quæ, cæteris capita sub alas recondentibus, erectò providet collo, & si opus est, excitat reliquas. Sic in

in Civitatibus & Castris opus est vigilantia. Duces ipsi & Magistratûs Epaminondam imitari debent, qui comessantibus Civibus excubias & mœnia Civitatis circumibat: etiam Vespasianum, qui ut Tacitus ait, *acer Militiæ, anteire agmen, locum castris capere, noctu diuq; consilio, ac si res posceret, manu hostibus obniti solebat.* In bellò quidem quam noxia securitas sit, multis exemplis doceri posset. Marcos sanè, Teutonicum populum, Cæsar Germanicus cædit, quia, ut Tacitus ait, *cuncta incuria disjecta erant, neq; belli timor, ac nè pax quidem, nisi languida & soluta inter temulentos.*

Jam *Apis*, insectorum volatiliû princeps, quot & quam insignia nobis vitæ civilis documenta suppeditat? Apum Regi amplissimum cubile est. Plinius: Regias Imperatoribus futuris in imâ parte alvei exstruunt amplas, magnificas, separatas, tuberculo eminentes. Sic natura istis dictavit, Regem omni honore, atq; etiam domiciliò, cæterum gregem superare debere. Mediò autem & tutissimo locò collocant Regem suum: sic Principum commodissima sedes in meditullio ditionis suæ; & ibi sitas esse decet Urbes principes, undè in cætera regimen.

Regi apum forma semper egregia, & duplò
quàm cæteris major, in fronte macula quò-
dam diademate candicans. Plinius: sic in
Principibus forma etiam corporis non negli-
genda. Rex apum caret aculeò: *natura telum*
ei detraxit, & iram ejus inermem reliquit, ait Seneca:
ita Principem nihil minùs quàm ira decet, ni-
hil magis quàm clementia. Pulchra hinc al-
lusio Romæ ad Urbanum VIII. P. M. facta est,
cujus Insigne tres Apes erant. Cùm enim illius
Pontificis in æmulos Reges affectum variè Pas-
quinus Romanus exagitasset, novissimè tan-
dem subjecit hoc Distichon:

Cunctis mella dabit, sed nulli spicula figet,

Figere nam Princeps spicula nescit apum.

Apes dùm caput suum Regem habent, con-
cordes, ubi illud amissum est, dissipantur,

— *Rege incolumi mens omnibus una,*

Amisso rupere fidem. — Ità à Principum sa-
lute salus plerumq; Regnorù & felicitas depen-
det: concordia certè sine illis haberi vix potest.

Benè de Romanò Imperiò ap. Tacitum l. I.
hist. Galba: *Immensum Imperii corpus stare ac librari*
sine Rectore non potest. & l. I. Ann. idem Historicus:
Discordantis Republicæ non aliud remedium, quàm ut ab uno
regatur.

Api

Api liceat subicere dissimillimum insectum
Tineam. Hanc parit & nutrit *Purpura*, & ab
eà etiam consumitur: sic potentia Principum
parit alitq; adulatores, sed in perniciem suam.

Quod si *Aquatilium* quoq; classes recensere
luberet, ingens iterùm copia bonorum moni-
torum nobis afflueret. Pauca aliqua delibabi-
mus. *Balæna*, ingens monstrum, oculis caligat,
& vadis allideretur, nisi subindè Ducem par-
vum pisciculum sequeretur: sic multitudo seu
populus grandis bellua est, nisi à prudente ali-
quò Duce regatur. *Vis Consilii expers mole ruit suâ*.
Camerarius distichò hoc expressit, quod levi-
ter correctum lubet adjicere:

Exiguò Balæna meat Ductore per undas:

Principe sic felix plebs vigilante suo est.

Lucius mordacissimus piscis à *Rana* aliquan-
do vincitur, quia hæc oculis illius insilit, & pe-
dibus divaricatis visum ei eripit: quâ de re
Dubravius in libellò de piscibus, allegante
Camerario: sic parva potentia magnam per-
domare potest, quando oculum consilij aufer-
re isti potest.

Quod autem de *Ranâ* hîc, idem de *Aquilâ*
quoq; memoratur, quòd scilicet cervum ag-
gressura

gressura in pulvere se volutat, sicq; fronti ejus insidens oculis pulverem inspergit: ut ita cervus parum prospiciens, quò feratur, & ubiq; offendens, præda tandem fiat victoris.

Vitulus marinus somniculosum animal est, adeò ut dormiens fluctus marinos non sentiat, interim eas inter res numeratur, quæ à fulminum jactu sunt immunes, undè & ex pelle hujus Vituli cingulum gestabat Augustus Cæsar. Possit hoc non incommodè applicari ad homines segnis indolis, & nihil magni spirantes, aut etiam segnitiam ejusmodi sub Tyrannis simulantes. Sub talibus enim ex virtute summum periculum est: quippe quibus ut ait Salustius, *boni quàm mali suspectiores, semperq; aliena virtus formidolosa est*: sic ut ab illis multi hanc maximè de causâ premantur, quòd meliores viri sint, quàm esse Tyrannis expediat, ut ferè de Juliò Græcinò Seneca loquitur. Sub his itaq; inertia pro sapientiâ habetur, & dissimulare vigorem Indolis tutissimum est: sic enim fulmen vitatur, quod alios excitatos, & magnis rebus pares viros percutere solet, quia in ejusmodi regimine nobilitas, opes, omissi gestiq; honores pro crimine; & non minus periculum ex magnâ famâ est, quàm ex malâ, ut est apud Tacitum.

Sva-

Svavitas argumenti quadantenus novi, certè hoc fine, ordine, modò, vix à quoquam, quod sciam, tractati detinuit me in hac Politicâ naturali diutius, quàm initiò proposueram. Verùm cura hæc nostra tantum fortassè voluptatis legenti dabit, quantum mihi scribenti dedit: nec ingratum erit, datum hic majoris opusculi velut subtemen accuratiori tractatione, si Deus voluerit, pertexere atq; excolere. Et potest istud studium ad rem quoq; medicam extendi, ita ut quæ istic tum ad sanitatem corporum, tum ad morbos eorundem pertinentia, traduntur, ad *ευρωγίαν* & morbos simul Rerump. accommodentur.

Postremò illud quoq; (antequam à Physicâ abeam) monendum mihi est, si ullâ in disciplinâ, in hac sanè naturali locum maximè habere illam, quam hodie multi insignes viri in omnibus scientiis & Artibus magnopere urgent requiruntq;, *Ocularem* demonstrationem. Et cum ad eam plerumq; nonnisi per multa impendia & impedimenta perveniatur, omnia hæc nemo facilius superare quam nobilis aut illustris potest: quippe cujus argento & fortunæ multa patent, quæ aliis egentioribus sunt impervia.

impervia. Nobilis itaq; cū plantarum, metallorum, animalium, aliarumvè substantiarum genera & naturas discere aggredietur, non difficulter reperiet ejusmodi commoditates, ubi, quæ discit, præsens oculis lustrare, magnâ & utilitate, & voluptate suâ, queat.

CAPUT
XXVII.
Studium
Ethicum.

Sed pergo tandem ad *Ethicam*, cujus studium quis ambigat dignissimum Nobili esse? cū de virtute agat, in quâ unâ illa, non titulis inanibus nixa, sed vera & sola nobilitas præcipuè consistit. *Ethicam* inter antiquos nemo accuratius excoluit Aristotele. Adeoq; ex illò fundamenta istius disciplinæ haurienda erunt, prout illa Bartholinus, Golius, Keckermannus, inde hauserunt, & aut contraxerunt tantum, aut veste paulò aliâ circumdederunt.

De omni autem genere virtutum non ex lege quidem methodi (neq; enim artem ex professo tradidit) magnò tamen spiritu, styliq; genere & splendidò admodum & penetrante nervosoq; Seneca differuit, inde adeò nobilissimo quoq; ingenio dignissimus Autor est.

Nostrâ memoriâ elegans virtutum Enchiridion, Lipsij Politicam imitatus, Cl. Jonstonus dedit. Imaginem earundem virtutum nervo-

sam,

sam, & aliquid subinde cogitationi Lectoris relicturam dare ego in *Charactere Virtutum* volui, etsi forsan conatui parum respondit effectus. Si tamen Nobilium Magistro explicare eum libuerit, (uti equidem momenta istic rerum, alia ex varijs Autoribus deprompta, aliqua & domi nata dilatarî facile possunt,) Autorum sententias & testimonia, aliqua etiam exempla ex Historijs adjiciat. Cum eò pervenerit Nobilis, ut exoticas etiam lingvas intelligat, svaserim ut Michaëlis Montani, Viri Amplis. & doctissimi opera legat, optimi sanè succi plena. Maximè autem omnium id det operam Nobilis, ut virtutum præcepta non tantum animo imprimat, sed moribus etiam ac vitâ exprimat, ad affectuum scilicet moderationem, tum ad opera generoso homine digna magis magisq; sese indies exercendo.

Ethicam sequatur *OEconomica*, non eò, quod meruerat, pretio æstimata disciplina: cū nec civiles virtutes sine illâ rectè consistere possint. Nam primordia societatis civilis domus sunt, ac nemo facile in publico se rectè gesserit, qui privatum Larem, ita ut par est, non nōrit moderari. Et certè non tot familiæ ad incitas redigeren-

OEconomica.

Q

digerentur, aut certè non tantò ære alienò ob-
ruerentur, neq; ad res utiles magnasq; geren-
das nervum & instrumenta amitterent, si rei
domesticæ cautiùs prospicere maturè Nobiles
discerent. Non nescio equidem speciosa no-
mina jam pridem indita esse luxuriæ & prodi-
gentiæ juvenili: contra frugalitatem turpibus
avaritiæ titulis traduci. Et mori vetustate in-
olito, inq; geniò quodammodò liberæ & ad Ma-
gnificentiam propensissimæ Nationis fundamē-
tum habenti, contraire perdifficile est, & contra
nitendò nihil assequere, quàm *ut pateat, quibus
malis impares simus.* Sed hoc tamen cuilibet nobi-
li Juveni meritò inculcandum est, si aliquid
dandum sit consuetudini, & inprimis auræ po-
pulari, quàm in istâ Republ. primæ aularum,
negotiorumq; publicorum Candidati non de-
bent prorsus negligere, ut id tamen fiat consi-
deratè, & cum aliquò semper ad rem familia-
rem respectu. Neq; enim onera semel contra-
cta facile postea dissolvuntur; sed quod intra
prima juventutis spatia peccatur, totâ plerumq;
vitâ luendum est. Omnino igitur eò dirigen-
di Juvenum animi sunt, ut, dum virtutum
moralium, dum civilium semina hauriunt, Oe-
conomi-

conomicarum minimè omittant fundamenta.
Nam etsi ad eas usu ut plurimum advescant
homines, expedit tamen, ut cæterorum habi-
tuum, ita hujus quoq; lineamenta animo, dum
mollis est, imprimi. Quam ad rem utilia erunt
Axiomata Oeconomica Richteri, præcepta
item, quæ Timplerus, Keckermannus, Alste-
dius Encyclopædiis suis inseruere. Laudatur
quoq; in hac materiâ Ludovici Septalii Medi-
ci Mediolanensis de re familiari libellus.

PRæcipuo autem studio Nobilibus in Poli-
ticam incumbendum est. Hic Rhodus, CAPUT
XXIX.
hic saltus ipsis erit. Huc tanquam ad scopum Politiciæ
artis stu-
dium.
in hac terrenâ Civitate omnia potissimum di-
rigenda, maximè Nobilibus Polonis. Quorum
nemo tam tenuis vel tam obscurus est, quin in
conventibus publicis (qui istic frequentes) suf-
fragium habeat liberum; quin, si in Politicis
sapiat aliquid, ad honores, & ad quævis mu-
nia possit emergere. Ad Politicam itaq; uti in-
primis à tenero etiam ungve assuefaciendum
Nobilem dicimus, ita ad eam, quicquid hæte-
nùs præscripsimus, collimat: ut jam non multa
nobis restent addenda. Nominavimus autem
antèa, nec semel, Lipsij Politicam, eamq;

omninò familiarem juventuti nobili reddendam svasimus. Sunt enim istic nervi Prudentiæ Politicæ, & nihil illo Catone vel doctius vel compositius est. Cui addi aut saltem subjungi SAVEDRÆ symbola ante allegata svaideo, quibus vir ille nobilissimus dignam quovis folio ideam Principis nuper dedit orbi. Cui non sine opimo fructu addetur Thesaurus Politicorum Aphorismorum Joannis Chokieri. Sed porrò quia Disciplina hæc non caret controversiis, opus est omninò addere pleniorē aliquem Autorem, qui istud Civilis Doctrinæ corpus integrè sit complexus. Cujus farinae sunt præter ipsum Aristotelem, omnium aliorum Ducem, adeòq; omnibus præferendum, Tholosanus, Casus, Althufius, Keckermannus, Alstedius, Arnisæus, Kontzen, Vernulæus, Schönbornerus, aliiq; Sed quia unus omninò eligendus est, maximè omnium juventuti commendandus videtur Bodinus, cui uni, ut Vir Cl. Gabriel Naudæus in Bibliogr. politicâ judicat, tantum cœteri concedunt, quicumq; unquam de Republ. libros ediderint,

Quantum lenta salix pallenti cedit Olive:

Et Politicæ viri istius idem dat tale testimonium:

niem: *Quantum, inquit, ad ejus Rempubl. spectat, fatendum est, opus esse elaboratum ingenio, expolitum industria, perfectum judiciò, & ita numeris omnibus absolutum, ut qui ab illò discesserit, haud absimilis videatur illis antiquioribus, qui neglectâ vel ignoratâ Cynosuræ præstantiâ, navigationis cursum ad avicularum quarundam placitum dirigebant, sæpiusq; per cautes & saxa præcipites ferebantur.* Hæc ille. Sed cum istis, quos commendo, Autoribus, consilia particularia, quæ uspiam à magnis viris de Republ. data sunt, conjungenda censeo. Et ex antiquis quidem Sallustii in primis Consilium, quod Cæsari dat de ordinandâ Republ: & Mæcenatis, nec non Agrippæ, quorum alterum Augustus arētissimâ amicitia, alterum proximâ affinitate sibi innexum de rebus Imperii constituendis consuluerat. Addi his meretur elegans, & ut verbis facunda, sic facunda rebus Epistola Ciceronis, quæ inter epistolas ad Q. patrem scriptas prima est.

Artes Politicas in callidis Principibus Aulicisq; quos vetus & nova historia celebrat, unusquisq; artem civilem docentium & discientium suò rimatur venaturq; ingenio. Et extant libri ista machinamenta, quibus orbis Imperia & cardines circumaguntur, magnâ solertiâ evolventes

ventes promentesq; Inter quos principatum tenere videntur, quæ Machiavellus prodidit, vir acutus quidem, sed cujus ut ingenium majore pietate & integritate dignum erat, ita jam non aliud meruit, quam ut cautissime fides ei adhibeatur. Minus acuta, sed magis proba sunt aliorum in isto argumento scripta, uti Arcana Clapmar, Amirati in Tacitum Saverre Politica Emblematica, & alia ejusmodi. Aulicæ vitæ colores si quis extra aulam nosse cupit, ei opinor utilis fuerit libellus, quem olim Juvenis ex Gallico traductum sub *Aulici inculpati* nomine (nam alterum sub Institutionum politicarum titulo protrusum pro meo labore non agnosco) publicari, postquam alterum compereram editum, passus sum.

Cæterum cum singularum Rerumpub. instituta scire plurimum conducatur Politico, hanc quoque ad rem libri e quidem jam non desunt. Nam antiquas nonnullas, uti Atheniensium, Lacedæmoniorum, & aliarum sexaginta, uti & Monarchiam Persarum utilissimò, atque ad genium Polonici Regni accommodatissimo scripto Keckermannus prosecutus est. Nec novis describendis Ingenia decora defuere. Unò tamen Volumine quicquid in singulis maximè

maximè memorabile, & scitu necessarium est, Boterus comprehendit, cui solerte operâ lumen deinde addidit Gothofredus, & adjectis Tabellis atque Imaginibus Librum ipsum, nomine veteri mutato, Archontologiam appellavit. Rempubicam Venetam cum Romanâ olim comparavit Quirinus Piso: quem librum Nobili Polono utilem lectu censeo, quia Polona Respubl. cum illis duabus, Romanâ & Venetâ, multa habet communia. De ingeniis quoque singularum gentium observanda sunt judicia à viris insignibus profecta, quales sunt Barclajus in iconibus animorum, Neuhusius, Saverre sub Symb. 81.

Cum Politicò studio ut Historia pari passu ambulet, necesse est: neque enim aliunde facilius aut melius civilis Prudentia hauriri potest. Sed quæ Historiæ, & quò ordine legenda sint, satis jam ante videor mihi explicuisse: ut adeò nihil ferè quod adjiciam, supersit. Hoc tamē monendum, in Historiis quibusvis sed præcipuè recentioribus, unicuique ea annotanda maximè, quæ in suæ Patriæ publicis Negotiis aliquandò suscipiendis habere usum queant. Uti sunt in primis Origines & Incrementa Regnorum & familiarum, tum jura ac modi, quibus

* Theat.
ingen.
hum. lib.
1. c. 13.

CAPUT
XXIX.
De histo-
ricò stu-
diò nova
monita.

bus quodq; seu regnum seu Provincia in potestate seu Principis seu Reipubl. devenerit. Hinc enim de controversiis atq; etiam bellorum, quæ eâ occasione inter populos hodiè geruntur, justitiâ aut iniquitate iudicium ferri potest. Ità multum scire interest, quibus titulis & modis Lusitaniæ seu Portugalliæ Regnum olim sub Hispanorum ditionem redactum sit, quibus Neapoleos, quibus Siciliæ, & alia ejusmodi Regna ab eodem Rege teneantur. Quomodo Irlandia Anglis subjecta, Scotia verò innexa fuerit. Quo pacto Sereniss. Domus Austriaca Regnum Vngariæ obtinuerit, quo Bohemiæ. Qualia haud pauca olim collecta mecum adhuc servo. Sed ne Nobilis Polonus in suâ Rep. hospes sit, in Patriâ historiâ diligenter sibi annotandum censeat, quomodo & quando Regnum Poloniæ cœperit, quando & quomodo ab eo Moravia avulsa, quando Silesia, quomodo Lithuania innexa, quomodo Pomerania, Russia, Prussia, Masovia, Scephusium: quem ortum in Poloniâ habuerit Nunciorum terrestrium. Autoritas, quando Germani, qui Poloniam incolunt, eò venerint, & undè Juris Magdeburgici in Civitatibus usus, & alia ejusmodi.

Ego

Ego ut minùs versatis præeam, de quibusdam talibus in gratiam Nobilitatis Polonæ cursim, aliquid dicam. Inde in exemplo quisq; discet, quomodo ex aliis quoq; quibusvis Historicis similia colligi, & ad utum reponi possint & debeant.

Poloni gens Slavonica seu Sarmatica, Duce Lecho, tempore Mauritij & Phocæ Imperatorum id est circa Annum Sal. quingentesimum quinquagesimum, è Sclavoniâ, vel ut alii & forsàn rectius, existimant, è Russiæ regionibus in eam, quam nunc habitant, terram venerunt.

Religionem Christianam anno 965 Poloni suscepere, rerum apud eos potiunte Miecislao, cui, cum cœcus natus esset, septimò ætatis anno dies subito reluxit, illustri lucis melioris, quæ illi & Regno post affulsit, auguriò. Ejus Filius Boleslaus, Chrobri dictus, ab Ottonne III. Imperatore, qui ob Adelberti Martyris miracula posthuma in Poloniam venerat, regia Insignia, quæ Pater ejus à Pontifice impetrare non potuerat, accepit.

Moraviam antiquitus Polonis subjectam, sed malè defensam à Miecislao Boleslai Chrobri

R

brai

bræi filio, Patri minimè simili, Bohemorum Dux Prædislaus terræ suæ adjecit circa annum 1030.

Silesia à Poloniæ Regno ad hunc modum avulsa est. Boleslaus ab ore distorto Crivoustus appellatus, moriens Regnum in filios, quos habebat complures, diviserat. Eorum maximus natus Vladislaus, post patrem Regio diademate potitus, instinctu Uxoris Christianæ, Fratribus auferre, quæ Pater singulis destinârat, satagens, bellum conflagavit, in quo victus ipse & pulsus Regnum amisit. Illi in Germaniam ad Uxoris suæ cognatos profugo primò Conradus Imperator opem, sed irritam, tulit; post eidem exuli Fridericus Barbarossa, bis appetitâ armis, sed sine magnò successu Poloniâ, Silesiam partitione impetravit. Vladislaus ergo Dux Silesiæ factus eam ad filios transmisit, à quibus postea in multiplices partes divulsa est. Polonia autem à Vladislai fratribus ordine sibi succedentibus possessa, apud minimi natus Casimiri posteros multis annis mansit. Ex quibus ultimus Casimirus fuit ob virtutem Magnus appellatus, quo sine masculâ prole extincto Proceres Poloniæ Ludovicum Ungarum ad sceptrum vocârunt, agnatis Principibus Silesiæ exclusis.

clusis. Ea res causam dedit, ut Principes Silesiæ, orti à Vladislao, repulsæ & contemptus sui dolore, à Polonis discederent. Erant autem illi ut numerò plures, sic opibus dispares; moribus porro ita comparati, ut nec ferre quietem, nec jura necessitudinis inter se colere scirent, & invidentiâ eò usque provehebantur, ut ne ab insidiis quidem mutuis ac cædibus abstinerent. Invitati his domesticorum inter illos dissidiorum occasionibus ad concupitam jam dudum & tentatam sæpè Silesiam, Boëmici Reges, Johannes Lucelburgicus astutus princeps ejusque filius Carolus, auctis inter discordes odiis, non magnò negotiò perfecerunt, ut aliqui sponte, alii expugnati minis vel pretiò, plurimi blandis capti pollicitationibus liberas cervices obviis Bohemorum cassibus implicarent.

Lithvania post multorum seculorum bellum cum Regno Poloniæ circa ann. Chr. 1386. hac occasione coaluit. Ludovicus Ungarus, de quo supra mentio facta est, cum in Poloniâ annis duodecim regnasset, moriens filiam unicam Hedwigin in nuptam reliquit. Quam cum Poloni sceptro destinâssent, ob formam & dotem varii eam proci ambiere. Inprimis duo ambi-

guâ inter se spe diu certârunt, Wilhelmus Austriacus Princeps, & Jagello, Gedimini, qui primus occupatæ Lithvaniæ Magnum Ducem accepto à Russis nomine se appellavit, Nepos. Vilhelmus Hedwigin, Jagello gentem Polonam magis propensâ habuit, obtinuitq; quod voluit, sed hâc lege, ut Christiana sacra amplexus eodem, quo sibi Hedwigin, conjugio Lithvaniam (ad quam Samogitia, & pars Russiæ tunc pertinebat) Poloniæ Regno sociaret.

Pomerania secundum littus maris Baltici longè procurrens Regio, indè & à situ illò in Lingvâ Selavonicâ *Siemia Pomorska* quasi maritima dicta, olim à Vandalis, Herulis, Obotritis, &c. postea à Sarmaticis populis inhabitata Duces suos habuit, Poloniæ quidem stirpe & clientelâ innexos, sed subindè refractarios. Inter eos, regente Polonos Boleslao Crivousto Svantoborus bellis adversum Danos & hunc ipsum Boleslaum gestis præcipuè enituit. Cujus Liberi paternas possessiones partiti, distinctionem citerioris & ulterioris Pomeraniæ primi fecere. Citeriorem, in quâ est Stetinum, Bertislaus & Ratiborius sortiti sunt. Ex Bertislao nati Boguslaus & Casimirus libertatem

tatem, Leges & Lingvam vicinæ Germaniæ amplexi, relictis Polonis, Imperio Romanò se subdiderunt, & ab Imperatore Friderico Barbarossâ in numerum Principum Imperii in Castris ad Lubecam, ob auxilium contra Danos præstitum, adoptati sunt. Ulteriores Pomerani Poloniæ magis vicini, eorum Societatem, quanquam bellis aliquando interpellatam, retinere tamen ad Sventopolcum usq; qui isti tractui à Lesco Albò Rege Poloniæ præfectus, hoc, dum forte lavaret, per insidias interemtò, pro Duce Pomeraniæ se gessit. Ejus vero filius Mestvinus, cum prole careret, terræ ejusdem hæredem scripsit Premislum Majoris Poloniæ primò Ducem, & mox universæ Regem, agnatis suis ob nescio quas similitates exclusis. Itaque ergò iterum in Polonorum potestatem redacta ulterior Pomerania est. Sed eandem paulò post sub Vladislao Loctio Marchiones Brandenburgenses, qui Premislum ob Pomeranicam, ut creditur, hæreditatem occiderant, Palatini Gedanensis ejusdemq; filii prodicione adjuti, occupârunt. Contra quos cum Crucigeri in Borussia tunc potentes, à Polonis invocati, inq; arcem Gedanensem admissi essent, præmium navatæ

navatæ operæ immensum postulantes, cedere Arce, quam infederant, noluere: quin insuper Derlaviam, Choniciam, aliâq; vicina oppida ceperunt. Ita ergo hæc Pomeraniæ pars eidem, cui Borussia, Cruciferorum Dominationi subiecta, eosdem postea cum Borussia casus diu habuit, cumq; eâ simul in gratiam tandem cum Polonis rediit, repudiatis scilicet Crucigeris, ut mox dicitur.

Russia.

Russia meridionalis (nam alia septentrionalis est; quæ Moscovia dicitur) sæpe quidem armis Polonicis, Boleslaorum inprimis virtute subacta, Duces tamen suos semper retinuit. Qui nec fide in Reges, nec concordiam inter se æquâ egere. Casimiri Magni tempore Lubartus Gedemini Lithvanorum Ducis Filius, ducta Vlodimiriensium Ducis filiâ, omni eâ Russiae Tractu, qui Lithvanos spectat, potitus est, reliquorum Ducum, qui plures, eoq; minores erant, viribus attritis. Reliquum Terræ ejusdem, quod ab Haliciâ, & Leopoli in Poloniam vergit, Boleslaus Masovius, hæredem se matris Russiae ferens, subegit, paulo post venenô à Russis novum jugum male ferentibus necatus. Eâ occasione Casimirus, quem

quem ante nominavimus; antiquam ditionem Poloniae vindicaturus, subitaneis copiis Leopoli diripuit, & post alterâ expeditione oppidis captis pluribus, tantum terrorem Ducibus injecit, ut paucis sibi reservatis urbibus, reliquam Russiam ipsi concederent. Qui illam adeo in Provinciam tum redegit, Palatinis, Castellanis, alijsq; Magistratibus ad Polonicum morem ibi constitutis, religione tamen propriâ eidem relicta. Ex eô tempore turbidi nonnunquam Russi, nec malarum molitionum expertes prorsus, tamen nunquam consensu aliquo Imperium Polonicum excutere sunt aggressi. Nostro hoc seculô illa gens, ducibus Cofacis, auxiliantibus Tartaris, æquè sibi quam Regno Polonico molestiam facessit.

Inter Samatiæ Gentes, quas Ptolemæus enumerat, nominari Boruscos videmus, poniq; in eâ orâ, quam nunc Livones & Moschi inhabitant. Qui si cum Prussis seu Borussis hodiè ita vocatis iidem sunt, sedem illos suam nonnihil versus Occidentem post Ptolemæi tempora promovisse oportuit. Quicquid sit Prussorum gens olim à Boleslao Chrobæo primo Polonorum Rege incursionibus vehementer infestata, sequen-

De Borussia.

sequentibus temporibus multū negotiū proximē
aditis Masoviis, postea & vniversæ Polonorum
nationi facessivit. Dux Masoviorum eqvidem
viribus barbari tūm, & ferocis populi impar, ne-
cesse habuit Fratres Teutonicos, tūm è Syriā eje-
ctos à Saracenis, in auxilium vocare, tradito illis
tractu Culmensi, & quæ inter Vistulam, Mocram
ac Dervanciam interjacent, terris, hāc tamē lege,
inquit Cromer⁹, ut ubi Prussos domuissent, Cul-
mensem Tractum redderent, quæ verò de Bar-
baris cepissent, arbitriū bonorum virorum se-
cūm partirentur. Subacta ergo à Religiosis istis
militibus (vulgò Cruciferis vocatis) brevi tem-
pore Prussia est, debellatis partim atq; ab Ido-
latriā abductis, partim deletis incolis, no-
visq; è Germania Coloniis, Principum Urbi-
umq; Teutonicarum ope, sensim introductis,
Regioneq; ipsā sic cultā & exornatā ædificiis fre-
quentib⁹ more & ritu Germanicō: sic ut tandem
etiā Imperatores aliquid juris sibi in hanc pro-
vinciam vendicarent: debiliore istis temporib⁹
potentiā Polonorum, eo quod post Crivoustum
in multos principes & principatus divisi, minus
in commune consultabant, & assiduis Tartaro-
rum Russorum Lithvanorumq; incursionibus
mirè

mirè aliquandiu fuerant exagitati. Sub Vla-
dislao Loctico cum, ut paulò ante dictum,
Pomerania à Marchionibus Brandeburgicis, ju-
vante Palatini Gedanensis filio, magnam par-
tem Polonis erepta esset, vocati contra illos
in auxilium sunt Cruciferi, certis tamen pactis,
& de præmio laborum stipulationibus. Quas
cum minùs Cruciferi servarent, sed Arce Ge-
danensi, quam defendendam susceperant, cede-
re postea abnuerent, pluraq; alia Pomeraniæ
oppida sibi raperent, tūm demū exarsit bel-
lum, quod à Vladislai Loctici temporibus ad
Sigismundum I. usq; hoc est, ducentis & ampli-
us annis duravit, brevi aliquando pace, sæpius
induciis tantū interruptum. Regnante verò
apud Polonos Casimiro III. rædere Prussos ser-^{ann. 1454.}
vutis, quam sub impotente Crucigerorum
dominio patiebantur, cœpit, initaq; conspira-
tione ab illis ad Casimirum defecere. Qui
cum oppressos in Clientelam recepisset, defen-
dissetq; contra Cruciferos magnis belli labori-^{1466.}
bus fessi tandē Hostes pacem petiere. quæ & co-
iit hāc Lege, ut ditiones Culmensis & Michalovi-
ensis, & Pomerania omnis, Mariæburgum, El-
binga, Stuma, Christiburgum, Tolchemira,
S cum

cum aliis nonnullis locis cederent Polonis, reliqua retinerent Cruciferi, sed ita, si in fide & clientelâ Polonorum manerent, vid. Crom. l. 26. sub finem. Multis post annis Cruciferorum Magister renunciatus est Albertus Brandenburgicus, qui cum sacramentum ex pacto dicere Regi Poloniæ renueret, bellum resuscitatum est. Sed Albertus, cum frustra operam Imperii contra tam potentem hostem implorasset, Regi se, & quicquid Cruciferorum nomine teneret, subiecit, eumque in modum primus ex Magistro Teutonicò Dux Prussiæ, Poloniæque Vassallus factus est: conventionem illam nequicquam rescindere conante Cæsare, & ipsò Alberto frustra à Camera Imperiali proscripto. Vid. Sleid. l. 7. & 8.

Masovia ad hunc modum Poloniæ innexa est. Cum regnante apud Polonos Casimiro III. Janussius Masoviorum Plocensium Dux, caelebs mortuus esset, Ducatum Plocensem Rex jure feudi, ut vocant, ad se devolutum Regnò adjunxit. Janussio frater erat Conradus, cui reliqua Masovia, Varsaviensi, Vissigrodenfi, Zacrociensi, Ciechanoviensi, Lomzensi, & Novodworensi territoriis distincta ad vitæ dies, Cirnensis

Electo
Brandenburgicus
undè Dux
Prusiæ.

Cirnensis Terra sempiterno jure concessa. Sed ejus posteritate extinctâ, omnes hæ terræ Regno Poloniæ sub Sigismundo I. accessere, privilegiis tamen quibusdam veteribus usque fruentes.

Circa annum Christi 1413. Sigismundus Un-^{Scepusi-}gariæ Rex, & post etiam Germaniæ Impera-^{um.}tor, à Vladislao Jagellone Rege Poloniæ octoginta millia sexagenarum Pragensium mutuò petiit, obtinuitque, oppignerato Jagelloni Scepusiensi Tractu cum tredecim oppidis, arce tamen Scepusiâ exceptâ. Ex eò tempore Scepusium in ditione Polonorum est ad hanc usque diem. Crom. l. 18. sub fin.

Nunciorum Terrestrium ortus & autoritas.

Cum anno 1469. Casimirus III. Conventum Polonorum Minorum (ita appellantur Cracovienses, Sendomirienses, & Lublinenses) Vislicia ageret, subsidium ad exolvenda stipendia postulans, non abnuvit id quidem Nobilitas, verum sine Majoribus Polonis nihil sciendum sibi putavit. Quare placuit binos à Satrapiis sive Palatinatibus Legatos ad Comitiam Petricoviensiam mitti, qui decernendi in commune cum cæteris moderati tributii potestatem.

tem haberent. Atq; hoc tunc fieri coeptum, sic inolevit posterioribus temporibus, ut sine ijs Legatis, seu Nunciis Terrarum (sic enim vocantur) nulla Comitia legitima habeantur, neq; tributum decerni, ac nè Lex quidem ulla ferri possit.

Quò tempore Castellanus Cracoviensis potiore in locum Palatinò habere coeperit.

Circa annum 1117. Boleslaò Crivoustò regnante, Palatinus Cracoviensis Scarbimirus quidam erat, Vir manu animoq; promptus, & rebus benè gestis inclytus. Sed is superbior postea factus, à Boleslaò, cui obrectare, & opum factionumq; fiducia rebellionem minari coeperat, excœcatus & Senatu motus est. Ac ut dignitati ejus major nota inureretur, constitutum tùm fuit, ut Cracoviensis Castellanus Palatinum præcederet. Quod hodieq; observatur, cum in cæteris Palatinatibus primus loco & dignitate Palatinus habeatur. Sed ex longiore excursu, cui veniam dari peto, tandem ad rem reversi telam nostram texere pergimus.

CAPUT
XXX.
Chronographia,
Geographia, &
Geometria.

Historia, ut magnus Vir Gerardus Vossius dicere solebat, duobus velut pedibus nititur, Chronographiâ & Geographiâ. Nam illa

illa temporum lucem infert narrationibus, hæc situm adscribit locorum, quorum notitiâ sanè opus est, nisi in orbe, & quæ orbis, Provinciarumq; singularum res persequitur, historiâ, tanquam in ignotâ sylva errare velimus. In utraq; non desunt hodiè nobis Autores, qui faciem præluceant. In Chronologiâ Bucholcerus, Funccius, Emmius, Scaliger, Calvisius, Petavius, Helvicus præstant. Ego (quia omnes legi non possunt à nobili) si brevem quis velit, Bucholcerum, si prolixum, Calvisium prætulerim aliis: quia etsi cæteris non videntur eruditione majores, imò aliquibus vix pares, tamen usui magis accommodati sunt. In Geographicis primi manu ductores sunt Cluverus & Bertius: postea ad Ortelios, Mercatores, Theatra Urbium, & Atlantes progressus fiet. Qui libri cari equidem sunt, sed pretium sui multiplici utilitate & svavitate largè refundunt. Sed inprimis, ut rectè monet Magnus Sævedra, conclavia illustrium Discipulorum ejusmodi aulæ & peristromatis vestiantur, quæ tectorio opere variè elaborata generalem quandâ Orbis delineationem, h. e. quatuor mundi partes una cum celebrioribus fluviis, montibus, urbibus aliisque

aliisq; insignioribus locis spectanda exhibeant.

Geographiæ mentio revocat me in memoriam cæterarum artium Mathematicarum: quas si omnes disci à Nobilibus vellem, nimis prodigè eorum tempora viderer erogare. Interim Arithmeticam & post hanc Geometriæ elementa omninò illorum digna studio arbitror, neq; quisquàm opinor contradixerit. Habet ea disciplina usum in re familiari, habet in finium dirimendis controversiis, habet deniq; in munitionibus, & in omni re militari. Quæ hodiè à Geometriâ, atq; inprimis Mechanicâ plurima petit subsidia. Nolim itaq; ejus expertes esse Generosos juvenes, cum horum uti è Martiis operibus coepit, ita iisdem tueri decus suum soleat Polona Nobilitas: ipso scilicet soli patrii genio ac positu ad arma invitante, cum à vicinâ Tartarorum Turcarumq; (ut alios jam omittam) potentiâ sæpè vis inferatur his terris, semper certè metuenda sit. Unde etiam anterioribus temporibus non æstimabantur, imò nec his, etsi in deterius fluentibus, multum adeò æstimantur Nobiles, qui partem juventutis & fortunarum non dederint militiæ, adeoq; vel ipsimet bellica fortitudine

Vide Sa-
vedram
sub symb.
v. edit.
min. p. 37.

dine, vel saltem missis copiis suis (uti inter Magnates hîc usitatum) bonos se patriæ filios probârint. Si qvi verò à bellò abstinent, (uti sanè aliis delicatæ peregrinationes, aliis valetudo, aliis alia obstat,) eos hunc velut defectû aliis insignibus ac conspicuis dōtibus, nisi contemni velint, pensare oportet. Tantum igitur cū pretium sit gloriæ militaris in Poloniâ, non sunt Nobilibus negligenda quæ ad eam rem faciunt: legendiq; adeò etiam rerum bellicarum scriptores, quales sunt Vegetius, Onofander, Frontinus, Lipsius de Militiâ Rom. Hermannus Hugo, Starovolscius, de la Noue aliiq; similes.

Istis hætenus enumeratis exercitationibus ex superiorum deniq; facultatum sacrariis ad-
dere debent coronidem Nobiles. In Theologia eò usq; minimùm progredi nitantur, ut religionem suam penitus intelligant, & ubi necessitas postulaverit, defendere, telaq; adeò impetentium retundere possint. Sed inprimis Theologiæ practicæ navam impendant operam, atq; ex eâ Deum diligere & venerari, piè, justè, sobriè vivere, seipsos & conscientiam suam revere-
ri, opera deniq; Charitatis exercere discant.
Magna

CAPUT
XXXI.
Superio-
rum fa-
cultatum
delibatio.

Magna enim jam licentia & dissolutio ubiq; dominatur, adeò ut quæ vitia erant, abierint in mores. Et inter Nobiles reperiuntur quidem, qui laudatis Majorum suorum vestigiis decora æmulatione insistant, sunt tamen quoq; nimis multi, qui vitiis omnes alios antecunt, genus suum & nobilitatem ex virtutis actionibus præclaris natam, mirè defœdantes, nec non opibus avitis abutentes intemperantissimè.

Juris scientiam meritò magni faciunt Nobiles, cum jus subditis suis dicere subindè teneantur, cum & identidè res ferat, ut judiciis partim terrestribus, (ut vocant,) partim tribunalitiis aut intersint, aut præsent, patente isthac Iudiciorum Præturâ cuilibet Nobili, & inter tot inquietos, & ex libertate sæpè licentiosos nascente facile litium materiâ, ob quam vel vocent alios injus, vel ab aliis vocentur. Sed quia proprium legum ac statutorum Regni codicem Nobilitas Polona habet, eum ut sibi cognitum & familiarem Nobiles reddant, oportet. Ut tamen etiam fundamenta legum patriarum tantò melius percipiat judiciumq; adeò suum ex ipsis juris principiis, verissimis divinitatis radiis, informet, duos minimùm libros velim legere

legere & diligenter legere nè gravetur: primùm Institutiones Iustiniani brevibus notis à doctissimis viris, Corvino in primis & Joanne Pomereshio illustratos, & postea librum Hug. Grotii de jure Pacis & Belli: qui liber omnigenæ eruditionis, qualis Politicum decet, plenissimus est.

Medicinam cuiq; Nobili vel propria valetudo satis commendaverit, & culta illa etiam à Regibus est, nedum Nobilibus, sed eò usq; in hac arte proficere, ut morborum suorum, vel alienorum curationem, rem ancipitem, & vitam hominis facile in periculum adducentem, suscipere ausint, non est, nisi eorum, qui omnes cogitationes suas & vitam omnem huic arti impendè. Aliquantum verò delibasse ex hac arte eò prodest, ut tantò facilius doctum Medicum nosse atq; adeò adsciscere, & deindè ipsius etiam Medici, quem vocaverit, curam ac diligentiam acuere quisq; possit. Præcipuè verò, ut corporis humani fabricam perspiciat, lectiones anatomicas, ubi occasio datur, diligenter à Nobili frequentari velim: & simul brevem Autore, qualis est Dresserus de partibus humani corporis, vel Anatomia Bartholini, percurri. Cavendum tamen, nè paucillum illud, quod

T Nobilis

Nobilis ex Medicinâ didicerit, typhum aliquem atq; opinionem scientiæ creet: adeoq; is, si Medicus turgidæ ejus scrupulositati non illicò semper satisfacere videatur, diffidentiam inde concipiat, quæ maxima bonarum medicationum remora est. Oportet enim ægrum fidere Medico, & arti ejus, ut cuidam quasi Dei manui, credere, si velit convalescere. Inprimis autem *Dieteticam Medicinam* quisq; sanè Nobilis jure sibi habet commendatam: quò tantò meliùs regere suam domi valetudinem queat. Neq; enim cujusvis est alere, atq; assiduum sibi habere Medicum. Quamquam & hic nolim svadere, ut certæ & scrupulosæ diætæ Nobilis, præsertim Polonus, assuescat, nisi quis singulari aliquâ corporis imbecillitate eò adigatur. Quæ ipsum à multis quoq; exorbitandi occasionibus, & ut seculum est, necessitatibus, quas validi in vitâ istâ civili vix ef-fugere possunt, excusaverit.

Ad Diæteticam istam *corporis exercitia* pertinent, res à juventute Nobili magni plerumq; habita, & apud externos magnò nummorum & temporis impendiò quæri solita. Ac forsàn aliqua ad corporis robur & agilitatem utcunq; utilia.

utilia esse concedi possit, sed multa profectò vaniora sunt, quàm ut tantò pretiò emi debeant. Neq; ad motum corporis necessaria nobili esse puto, cui in patriâ rarò quiescendi spatium, potius verò nimii motus frequentissima & prorsus quotidiana occasio est. Sed de hac Exercitiorum peregrinorum vanitate, vide & considera quæ doctè verèq; differit Vir natalibus, ingenio, doctrinâ & dignitate Magnus in Poloniâ suâ contra Barclajum defensâ à pag. 57. usq; ad 65.

HÆc mea de Educatione nobilis atq; Illustris juventutis sententia est, ita nova ut regiam usitatæ hætenus methodi viam non tam deserat, quam emendet. Si quid etiam minus tritum occurrat, id nolim ideo tardius fidem inveniat. Nihil enim scripsi, nisi certissimis documentis comprobatum. Sed quia in nonnullis lectorem ad alia scripta remisi, in cæteris verò vel ordinem minus, vel nimis copiam videri possum sectatus, ideo summa potissimorum Monitorum capita in opere ipsò latè diducta compendio hic tradam: etsi verèor, nè, si ex compendio istò de toto libellò judicium quis facere velit, nihil hic singulare traditum.

Caput
XXXII.
Anacephalaosis.

traditum credat : segniorq; adeò ad lectionem totius reddatur. Sed qui sapiunt, scient, quale sit iudicium, quod ex arido & informi sceletò de corpore fieri solet. Latinitatis vocabula, & rerum vocabulis significatarum prima lineamenta ex Vestibulò, & postea Ianuâ Cl. Comenij, tum Nomenclatoribus inde confectis hauriant discētes. Latinitatis analogiam & anomaliam, hoc est, vocabulorum flexionem, connexionem, usum, tam illum, qui sub certa generalium regularum quasi signa revocabilis est, quam alterum à regulis generalibus abeuntem ex grammaticis dextra interpretatione intellectui, crebrâ lectione & repetitione memoriæ impressis, percipient. Grammaticam omnibus eandem præscribere non est meum, quia Scholæ aliæ aliam habent. Brevissima tamen omnium est, quæ Regia vocatur, nuper Lugduni Batavorum impressa. Plenior Rheniana, & perspicuitate alijs omnibus par, exemplorum verò copiam etiam superior est : novitate, sed simul ad naturam apprimè accommodatâ methodò Comeniana excellit. Latinitatis puritatem ex Cicerone potissimum bibent discētes : cui addetur Corn. Nepos, &
ex

ex Terentio phrasæ & elegantia, pro adultioribus etiam ex Plautò selectæ. Ad familiarium sermocinationum facilitatem assequendam Progymnasmata Pontani, Colloquia Ludovici Vivis, Erasmi, Corderii, vel Helvici, qui ex pluribus ejusmodi unum libellum contextu- it, conducent. Stylus quàm creberrimè movendus : proponendæ imitationes, nonnunquam in arenâ, aliquando etiam curâ domesticâ elaborandæ. Fiant versiones ex Latinò & reversiones : versionibus ex vernaculò sermone factis versio Præceptoris, vel ipsius Autoris, & quò deprompta est pericope, textus addatur, & simul elegantia inde excerptæ subjiciantur. Materia verò sit seu Ethica, seu politica, seu historica. Atq; ut moralium vel civilium virtutum prima semina primò ex Cicerone, de- inde ex alijs à Ciceroniano stylo non dissonis scriptoribus, maturè animis nobilibus inserantur, sententias ejusmodi ethicas vel politicas, & quomodò eæ ad usum transferendæ aliquandò sint, simul discant.

Ubi nonnihil firmati in stylo fuerint, Rhetorica præcepta, tum & variandi dilatandiq; modos discant; mox ad Chrias accedant, simul
& ex

& ex Cicerone, Muretò, Manutiò, Erasmo, Plinio juniore, Politianò, tum & aliquas ex illis clarissimorum virorum, quæ separatim hoc titulò excusæ & pleræq; politicæ sunt, Epistolas selectas primò vertant in vernaculum, postea in Latinum, sed cum quâdam Paraphrasi, & mutatis propriis locutionibus in figuratas, & figuratis in proprias, reducant.

Logicæ deinceps elementa proponantur, ejusq; usus demonstretur in Autoribus, quos eloquentiæ vel civilis doctrinæ causa legunt, audiuntve. Inprimis argumenta in materiis hortandi, dehortatoriis, commendatoriis, nuptialibus, consolatoriis, funebribus, Panegyricis, gratulatoriis, expostulatoriis, purgatoriis, & aliis ejusmodi invenire primò, deinde disporre ex arte Rhetorum, atq; exornare tandem, & memoriter declamare discant. Quam ad rem ut res & verba largiùs suppetant, Orationes Mureti, Baudii, Heinsii, Siberi, Junii Virdungi, Buchneri, Berneggeri, Vernulæi aliorumq; talium; Historiæ Curtii, Cæsaris, Paterculi, Justinii, Sallustii, Livii, Svetonii, & postremò Taciti, inter recentiores Tursellini, Buchanani, Massæi, Stracæ, Puteani, Cromeri, Reidani, Thuanii, &c.

ni, &c. evolvendæ sunt. Subindè & Poëta aliquis, Virgilius inprimis, Seneca Tragoëdus, Claudianus, Lucanus, & qui Poëtas inventionem & stylò effingit, Barclajus Historicis interponendus est. Ex omnibus verò, quos legerint, Autoribus, optima & elegantissima quæq; uti acutè dicta, adagia, similitudines, Elogia, judicia, Comparationes, Epigrammata, & alia hujus generis, modò supra diffusè monstratò, excerpent, & ad futurum olim in seriis negotiis, in Orationibus publicè habendis, in congressu & convictu quovis civili, usum reponant.

Autorum ejusmodi lectioni Philosophiæ tam theoreticæ quàm Practicæ addantur Præcepta: Sed ex Theoreticâ ii potissimum flosculi consecretandi sunt, qui ad vitam civilem aliquid adjumenti asferre possint. Quâ in re cum curâ, sed majori operi proludentes, hic prævivimus.

Ut Historias melius intelligant, in Chronographiâ & Geographiâ nobiles exercendi sunt. Addenda etiam Geometria, ars in militiâ & alibi nobilibus pernecessaria.

Fastigium deniq; huic universæ eruditionis structuræ Iurisprudentia & Theologia, quantum necesse est, delibata imponent. Quod superest,

supereſt, DEUM precor, ut vobis, qvi Illuſtri
 genere nati ad magna deſtinamini, animum
 det ad ejuſmodi monita ſeqvacem, tũm & ſe-
 qvi volentibus gratiam ſuam, & ingenii cor-
 porisq; vires idoneas largiatur: eò deniq; pro-
 vehat, ut, qvi nunc præſcriptum, & exemplum
 alienum ſeqvimini, inter exempla olĩm fulgea-
 tis, quæ imitari alii velint, non niſi rari
 & optimi poſſint!

Emendanda.

Pag. 16. lin. 19. pro dũ lege cũ p. 21. lin. 23. poſt quæ pone ma-
 ximè p. 33. lin. 16. poſt vocem maximè tolle (,) p. 38. lin. 22. lege
 controverſias p. 43. lin. 11. lege prævalida p. 45. lin. 5. adde Dec. I.
 & lin. ult. lege Palatium p. 46. lin. 16. adde Dec. I. p. 47. l. 5. adde
 Dec. I. p. 49. lin. 14. adde Dec. I. p. 50. lin. pen. adde Dec. I.
 p. 51. lin. 1. adde Dec. I. p. 54. lin. 11. lege imperari p. 56. lin. 8.
 adde Dec. I. p. 57. lin. 15. adde Joannis p. 58. lin. 22. lege ac-
 commodata p. 60. lin. pen. adde Dec. II. p. 66. lin. antepen. pro
 Jovi pone Herculi p. 67. lin. 15. pone cum priore illo p. 71. lin. 12.
 lege Parietariam p. 75. lin. 1. poſt obſervat. pone polit. p. 80. lin.
 17. pone Illuſtriſs. p. 93. l. 2. poſt negotia pone enim p. 96. lin. 25.
 lege ſcintillâ p. 97. lin. 15. pone inter & lin. 23. lege acria p. 105. lin.
 14. lege occasione p. 107. lin. 12. lege mortualibus p. 121. lin. ult.
 pro certè pone ſanè p. 126. lin. 8. poſt Tacitum pone Diſſertatio-
 nes p. 129. lin. 20. lege Adalberti p. 131. lin. 23. in voce quàm
 tolle accentum p. 135. lin. 17. lege Sarmatiæ.

Reliqua benignus Lector ipſe corriget: donec his omnibus
 accuratiorem limam alia editio admoveat. Quam à nemine ta-
 men, niſi conſultò Autore, tentari velim, nè dũ alii fraudem
 molitur, ſibi faciat,

792.



